




8J

1568

C5K62/

1740

v.3



太上感應篇註解大全

人部

宋理宗皇帝御書曰
諸惡莫作衆善奉行
二語可括全篇之義
總見善貴於勇行

分外營求

〔註〕太乙真人曰：予有六字經，曰：忍曰方便，曰安本分。人之不肯安本分者，只謂營求可恃耳。豈知人生富貴貧賤一定不移。陰註：陽受皆前因也。可分外求乎？袁了凡答雲谷禪師曰：孟子言求則得之，求在我者也。仁義道德可以力求，功名富貴如何求得？禪師曰：孟子之言甚妙。汝自錯解了。六祖說：一切福田，不離方寸，從心而覓，感無不通。求在我不獨得仁義道德，亦得功名富貴。內外雙得，是有益於得也。若不返躬內省，而徒向外馳求，則求之有道矣，得之有命矣。內外雙失，故無益。然則爲善得福，乃是本分內所有，而分外營求，豈有得福之理哉？但爲善時未嘗有營求之心，而得福則自然之應耳。苟有心營求，則屬於分外矣。乃知太上苦心化導人，切實而委婉也哉。

〔經引〕

中庸君子素其位而行，不願乎其外。易曰：君子思不出其位。

〔論〕新平縣令裴璞卒於官，其友韋元芳客隴右，道逢璞躍馬來，騎從甚盛，驚問之。璞曰：吾任四川掠剩使，專司世間財物盈縮。凡陰司註定祿籍，倘或有踰額，則陰府稽察，命我掠奪之，使之或遭橫事，或貿易折損，一切水火盜賊疾病遺忘，以消耗之。夫世間農勤求穀，商勤求財，官勤求祿，只得本分所有，不能增本分所無。如不

勤將本分亦失之矣。然人當自知足，不可於本分外妄生覬覦之心。今子逢吾，亦是前定，合得白金二斤。若多取，又當掠去，不敢厚子。後果獲如數。

○劉伯龍少貧，長歷尚書左丞，出蒞武陵太守。貧窶尤甚，將令家人營什一之利，見一鬼在旁，撫掌大笑。伯龍嘆曰：「窮固有命，何至爲鬼所笑？」嗚呼！世人不能安命，非分妄求，爲鬼笑者多矣。

〔分定報〕唐魏徵爲僕射時，有參隨二官，簾外閒評。一人曰：「我等官職悉由此老。」一人曰：「總由天。」徵聞之，遂作一書付言。由此老者送選部云：「與此人一好官，其人不知也。」出門忽心痛，乃托由天者送書。部問其名，明日註詮補一美職。而徵賜書之人不與焉。徵問之，俱以實對，益嘆由天之說爲不誣耳。

〔箴〕洪武初，江右廖德明精堪輿，自選一穴，在江島青龍山尾。塋後當出天子，臨終戒其子曰：「塋後三年，勿啟宅門，啟得奇禍。」子依言扃其門。三年不啟，後欲嫁妹，母曰：「但爭差五日。」啟門何妨？遂啟之時，欽天監奏：「帝星見江西。」又言：「江西有天子氣。」因蹤跡發其塚，但見屍已化爲龍，惟一足未化，目瞋未開。蠕蠕有動意，若滿五日，則化而入江事成矣。自古言文齊禍不齊，其廖德明之謂乎？德明術齊矣，而福不齊，安得妄求大位哉？

○歸安省祭孫邦華就銓北上，有姐夫某者，亦以省祭赴銓太原府倉官。華選未及，將束裝歸，忽姐夫暴死。華語甥曰：爾父一生勤苦，付之東流矣。然文憑尚在，盍使我冒爲之，貲皆均分何如？甥從之。華赴任，任滿其得七百餘金。華自喜得計，復入京投文聽選。及拈籤，恰補原缺，勢不可往，涕泣而歸。使邦華能安分待時，太原倉官可獨享其利，而將來遷轉又未可知。今以一奸巧自失，豈非越分營求爲神所掠乎？如此者可類推，勿蹈故轍可耳。以上營求名位善報寶祐間孟無庵專帥荆湖，出巡見一漁翁，貌甚偉，手提巨鱗，避道左，公詰姓名，並詢年庚。與已同，令到衙欲官之。漁翁曰：富貴貧賤各有定分。某年偶與公同，公生於陸，土厚重故貴。某生於舟，水輕浮故賤。某漁足自活，若一旦富貴，恐難消受，必致暴死，強之不可，竟去。後漁翁生五子，殷富，享高壽終。

○盧懷慎清謹，不營貲產。旣爲相，無異寒素。病卒，妻崔氏戒子勿哭。曰：汝父清苦，必不死。時張說同爲相，貨賄山積，豐歉大異。是夜公果薨，左右以夫人言告公。公曰：清苦是吾前定，吾到冥司，見有三十鑪，日夜爲張公鼓鑄錢財，我無一焉。冥王嘉我廉靜，奏帝，詔加二紀。發回後，張公恃富，家人坐法，夫貴而不富，宰相尙不能營錢財，況其下焉者乎？然富亦不可恃，縱奔逐何益哉。

惡報復州陸奇將赴京投相知請楚中盧山人卜曰君未逢時未可輕動且汝堂後有錢一甕非君物錢主方三歲君不許用一文用必有禍陸口應諾歸語妻子曰我宅內錢非我用而誰相率掘起果一甕散錢數十萬妻兒方串尚未取各頭痛不可忍乃信盧士之言復往問盧曰骨肉與錢孰重乃卽埋錢頭痛皆止

○常熟直塘村富人張八翁機械無厭有客糴米五百斛已立約定價矣發米時每斗又欲增錢二十文客怨恨不平抱忿增之午後大風忽起陰雲蔽空雨雹傾注張之倉帑錢帛掃蕩一空所居大廳揭去數千步張驚怖忽一木墮身臂折而死此過求錢財之報也夫價既定而復增此真分外財也安得不犯天怒哉

○隋末有一書生貧甚居隣官庫欲盜其錢金甲神持戈擊曰汝要錢可速取尉遲公帖來此是尉遲敬德錢也書生訪至一鐵冶尉遲公方袒露蓬首而鍛書生拜云乞錢五百貫公怒曰打鐵人安得錢戲侮我爾書生曰君若哀憫乞賜一帖足矣公笑與之生持至庫金甲神曰是也令繫梁上取錢五百貫後敬德佐唐天子定天下歸里賜錢一庫閱簿少五百貫將罪司庫者後於梁上得帖敬德視之乃打鐵時書帖也錢財各有限定妄求何益

○省身要集曰鄭子元有心疾每疾作輒昏瞶如夢或言真空寺僧

不用藥能治心疾于元往叩之僧曰公疾起於煩惱生於妄想妄想之來其機有三或追憶數十年前榮辱恩怨及種種閒情此是過去妄想或事到眼前可以順應却乃畏首畏尾猶豫不決此是現在妄想或期望日後榮華皆如其願或期望功名成遂告老歸田或期望子孫發榮以續書香與夫一切不可必得之事此是未來妄想三者忽然而生循環無端禪家謂之幻心能照見其妄而斬斷念頭謂之覺心故曰不患妄念起惟恐智覺遲此心若同太虛明無不照煩惱何處著脚

○萬年縣捕賊官李春嘗與所知作膾有一客偶至色甚傲因問所能曰善知人食料曰今日膾有人不得喫否曰惟公不得喫李曰某爲主人修膾安有不得喫之理固促饌將就食忽一人走馬來云京兆尹召李急去私囑庖人留膾欲破客術諸人食畢獨留膾兩碟李至執筯將喫罵客云膾已在吾手尚謂不得食客顏不變曰我見不錯李曰事已在掌握中尚敢饒舌語未竟牆上土角打破食器膾已蒙塵土李失色問庖人更有膾否曰盡矣乃厚贈客可見一飲一酌皆前定也

力上施設

如以天子之力施設臣民上官之力施設下位有司之力

施設百姓富豪之力施設貧賤家主之力施設奴婢奸險之力施設愚懦皆是夫挾勢力已爲人所畏矣又從而施威設法以濟其惡豈不爲太上之瞋怒鬼神之譴責也哉

引經

書曰毋依勢作威毋倚法以削

惡報宋盧多遜貶崖州食於道旁有媼頗能言京邑舊事多遜問曰

媼自何來曰我本中原士大夫家子任某官宰相盧多遜令吾子枉道作某事子不從盧銜之中危法合門遠竄一載眷屬相繼淪亡止老身流落無依彼盧某恃勢施設終當遠竄老身或猶及見耳多遜默然趣駕去此事與商鞅投宿相同多遜亦有何顏面見此老媼哉施設者宜知戒矣

○政和初宋昇爲占京轉運專修西內殿宇語同列曰速成此役賞可立得宮室延袤十六里殿宇丹漆需牛馬骨和灰不給城外有五代數千塚幹官韓容獻計發塚焚骨應用宋昇然之成州刺史郭璉等迎合其意運判孫貺獨以爲不可引疾罷去役成宋昇以功受顯謨閣學士踰日死妻子盡沒韓容繼死郭璉疽發於臀有骨不能坐醫以藥取之落三十六骨乃死孫貺病絕至太山府獄吏勒入供狀孫曰我何罪殿上厲聲曰汝發洛陽塚幸賞罪安辭廡下引人相質身荷鐵枷有卒持鐵扇障其面時時揮之扇上皆

施釘血流被體乃宋昇也孫歷具去官狀昇屈伏孫放回

嘉祐中沈遇知杭州過諸堰皆集牛以備拖挽時大暑監官皆露宿堰上伺防水漲於半夜忽聞有人相呼曰明日有何生活一曰沈幾子知杭州明日過此我等拖挽又是一番勞苦一曰沈幾已有子知杭州耶衆相嗟歎內有曰沈幾居官愛民不使勢力上帝嘉其仁廉故有世代富貴之報我等在官時極力暴民致墮此苦衆聽其言四顧無人跡之乃堰上數牛輒嘆曰安知此牛非沈幾僚友親舊乎李虛舟聞而書其事大凡六道輪迴此理昭然彼馬爲我乘牛爲我耕皆我前修而得亦彼造孽而致或負我債或騙我錢今生來填還我尤當憐憫而愛惜之豈曰我人彼畜我力可以制之而任意鞭策也哉王命岳曰君子爲善有無盡之心小人爲惡無不盡之力是故力能刑人則以人命爲草菅力能流貶人則置多人於死地力能發塚則以白骨爲泥土皆力之爲累多遜宋昇與堰上之牛早知今日受苦則當初有勢不盡用有力不盡使也悔何及哉

淫慾過度

註

從來夫婦爲生身之本人道爲紀綱之原若非神仙色

外合減德喪心如見他色美起心私之此別人妻也太上已垂戒

於前矣。此淫慾過度，是自己妻妾也。人能節慾，培養元氣，則神旺壽長。若過度，則身衰速死。道書曰：人惟慾心淡忘，則精氣滿於三焦，榮華百脉，及慾念一起，慾火熾燃，翕撮三焦精氣，流溢並從命門輪瀉而出，精竭力萎，可畏也哉。

論黃帝問岐伯曰：余聞上古之人，皆度百歲而動不衰。今時之人，年至半百，動作已衰。將世有異耶？岐伯曰：上古之人，蓄精養神，修承天年，恒百歲而外。今人以酒爲樂，醉而入房，以慾竭精，起居無節，務快其心，故半百而衰。內典曰：女色於人是衆苦本，障礙本，殺害本，痛傷本。是故達者遠之。素女曰：人年二十者，四日一泄；三十者，八日一泄；四十者，十六日一泄；五十者，三十日一泄；六十者，當閉而不泄。如此，則不廢人道，亦不損元陽精氣，壯盛子孫繁衍。此慾所以當節也。又按攝生之說，二至之日宜戒，大寒、大暑宜戒，日月薄蝕宜戒，大風、大霧宜戒，迅雷、暴雨宜戒，又本命日、庚申日、甲子日、丙丁日，四立二分日，二社日，弦望朔晦日，每月初二十八日，正月初三日，十四、十六日，二月初九日，四月初四、初八日，五月三箇五日，三六日，三七日，名爲九毒日，十月初十日，十一月二十五日，十二月初七日，二十日，俱宜戒。凡此皆所謂度也。彼淫慾過度者，自速死耳。豈一死之後，遂無冥譴哉？○謝上蔡曰：人若有爲

必須精力強盛方做得參贊天地的事業故當戒色若被嗜慾沉溺則此身尚不可保安能建立天地哉

引經書曰殉於貨色時爲淫風

箴任惠公晚年益康壯或問養生之術公曰讀文選有得耳石韞玉以山輝水

含珠而川媚是也此言元陽堅固則永享遐齡矣

○蒲傳正知杭州鄉老李覺來謁年百歲色潤澤同嬰兒公問攝養之術曰但絕慾早爾○劉元成年八十堅固不衰自言寡慾三十年氣血脚力如同年少○周和尚九十餘行遠路如飛鬚眉不白言無他術惟壯年節慾夫老而強健人生第一樂事究其所由不過節慾而已若淫慾無節則精竭氣耗神亦不守舍矣妖仙何辭○昔有一人患好色病慾火時動無法可治問王龍谿先生荅曰有人設帷帳一所指謂此內有一名妓汝必褰裳就之及揭帳入視乃汝妹汝女也汝此時一生淫心亦頓息否曰息矣曰然則淫心本是空所謂邪不能勝正汝自認作真耳夫初欲就之邪心也既而息之正氣也汝病藥不能療慾火熾時當作此想則天理之正氣自存而邪心卽息滅矣此數語可爲過度無節者作座右銘○楊誠齋善謔嘗謂好色者曰閻羅王未曾相喚子乃急自押到何也然淫慾者不聽則是頑人無藥醫矣○人能常想病時則慾心

漸滅常防死日則道念自生風流得意之事一過輒生悲涼清真寂寞之鄉愈久轉增意味

惡報王黼爲相窮極富貴置大榻於寢室用金玉爲屏翡翠爲帳環小榻十數擇美姬居之恣爲淫樂日夜不已或規之曰此危道也不見夫所謂飛蛾者乎迷戀燭光不去甘於焦爛色之爲害不啻膏火也乃日崇無度後悔何及不聽未幾禍作身首異處

明嘉靖間權相嚴嵩子世蕃小有才知典故及邊事凡事能合上旨怙寵驕恣珍寶聲色極世之選臥而唾必以一美女以口承之方發咳婢口已早就之謂香唾孟又用錦罽織成雙陸點用美女三十人衣別二色世蕃每與客對藝喝點而美女自至其位謂之肉雙陸世蕃敗袁州守奉詔籍其家見臥榻下綾巾無數不省所用袖其一以問諸人俱掩口笑曰此淫籌也每與女合則用一而棄之歲終數之謂之淫籌世蕃多慾無子後伏誅

○鄞虞生少美丰姿而喜淫一夕忽夢被人攝至城隍廟前喝責曰汝過淫慾命鬼使撻至數十以懲戒之既醒兩腿潰青病遂死此淫慾過度更被神誅如此

心毒貌慈

註貌與心相爲表裏心喜則貌舒心悲則貌戚心怒則貌威心毒則貌猛貌猛人猶知所防避至於心懷狠毒貌飾

慈和則令人難測較之包貯險心者其陰惡尤深也死入地獄永墮三途安所逃哉

引經子曰巧言令色鮮矣仁

惡報李義甫貌極溫柔每與人言笑容可掬而暗藏奸險人因號為笑中刀後竄死

於雋○蔡元度對客滿面春風雖所憎者亦加厚無間人莫能測謂之笑面夜叉竟遭惡死○廣州蒙化縣丞胡亮從都督周仁軌征蠻得一酋領妻亮寵愛之以為妾其妻賀氏與之共處加恩撫恤畧無妬忌亮信之不為隄防及亮公出賀用火筋烙妾兩目迫令自縊給亮曰病亡後賀氏有娠備極痛苦產一蛇兩目無睛問智鑒禪師曰夫人曾烙女妾眼是以相報不可殺也賀欲棄之不敢乃潛養於衣被中數月漸大亮偶見大驚殺之賀氏目枯而死玉持堂解云包貯險心者令人難窺此則令人相忘也

穢食餽人

註餽人與人食也不潔之物暗以飼人是等人於犬彘人既噍之神亦怒之矣至於日用浪費無節以致臭穢委棄

是亦暴殄天物人間婢僕以家長不視庖廚多餘食饌以及臭敗穢惡誤委溝廁本人造罪召禍大半歸之家主予謹錄此俾賢達公卿士庶當朝夕檢點嚴禁婢僕一切飯食餽饌愛敬珍重勿致作踐自取罪戾且貽累家主慎之

引經禮記曰毋反魚肉

註母反者言已經口則不可反有妨於人况穢食乎

惡報瞿永壽販米為業紹興乙卯間米價湧貴永壽於路聞之即取田水澗米不知水方下糞少頃黑雲四佈雷霆大震永壽知罪自度難免因探腰間錢一串付同行人囑曰我家貧母老因多貪錢財誤取糞水和米既攪天怒死必不免煩將此錢歸奉我母子不終養悔無所及語畢雲收天霽夫糞水污米致干天怒若非一念孝心真誠早已斃於雷斧矣

○長洲沙家造牛車屋家僮阿關徐成饒餉傭工袁長亦在會每餉耕以食器置糞器內則穢雜食中又所餘飯濫飼鷄鴨則食雜穢中及成捕大鰻二條阿關烹之袁長聞呼而來有黑雲隨至未及水車屋中鰻乘雲去霹靂大作燒其屋三人對跪燒死手足俱燼獨存其軀時灰焰蔽天而屋旁遺飯一盂纖埃不染焉此以見神明亦甚欽敬穀食安可傲慢而污穢之乎○虔州吏欽利近村以一僕隨行僕索錢於貨主不滿意縛桑上灌以糞汁勒得千錢雷震僕死於普安寺前錢帶腰間遂入於肉皮蒙其上此穢食人也

左道惑眾

註道者人所共由之正路不出於正者即左道也三教聖人道雖不同儒家存心養性釋家明心見性道家修心煉

性總歸於使人遷善遠惡苟好爲詭異以惑人者皆左道也一爲所惑則同被誅殛如漢之張角孫恩盧循元末之白蓮教無爲教皇天敎涅槃教糴糴教者詭言入敎上等成佛作祖下等轉生不失卿相致令聚黨作亂及其事敗身首異處

引經書曰民無或胥壽張爲幻

論魏西門豹爲鄴縣令往詢民間疾苦民咸曰爲河伯娶婦最苦豹詰之對曰

鄴縣三老廷掾每歲賦民錢數百萬用二三十萬爲河伯娶婦餘者與祝巫共分先時巫行視人家好女云此當爲河伯婦卽令沐浴更衣治齋宮於河上設絳帷床蓆居女於中卜日浮之河行數十里乃沉豹曰至期來告吾亦往送屆期豹往河上三老廷掾豪長父老會聚千人大巫則老嫗也隨從女弟子十餘人豹曰呼河伯婦來見旣見謂三老巫嫗曰是女不佳煩大巫嫗入報河伯更求好女改日送之命吏卒卽擁老巫嫗投之河有頃曰嫗與河伯敘話何久也弟子趣之復投女弟子一人於河有頃曰弟子何久也復使一人趣之凡投三弟子豹曰是皆女流不能白事煩三老爲入白之復投三老於河豹簪筆罄折向河立侍良久旁觀者咸恐豹曰巫嫗三老不還報柰何復使廷掾豪長一人入趣之衆皆叩頭流血又投廷掾首事者一人入河頃刻豹曰主象起矣回報

河伯不娶婦矣。吏巫大恐，自是不敢再言河伯娶婦矣。鄴縣民咸頌西門豹之能爲民除害也。牧民者鑒之。

惡報隋煬帝時，唐縣宋子賢多幻術，樓上放光，變化佛像，自稱彌勒出世。又懸鏡空中，來謁者，令照來生作蛇獸形，教以禮拜許願。乃現人形，聚衆千人作亂，官軍捕之，前皆火坑，人不敢進。帥曰：此地素無坑，止妖術耳。及進，果無火，擒斬之。

○黃巢汴州功德山妖僧，能紙上畫人，散入人家，令人疾苦。又作甲兵騰踐，居人不安，贈金作法，則患立除。趨術者甚衆。滑州一僧同術，時王鎮守滑州，乃托祈禳道場，延僧數千，併牒汴州功德山一行徒衆赴之，分選爲首者，入於公衙，遂拷訊之。皆黃巢之黨，約以二州應賊，乃誅勦無遺。又妖言動衆，華林寺有鐵佛，長丈餘，內空忽相傳云：佛能言，士民雲集，施利委積。朝廷遣官徵驗，張輅請偕行。旣至，盡遣僧赴道場，輅潛進僧房，拷訊一僧，必以實告，乃便復命。汝等可以免罪。僧乃引輅行穴道，至鐵佛座下，有數僧在佛身中，乃知佛言皆僧也。輅奏之，詔誅首惡，妖言遂息。

○榆次桑冲，聞大同有妝男爲女，行淫之法，往拜爲師。將冒險絞刺，扮作婦人，因學女工飲食之事，卽往各處，聞良家有好女子，先於舍旁假作難婦乞食，漸投爲工作，或傳女工，遇晚同宿，因誘姦之。

不可誘者、用迷藥咒劫之、姦宿既久、又復別往、凡歷四十餘府州、縣姦淫無數、莫有發者、成化十三年七月、至普州高宣家、宣壻趙文舉欲姦之、用手一探、方知爲假女、執送官司、驗實凌遲、

○青城山道士有幻術、引富家及勛戚子弟、從遊於幽僻寺院、設帷焚香作法、巫山神女、及諸仙姑、應召而至、飲食寢處、與人無異、又於城中化出金樓、假以惑衆、信者如狂、蜀主命擒之、累月不獲、乃以狗血傾之、術遂阻、捉下獄訊之、曰、年年採民間處女、恣行採戰、死者無數、豪貴之家、多被淫污、乃磔殺之、

○侯元上黨人、以樵爲業、一日憇巨石下、喟然嘆其勞、石忽開、有道者出、曰、子何嘆也、元驚拜、道者曰、我神君也、憐子嘆、隨我入洞、光景非凡、令元跪受一書、戒曰、汝少有福、然多冤氣、宜謹慎、欲謁我、至誠叩石、卽出、若謀不軌、卽喪身、元出於靜室、演習一歲、能變化百物、役召鬼魅、草木土石、皆成甲兵、於是聚衆反、神君屢戒之、上黨帥恐生變、捕之、元持術突陣、先勝、後敗、酒醉被擒、以兵守之、枷索脫落、止一燈臺耳、後奔謁神君、怒責曰、庸奴違教、斧鉞及矣、石遂合、不復開、後術不行、率衆掠并州、爲官軍所擒、

○楊州便益門黃金壩、一鄉愚擔糞灌園、偶遇一異人、曰、汝終歲灌園、殊勞苦耳、吾有一術、可致富、授汝、因請至山僻處、盡授訣、回鄉、

愚忽狂呼踴躍、自稱都天神下降、大言不立廟祀、我此方無遺類、人因其愚、咸信之、先構席殿、衆稱之曰活菩薩、遠近聞名、男婦雜踏、往視不可數計、鄉愚終日默坐、不飲食、有所求、卜筮而已、一切募化、揚言免災、皆爭輸、如是月餘、官長皆知、太守金公往按之、擒出一鞫、便伏、立斃數人於杖下、餘党悉散、

○又有一道士能隱形、多淫婦人、公擒至朴責、了無所苦、已而自脫其形、公託以他出、徑馳詣其居、縛歸、用印於臂、然後施刑、隨聲呼嗥、竟死杖下、○福州王寰初有妖術、明季自稱無爲教主、常言九、九八十一之數、詭秘怪幻、說法隆冬、植生蓮華、或有飛劍、天書、從空往來、煽惑甚衆、一日聚衆、從天降下金印一顆於座上、寶色爛如、上鑄螭虎盤旋作紐、其篆文云、寶印八一、古佛親勅、普度西遊、違遭霹靂、衆取秤之、重八兩、內有一人、矚其置處、遂竊之、寰初失印、對衆言曰、在座必有無良之人、故寶印飛匿、若彼竊去、必有禍殃、竊者懼、而自首伏罪、尋至後座蓮花盆中、見印仰面安放、四圍蓮葉遮護、若隱若現、衆益神之、寰初隨調印色、以紙試之、遂透數十重紙、顏色如一、衆皆狂喜、敬信之甚、各求一紙供養、自是無論男女、遠近、皆呼寰初爲佛爺、叩拜施捨者相踵、順治十三年、事發伏誅、○沃啟鳳曰、奸徒聚衆、借名說法、漁色賺財、固應萬磔、而爲

所惑者聽其婦女入庵堂寺觀宣淫露醜傷風敗化豈盡無罪哉
大抵利人福人恩澤及人德教施人勸人行忠孝善事此卽正道
不可須臾離也若駭人欺人妖術惑人爲利賺人姦淫陷人便是
左道須速遠避於是備述正欲世人遇此切勿聽信附和一聽其
教明爲刑罰所加陰爲鬼神所譴促死奚疑蒞民社者卽當嚴刑
極之正法除之母猶豫姑息輕貸以致滋蔓則俗無邪慝而宇內
皆正人○顏茂猷曰得妖術可欺世者皆其前生積德極深故能
使今世人欽仰敬信惟不善用則自取禍耳古人云得隱形術三
年不試者必可登仙又云君有黃白之術而不輕用可以入道蓋
修真者以剗跡埋光度人救世爲主若仗些小伎倆眩惑人心便
是名利根未化去道遠矣况於爲非詐冒者乎取禍必矣朱璣贊
云奇袤之民周有禁防子不語怪恐其亂常仁義禮樂百王紀綱
日用飲食不過農桑文成五利見誅武皇

短尺狹度輕秤小升

註自此至採取奸利皆小人貪利之事十寸爲尺而度者又丈尺之總名也皆所以知長短也

秤能分輕重升以較斗斛先王立此皆以平人心之不平也今以
短狹輕小者與人勢必以長廣重大者肥己喪心害理自欺欺人
犯太上之禁致雷火之詠亦可畏也

引論語謹權量虞書同律度量衡善報唐李珣廣陵江陽人販糶爲業年十五父以年老使珣主其事

人來糶者授之升斗使自量不計貴賤每斗惟取息數文以資父母澹泊無求衣食自足父謂之曰貿易窺利人之常情吾生平不易升斗亦自以爲公汝今任之自量誠不可及然而衣食豐足豈非默助耶珣年至八十餘不改其業適宰相李珣出制淮南珣以犯諱改名寬李相下車數月夢入洞府見樓閣延連石壁光潤金牌首列李珣字長大尺餘視之甚喜有一童出自石壁珣問此何所曰華陽洞天此姓非相公乃江陽郃民也珣追旦遍訪得之詢以平日得何道術列名仙府寬辭不知珣問不已寬以販糶對珣嘆賞稱服寬壽百有十二歲卒三日棺忽開視之尸如蟬脫

○周才美爲子娶媳令理家政付以斗斛秤尺各易樣諭以多入少出之法婦不悅求去曰翁所爲逆天媳他日生子定不肖人謂媳所生恐被玷辱才美乃悟曰依汝言及今改之未晚也婦問用此幾年矣曰約二十餘載婦曰必欲留媳當反用二十年少入多出以酬前自欺瞞之數才美許諾後婦生二子俱登第

改悔報萬曆間揚州大南貨店其人臨死囑子曰我生平起家在此一秤子請問其故父曰此秤烏木合成中空內藏水銀秤出將

水銀倒在秤頭、秤入將水銀倒在秤尾、入重出輕、所以致富、子心怪之、而不敢言、父死、子卽將秤焚、毀烟中、化一黑龍、昇天去、越後子之二子雙亾、因怨曰、父用心不公、反獲平安、今出入公平、二子俱死、天道應如是乎、嘆畢、憑几而臥、夢至一所、如官府衙門、一官坐堂上、呼其名、諭之曰、汝父生平、以輕秤欺人、重秤肥己、所得雖多、亦是彼分中、所應得、倘能平等、則富厚應自悠久矣、但以欺心造業、獲罪於天、上帝乃遣二耗星爲爾子、迨其成人、將汝父家產蕩盡、仍繼以火、俾爾嗣絕、示報、今汝能改父愆、上帝乃將二星喚回、卽降好子二人、光爾之後、汝宜加勉爲善、毋得退悔、妄生怨尤、醒時記之、愈加力行善事、三年之內、果生二子、俱成進士、惡報廬州巢縣秦萬、以貿布爲業、每用長尺買、短尺賣、以此致富、雖勸不改、死後爲蛇、長丈餘、無目、在山林中被諸虫噴食、痛苦萬狀、一日託夢於子、言吾乃長短尺度之報、明日可到山南看我、子驚寤待旦、往覓山中、果見無目大蛇、遍身流血、家人以盆水飲之、飲訖、以身蟠曲、若有所訴、妻兒咸曰、我等回家、請僧懺悔、誓不復用長短尺度欺人、蛇卽躍起、須臾死、江山縣祝大郎爲富不仁、所用斛斗秤尺、大小不一、乾道八年、有道入過其門、戒之曰、汝宜用心平等、不可如是、倘怙惡不悛、必有

來取此四物者災立見矣一夕夢三青衣來言汝家秤尺斗斛安在夢中與之覺而急尋已失之矣因憶道人語災者火也卽徙室中盡藏於山磚庫內山忽裂開洪水湧出庫中財物隨流而下所居頃刻爲潭一家死盡只留一小兒至今呼爲祝家潭

○武進東鄉顧家用夾底斗出則加底入則去之後雷火震其居劈其床焚死置斗人隆慶三年五月初八日事

○謝秀林以短狹尺度與人以大器巨秤入已一日僭僕自帶升斗諸誑具往庄房出城數里雷雨黑雲追逐大响一聲秀林已震死矣屢葬屢爲雷發乃焚之腹中得一雷楔其報如是

○蜀人黎永政善造假偽斗秤人有以假斗偽秤爲囑者倍取其值而與之小民有不顧報應者往往求之一日司察神糾奏罰其二子並盲永政亦失明五指傷殘手節落盡而死

○**嚴**人生富厚陰注陽受公平正直得之則吉機械變詐得之則殃得之以險失之必奇財帛去盡災禍荐至悔之無及茲備錄善惡兩途報應如響倘有大斗小秤丈尺瞞騙者當觸目警心改過遷善以迓天休勿故犯罪殃幸甚幸甚

以偽雜真

註偽者假也以假物作真物如鹽攪沙酒攪水銀攪銅諸般詐偽獲利固倍損德亦多災禍立至亦復何利

引經禮記曰用器不中度不粥於市兵車不中度不粥於市布帛精麤不中數幅廣狹不中量不粥於市姦色亂正色不粥於市

善報李臻正直無私一日遇一道人自稱姓張名齊物授以黃白之術臻曰某命淺薄不願學也張大驚曰君之所見非吾所及於是抽簪引以爲劍劃地地開身入其中地隨閉合乃神仙也其後臻亦證果○孫蜃川尚書之祖爲人淳厚無機械是曰是非曰非鄉人皆取平焉一日偶賣物得銀陸兩則假銀也念此銀已不可用猶恐悞人至東湖乘舟撐至深處投之後子孫登第爲副使卽蜃川尚書是也此心恐悞他人卽呂祖不忍以此害五百年後人與夫孫叔敖埋蛇俱同一轍真可佛可仙的心腸受報寧有量哉惡報廬山有盧韋者市賣油燭以魚油雜置香油中致富一旦暴死其母悲哀夜夢神曰爾子以魚脂雜油中無論人食不宜且爲神燭腥氣觸犯神祇死尚受罪哀哭何爲○黃州渠以油爲業每作油時乘熱雜以便溺旣不防黠又多獲利家惟一妻一子子嘗告母曰爹身旁每有獄子抱枷棒隨後未幾子母繼死渠得惡疾死緣人買油供神食用故罪譴深重

○海鹽縣倪生每用朽木剉碎爲香貨賣一夜燒烟薰蚊星火入香末內起烟通室火焰不能出人屋俱燼世人方誠心焚香供養三界十方聖真倪乃以假水爲香賣慢神明火災宜矣

○虞孚販漆於吳有漆數百斤將行其妻兄語之曰漆葉熬汁可和漆人不知也孚乃多取漆葉煎汁俱載入吳時吳與越鬪商賈弗通吳需漆急吳僧聞漆至遠迎館之視其漆至良也約期允金來購孚大喜取汁和漆以俟及僧至見封皆新遂遲數日漆盡壞虞因大破財觀此則假偽實以速禍也可不戒哉

○俞朔用假銀壹兩八錢買四羊乃婦人不識也夫歸識之怒罵其妻妻忿縊死夫痛妻亡亦自縊未幾雷擊俞死四羊亦死蓋俞屍世間貨賣假藥誤人更甚張安國知撫州出榜戒曰陶隱君孫真人千金方濟物利生多積陰德名列仙班自古以來醫藥救人獲福甚衆曾見貨賣假藥積利起家自謂得計不知冥冥之中暗減其祿或天災橫禍或水火迅雷子孫破敗蓋緣求藥之人疾病危急將錢告買只望見效却被假藥誤傷致斃尋常殺一飛走猶有因果人命最重無辜被殺其恨何窮此真仁人之言也

採取奸利

註人不謀利何以治生不能無取但取必以正取以採言利以奸得推其用心干委百折忍刻無所不至矣此句與

上句相連如假貨假銀私鹽私鑄以及一切躡船頭撞水鍾挑米過付告旋狀撞太歲翻白眼拏訛頭明瞞暗騙等類皆是採取諺云越奸巧越貧窮奸巧原來天不容富貴若能奸巧得世間駢漢吸西風採取奸利而能長享此必不得之數也

引論語子曰放於利而行多怨孟子曰有賤丈夫焉必求龍斷而登

之以左右望而罔市利人皆以為賤

善報宋時鄉民某勤耕織或歆以厚利輒謝曰非耕與織未免

機心得財民不願也晚年遇白玉蟾化一道人來云喜汝實行真切當與汝吉地世享富貴子孫蕃衍民曰但得平穩足矣乃為點一穴去子孫至今蕃庶

無錫顧翁信字誠軒孝弟力田服賈吳門有韓某以金百三十鏹每鏹百兩附寄一日暴卒翁為經理後事護喪歸送還遺金其家以金多駭謂顧曰吾父財安有如許翁曰吾與若父夥而共分所獲之利也其家德之立像祀翁而早晚禮拜焉又少時寄食邵氏一日起早立戶外富室鄒公雲乘騎入城僕另一騎負筥以從筥重下馬少歇主人行遠倉皇上馬舍筥而去顧公追呼不及持筥立候良久僕號泣至公知筥是人所遺也曰吾侯子久矣輒還之

邵讓之曰、君寒薄如此、驟獲多金、乃棄之耶、翁不應鄒聞馳謝、傾折十之一、以贈却不受、蘇商泊舟河下、奇之、遂邀登舟、托以厚貲、客販湘湖、以女妻焉、生三子、懋章、盛章、榮章、並以貨爲郎、懋章公之子、可學、十九舉弘治乙丑進士、盛章公子可適、榮章公子可久、相繼登第、孫宸已卯鄉薦、鏞丁亥進士、燦已丑進士、蜚聲黌序者甚多、科第至今不衰、集美曰、此皆誠軒公不貪利之報也、採取奸利者、安能得利乎、

惡報浙江錢公布、少有名譽、中丞吳公延之訓子、公布力以開導爲任、中丞自喜得師、赴任京師、遂以子托之、錢乃搆一皮工之婦、誘至其家、方與對飲、皮工持刀突入、欲殺宦子、哀告、公布故意作歌過門內、大呼求救、錢假奪門入、勸令寫千金文券、宦子方出、盡以婦飾抵還、錢又恐嚇皮工、止與白銀數兩、令之夜遁、其實盡入錢私囊矣、三年內、並不教以義理、中丞回家、痛責其子、并恨錢而絕之、後錢以優等應試、江中被盜、碎其屍、妻子狼狽、不忍言也、金南枝爲富室子、恃力結交官府、人有訟獄、輒爲把持、官吏所得無幾、已獨多有所利、乃至銷錢造器、竭澤捕魚、人所不敢爲、已則擔當爲之、至數年、忽得惡疾、枯瘦如柴、作驢鳴而死、

○張奉素習刀筆、熟知境內田賦戶口、索派徭役、剋剥民財、凡官長

至輒召問之既而携手相歡終乃頤指唯命日教官長窮取民財官取其三奉得其七巡按唐公廉其狀命卒縛之械至途路縛者遂逸去時四野無雲忽雷震於東奉斃於西腹若剗五臟若剗人厭之弗為收焉

壓良為賤

註人家兒女良也為人奴婢賤也若本出良家而我以勢力強制之使為奴婢是壓良為賤也至買為娼罪尤重

詩曰民之無辜并其臣僕

善報隋末張道源辭官歸里唐高祖興拜大理寺卿時何稠得罪籍其家賜群

臣道源曰禍福無定安可利人之凶取其子女以為賤隸仁者不為悉還其家而與安全焉後官尚書年九十三子孫皆貴顯
害李大亮初破輔公祐以功賜奴婢百只大亮曰爾曹皆衣冠子弟不幸破亡吾何忍置諸役使乎縱遣之高祖聞之嘆美良久更賜奴婢二十亮悉使之還故里後位極人臣子孫蕃衍

○晉李矩字世迴元帝時領河東平陽太守時饑饉疫癘矩垂心撫恤百姓賴安寧焉會長安群賊東下矩擊破之得賊所掠婦女千餘人諸將以非矩所部欲留之矩曰俱是國家臣民子女焉有彼此即遣還鄉里後子孫世顯

○宋程彥賓進攻遂寧城下左右以三處女進俱有姿色時公方醉

謂女曰汝猶吾女豈敢相犯命三女出拜為嗣女及旦訪其父母還之各給白金二十兩聊為粧奩之資以誌相遇之緣三女拜謝而去後官至觀察使壽九十七子孫世顯

惡報浙省廣濟庫吏侵官銀太多無償府判王某乃拘其妻妾子女於官終難抵償命舟載於西湖供遊人作樂以貲納官不肖輩群趨焉鮮于伯幾先生樞作湖邊曲湖邊蕩槳誰家女綠慘紅愁羞不語低徊忍淚傍郎船貪得纏頭強歌舞玉壺美酒不須憂魚腹熊蟠棄如土陽臺夢短去匆匆鴛鴦鎖生寒愁日暮安得義士擲千金遂令桑濮歌行露後王之子孫亦有為媚者

謾驀愚人

註謾者欺人不知不見也驀者快捷伶俐詭計設騙令人墜其術中也究竟愚人不能報冥冥之中代為之報愚人

固恬然無恙而狡者災禍立至天惡狡詐哀憐愚拙信夫

引經

詩曰自有肺腸俾民卒狂

惡報有僧素無賴聞黃精能延年欲驗之乃置黃精枯井中誘一愚人入井覆

以磨石令其食盡黃精其人在井窘迫忽有野狐臨井告之曰我能通天者也但有穴孔目注視之則可飛出所謂神能出形也君其注視乎吾昔為獵人所獲君曾脫我故以此相報其人如狐言三日果飛出僧大喜謂黃精已驗乃別大眾負黃精入井約一月

開視則已死矣

○遂昌士人劉合峯言彼近邨有三人同行前臨一渡溪水漲急舟在對岸中一人素愚二人素黠誘使脫衣浮水取舟出沒湍流僅而獲濟復撐舟接度二人纔登舟愚者忽犯腹痛急跳上岸如廁二人撐舟揮手曰日已暮不能候子矣水溜舟橫遂覆二人皆溺愚者無恙

貪婪無厭

註以口取物曰婪言人之貪如口食物無有窮極老子曰罪莫大於多慾禍莫大於不知足夫人之心之欲豈有限量

知足雖貧賤亦樂不知足雖富貴亦憂不知世間萬事轉頭即空我之此身終歸寂滅所以不滅者惟此靈明一點與其至寂滅時萬般將不去惟有業隨身孰若於未寂滅時留幾分享用積幾分陰功惜幾分物力作幾分方便存幾分福量以為可久可長之計而區區財物迷而不悟為他做了許多冤家造了許多惡孽設計牢籠富積丘山一息不存終歸烏有披毛帶角累劫難填思及此貪婪亦奚益哉

詩曰大風有隧貪人敗類

論美味八珍一飽外無加焉美錦千襲一微軀不能勝也廣廈萬間容膝外皆

餘也秦娥越姬終難遍幸田聯阡陌埋骨一坵若夫委積愈厚籌

算愈叨、損人致富、召怨實多。○胡九韶家甚貧、課兒力耕、僅給衣食。每日謝天清福。妻曰：「三食菜粥、何名清福？」答曰：「幸生太平之世、無兵火之禍、又幸一家骨肉、不致饑寒、且榻無病人、獄無囚人、非清福如何？此真知足者。」

善報時苗爲壽春令、初乘黃犢車之任、歲餘生一犢、及去、謂父老曰：「是爾土所生、非我有也。」付民間去。後官墜而子孫亦貴。宋凌冲知含山縣、毫不妄取、滿任裝一硯、冲視之曰：「非吾來時物、命還之。」上嘉其清廉、命勅其子孫十代世祿。

惡報守備劉琅、鎮陝西歸、積貲豐厚、復於室旁建真君祠、日購爐火。方士知琅有玉絛環、價值百鎰、給令獻神祈福、遂併丹鼎竊去。有人題其門曰：「堆金積玉已如山、復向仙家學煉丹、金鼎未成拋白壁、真君原也愛絛環。」琅乃慚恨而死。

○常塗有外科徐、治富人江舜明背疽、索謝已許三百金矣。攻瘡旬日、法當潰膿。徐欲加謝、復以藥紙撚插入。江呼痛苦。徐曰：「當再付銀三十兩、痛卽立止。」江子大怒、必不與爭論。多時乃許其半。時紙撚已入一更矣。及拔出、血湧如泉、遂死。江子告於官。徐受刑將斃、行賄免償焉。未幾徐病痛苦、但云「江舜明勿打我、我固不是、令郎不肯添謝、殊不是、大叫數日乃死。」

○新昌令夏侯彪初下車問里正曰鷄子一錢幾何曰三顆彪卽發錢一萬買三萬鷄子命散各烟戶等以母鷄抱之數月徵鷄三萬隻每鷄錢三十文得錢九十萬又問竹笋一錢幾莖曰五莖又多發錢以竹成每莖徵錢十文諸凡貪鄙笑入秋毫後以受賄敗金銀無數俱籍於官

○嘉靖間都御史某巡按湖廣貪黷無耻圖利至民間糠粃併漬米水發猪與烟戶飼養賣市索價狗彘之行不可名狀後爲言官所劾籍其家流竄死於途

○箴沈鯉垂涕告戒曰語云極盛難繼持滿易傾天道乘除數有一定而善惡感召理尤不爽故善福者不必得隴望蜀只宜效履薄臨深兢兢自保尚須密自思念昔茅茨而今大厦昔僅一夫之田今連數井之壤昔猶奔走衣食今則安享厚糈吾又何求自今惟守理守法以上培先德下啟後人斯以退爲進以少致多之妙術也若猶貪得未已競進不休居已侈而猶振田已多而務廣強鬻不出其本心與值不合乎公道或逼債以傾人之產或牽牛以蹊人之田或縱牙爪於通衢或逞報復於私忿諸如此類不可勝言總之我漁利下人亦乘機以逐利我行惡下人皆借勢以紆惡致使孤獨鰥寡飲恨吞聲道路隣里旁觀側目猶且洋洋得意自矜

謀畧、豈知神目如電、法網不疎、巷議在前、吏法隨後、惡名一積、億世難除、衆指交加、不摧自仆、當斯之際、悖入者不免悖出、多藏者亦復厚亡、室雖廣、未獲寧居、田雖多、不能安享、身既窘迫、累及妻孥、名已僇辱、玷及父祖、雖至愚咸知爲左計矣、柰何惡濕居下、安危利菑如故耶、吾爲苦口發藥、逆耳進規、自揣杞人過憂、何妨、若秦越異視、則忍矣、○人能知足、則隨地可以自安、若復無厭、則求望曷其有極、富堪敵國、猶嘆一命之不沾、貴極人臣、尚恨九錫之未至、貪得如斯、主宰造物者、固已難矣、

李燾曰、余於貪、旣列戒、垂法矣、然貪者必嗇、茲併附嗇者、以備覽、昔漢時有富人、家甚饒裕、性極鄙嗇、有向之乞者、不得已入內、取錢十文而出、隨步隨減、止與其半、復囑曰、傾囊相贈、慎勿他說、恐相效而來、慳吝如此、後竟破敗、貧困餓死、吁、有錢貴施與、早知如此、則當散財發粟、賑濟貧人、不惟不致死、尚可益其富、後人宜鑑覆轍、以自新、毋效故智、以自殞、

咒詛求直

註咒詛、誓於神也、求直、人皆謂其理曲、欲借咒詛以白其

直也、此不待入廟投詞、凡忿爭時、號天呼地者皆是、世有一等人、明知所作非理、猶欲誓神作証、以塞謗、往往受譴橫亡、竟有如其所咒而死者、安得輕於咒詛、而不戒與、夫我之理本直、則

日久自明何須表暴如曲則自反有媿安敢對神按咒詛章有云四方八面受人咒詛一切凶惡之鬼皆得乘間伺隙行其禍害若非悔過遷善徒恃師巫祈禳未易解除也

詩曰君子屢盟亂是用長

論漢成帝幸趙飛燕燕譖班婕妤挾媚

妾聞死生有命富貴在天修正尚未蒙福為邪欲以何望若鬼神有知不受不臣之愬若其無知愬之何益故不為也上善其對憐之賜黃金百斤飛燕姊弟嬌妬婕妤恐久見危求供養太后於長信宮上許之成帝崩充奉園陵卒葬園中君子以婕妤知聖賢明哲保身之道也錄之以為咒詛者戒

兩起張中家父子兄弟侄以折筯忿爭輒指天地鬼神互相咒詛不數年死喪殆盡獨存一房乃平日退讓不動聲色者遠近無不恐怖

嗜酒悖亂

註嗜好也悖者反其常道亂者失其矩度也四戒酒為第一夫酒之為用祀神郊天祭地養老理疾行禮合歡吉凶

軍賓皆不可少但適可而止一至於嗜則沉湎而不知節以致氣昏神亂膽大心狂心志顛倒禮法喪亂士敗名官廢職農荒業商賈喪貲甚且損肺傷腸因之陷疾而死喪者多矣其可嗜乎

引經詩曰顛覆厥德荒湛於酒

論智度論中列飲酒過失曰心無節限一也財物虛竭二也衆病之門三也鬪

爭之本四也裸露披跣同於牛馬五也傴舞罵坐人所憎惡六也致物遺失七也隱惡盡說醒則追悔八也醉中失誤醒則慚愧九也力軟身疲十也氣色衝人十一也心志迷惑十二也不知敬父母十三也不知敬鬼神十四也不知畏人言十五也不知畏王法十六也朋黨醜虐十七也疎遠賢善十八也不守六情十九也縱慾敗度二十也俾晝作夜二十一也事業盡廢二十二也犯名教罪二十三也暴棄善法二十四也遠離涅槃二十五也種痴狂因二十六也身壞命終墮於惡道二十七也若得爲人心恒狂亂二十八也此二十八論人當敬持

善報南京陳公鎬爲山東提學善飲酒父慮其廢事寫書戒之乃出俸金命工人置一大盃鐫八字於上云父命戒酒止飲三杯此與陶侃遵母命全後官陞而壽考終

○晉陶侃飲酒有限殷浩勸更少進侃曰少時飲酒失德奉慈母嚴命不敢過限此遵母命節飲者也

○齊桓公飲管仲酒仲棄其半公怪問之對曰臣聞酒入舌出舌出言失言失身棄臣以爲棄身不如棄酒此戒酒明訓也

○閩士劉乙嘗醉酒與人爭妓既醒大慚乃籍古今受酒禍者以自警題曰百悔經絕飲終身此因飲過失而能改者也

○秦苻堅燕羣臣每以極醉爲限宦官劉整作酒歌曰地列酒泉天垂酒池杜康妙識儀狄先知紂喪殷邦桀傾夏國由此言之前危後削堅大悅書之以爲酒戒夫帝王猶知戒酒况士庶乎至於僧尼道家旣已出家尤當切戒者也佛不云乎降龍羅漢因醉頓失神通攘鷄比丘緣飲盡喪諸戒故如來立教一遇酒氣五百世感無手之報一日飲酒五百世招地獄之殃可不謹哉况酒爲色因尤當留意者

惡報趙昌言爲相日與董儼陳象酣飲人咸謂曰陳三更董半夜上怒皆罷職昌言貶崇信軍司馬○郭贇爲叅政入對酒氣薰蒸御座上怒官卽左遷○鄭昇之宣和間攝至冥司冥官責曰汝好飲必不盡瀝甚至淋漓幾案積已數石命吏押至一處有一大甕腐水令之呷盡驚寤○刁約有俊才劉沆爲集賢相欲引薦修起居註帝以其荒飲不准○蘇易簡爲學士生平好酒因衄血篤疾而卒○王全爲殿中丞自恃量高一日大醉臍裂而死

骨肉忿爭

註骨肉者兄弟及叔伯諸姪宗姓皆是忿爭者或爲錢穀田產或爲婦言屬惑獨不思不能友于兄弟是不能孝順

父母矣。兄弟雖嫡庶前後異母之分，總是同父一脉。至於承繼弟兄，總是同曾祖祖父一脉，何得異視？不能親愛叔伯撫恤諸姪，是不能孝敬祖父母矣。不能和協宗姓，是不能孝順始祖與高曾矣。以我視宗姓，雖爲疎遠，自始祖及高曾視之，總屬一體，非骨肉而何？可忿爭乎？當與第一卷友弟篇參看。

〔經引〕詩曰：棠棣之華，鄂不韡韡。凡今之人，莫如兄弟。

〔善報〕隋李知本，事親至孝，與弟知隱甚雍睦。子孫百餘口，財物僅僕纖毫無間。隋末盜過其門而不入，咸相戒曰：「毋犯義門。」

○唐張公藝九世同居，高宗幸其宅，問治家之法，對曰：「百忍爲本。」高宗旌其門，賜縑帛以獎之。○裴叔則營新宅，邀兄同遊，兄心愛之，而口不言，叔則知其意，便讓與兄住，後叔別構華廈，子孫蕃盛。

○李宗諤官翰林學士，子孫數世，至二百餘口，猶同居共爨，田園租稅及居官俸祿，皆積一庫，計口給餉，婚姻喪葬，皆出於公命，忠誠子弟掌其事，世守而勿替焉。子孫世世富貴不衰。

○明浦江鄭濂，自始祖至濂十一世，合族七百餘口，同居共爨，從未分家。人號其里曰義里。太守贈匾，天下第一家。朱太祖召問，對曰：「臣累世同居，今十一代矣。」上曰：「汝家共若干人？」對曰：「一千有奇。」上

曰真天下第一家也。勞之去時，馬太后聞之，謂太祖曰：「陛下有天
下以一人舉事，鄭某家千餘人舉事，不更易耶？」上驚。次日復詔曰：「
汝馭家有別道乎？」對曰：「無他，但不聽婦人言耳。」上大笑。適河南進
香梨，因賜二枚。濂雙手擎梨於首，出朝門，上命校尉覘之。至家叩
首謝恩，畢將梨漬水數碗，召族中千餘人，昭穆次序飲之。使者回
奏，大祖喜，特命簡其有才德者二十四人，授以官職。上以其能齊
家，必能治國。宗長鄭渙詣闕謝恩，上御奉天門，親書孝義家三大
字賜之。識以玉璽，此豈非和氣致祥之驗與？

惡報齊桓公五子異母，公薨，五子爭立，互相戰鬪，拋父屍六十日
不殮，蟲飛出戶。宋襄公因公子昭來奔，起兵送歸，與齊師戰於甌
遂，誅無虧及其黨易牙，立昭而還，是爲孝公。

○袁紹二子譚尚、未立，紹卒，二子爭立。王收謂譚曰：「兄弟手足也，譬
人相鬪，斷其一臂，曰我必勝可乎？」二子不聽。卒爲曹操所滅。
箴顧其言曰：「居家貴於能忍耐，尤貴於能解散。能忍而無處忍之
法，其失尤大。蓋人之作事，不能皆是，亦不能皆當。人意背後議，論
所不能免。若婦人從中傳述，又從而增易之，便成怨怒。惟高明有
識之人，置之不聞，則自不致離間矣。若一爲婦人言語迷惑，而杜
之不蚤，遂令兄弟叔姪隔屋連牆，老死不用往來，無子而不肯以

子為繼後甚有不恤弟兄之分養親必欲如一寧棄親而不顧豈親必欲均費寧停喪而不舉種種未可概述總緣婦女為異姓所出一旦會於一家舅姑妯娌皆假合相呼非本來天性故輕於割恩易於修怨惟高明之人知婦女終於不可化誨深與兄弟相洽便不致失歡則忿爭何自而來乎○人能融得性情上偏私便是太學問消得家庭內嫌隙便是大經綸忍字心上有刀君子以含忍成德災字川下有火小人以忿怒災身人安可不以君子為法而含忍以致和平

男不忠良

註畫已無欺謂忠行止端方謂良傳曰得天地之正氣而為人得人之正氣而為男子苟不能以忠良自效豈不負

此七尺軀乎

經引

孝經曰昔者至理上下一德以徵天休忠之道也

論忠者中也至公無私之謂良

易直也忠則必良為男子者無論貴賤皆當以忠良自矢

善報唐顏真卿生平忠直楊國忠惡之出為平原太守祿山反河北二十四郡或降或陷惟平原得真卿賴以無虞後陞尚書因李希烈陷汝州宰相盧杞謀害真卿奏帝言希烈悍惡非顏真卿不能懾服上使真卿往諭及至希烈積薪庭中曰若不順我汝當自

焚真卿宣布朝廷德意示以君臣大義然後投火逆黨驚異急救真卿作遺表自誤墓誌終不面賊脇誘百端毫不爲動因縊殺之時七十七歲朝廷聞之輟朝五日謚文忠後賊平遷柩還葬棺朽公貌如生加槨輿歸漸輕啟視之已空棺矣道士邢和璞曰此謂形仙也雖藏於鐵石中亦當劈裂飛去其後家人見公在同德寺殿上行走卽之忽隱乃知忠孝死後卽補仙階信夫

○范文正公仲淹生二歲而孤稍長晝夜手不釋卷數年遂精六經年二十舉進士判河中忠君惠民真爲天下第一男子官至侍郎善績昭垂名振一時景仰百代此忠良兼至者也

○揚州庠生蔣應參字三我幼孤而貧事嫡母以孝聞爲人端方正直幾微不苟自始冠至老未嘗一日釋冠對五經四書必歛容整肅待人以誠素奉佛戒殺放生自銘曰用儒治身用佛治心每出必携百錢贈乞人呼曰貧民辭色甚恭其制行類如此其先人早世祭必齋肅晨起恪恭展墓時節子弟咸往事死如生孺慕終身不衰忠以持已良以接物子名善字同菴丙子鄉試卷分詩四房忽從衆卷中徐徐長出房師驚異問之果有神助語氣呈定元選後同菴夢見天榜免難蔣善名在第一乙酉冬兵亂於夏間預携眷屬避難毘陵闔家皆得安康人皆以爲三我公忠良之報云

○楊璜字希周，當塗人。世居官坊之栗樹，璜持已甚正，不肯諂隨會。兵亂，璜曰：「吾祖宗在此，何忍棄去？」因匿妻妾子女於林中，以身守壠。兵見，墳上有衣冠人，奔執之。璜遂赴水，子甫十齡，自林間見父溺，亦號哭奔投於水。久之，父子兩屍携手浮出，人皆以官圩水爲曹娥。江云：妻陸氏痛悼幾絕，撫妾泣曰：「汝有遺腹，吾死誰爲撫？」自是晨昏哭夫畢，輒誠心念佛，祈祝生男。及歲暮，妾乃生女。陸氏泣曰：「無可復望矣。」族人咸欲分其產，族長不忍，議至小祥，屆期咸集焉。妾抱女臥，女呱呱哭不已。妾方昏夢，陸來抱女，溺手探之，其私處長出男根，旁尚有血痕，未民急呼衆共視，皆愕然。陸抱兒詣縣，張公取兒親驗，果然。始美璜忠良之報，此亘古異事也。敬錄之以爲欺孤寡圖利者戒，以爲不忠良者勗云。

惡報：宋葉得浮，幼時領祖母避盜，中途棄之。祖母爲盜所傷，嘆曰：「我不死於盜，死於孫也。」死而有知，當訟孫於天。後得浮問相士韓慥云：「君貌當貴，但氣色似有虧行者。」俟立秋後言之。越十日，得浮染病吐血，口不住叫婆婆饒命，立秋日遂死。

女不柔順

三從：婦人伏於人者也。幼而從父，出嫁從夫，夫死從子，是曰柔順。三從，婦人不取才能，不取膽識，不取學問，惟柔順二字足

以槩婦德之全矣。若不柔順，則才能膽識聰明學問適足長病根。

爲禍胎也豈婦道乎

經引 易曰牝馬地類行地無疆柔順利貞又曰坤道其順乎

論唐憲宗女岐陽公主工部尚書杜悰配也主素柔順拜起一用家人禮謂悰曰上賜奴婢不肯窮約事我皆奏返之乃自買微賤可制者悰惟閉戶讀書主職婦事悰出刺澧州遣人迎主郡縣殺牛羊爲數百人供具主從者不過二十人俱乘驢約至處不得肉食郡縣供具悉載還京師傳爲異事在澧三年主不與外事不識刺史廳階姑涼國夫人寢疾主奉藥必親嘗喪則哀痛如禮悰後爲忠武軍節度使所治許州房屋卑陋主居無正室處東偏屋凡六年諸貴戚始怒中笑主怡然自安後皆敬畏云

○漢袁隗娶馬季長女有才識季長家世豐臚粧資極盛初成禮之夕隗問曰婦奉箕箒而已何乃過珍麗乎對曰慈親垂念不敢逆命君若慕鮑宣梁鴻之高風妾亦請從少君孟光之故事斯言足尚可爲柔順之師法者若今時婦女稍有粧奩便凌虐其夫傲慢舅姑者如天淵之隔矣王命岳曰今縉紳女子入夫門挾勢驕如無人婦禮者視此當改觀矣

○宋司謂以布衣謁宋大祖反鎮外藩不得歸者二十六年翁姓欲

奪其妻莫氏嫁莫不許守貧候夫歸奉舅姑益謹勤苦自營及一子長延師嚴課晚年貲產漸厚舅姑漸老於是置備生墓造壽器衣衾預立嘗祭田數百頃皆出莫氏經營又創別墅以娛暮景松竹交映亭閣相連二十六年中一婚二嫁咸得望族所費不貲夫謂在官亦修邊幅及歸俱已皓首矣莫勸夫休官相與偕老林泉時皆號曰莫節婦云夫家貧而爲致富此固人之所難然才婦或優爲之至事親盡愛養之誠教子備父師之益此非深於德者不能聖哉莫氏非尋常柔順者可比閨中師範當時日俎豆之

善報昌化張氏兄弟俱未有子兄抱族人子未幾自生一子弟曰兄已有子盍以所抱與我兄以告妻猶在蓐妻曰未得子而抱之甫得子而棄之謂負義何且新生未必可保也弟請不已嫂曰重拂叔意寧以吾生子與叔弟不敢當嫂曰吾子爲侄叔之猶子也何辭之有兄之抱子長曰栩弟子次曰詡栩子樵樵詡子鑄鑑相繼登第此婦能柔順助夫友于之誼者宜其獲報乃爾

○薛女年及笄適父母淪亾二子孤弱媒妁議婚辭曰俟爲二弟娶畢乃可定禮後適倪氏于歸時集衆親焚香告天驗已所得粧奩以明其不欺既適之後敬夫育子勩業營墳家道興隆科第綿遠倪氏子孫則曰此祖母之澤也薛氏子孫則曰此祖姑之義也

○顏氏家訓曰婦主中饋惟酒食衣服之禮是職如有聰明才智但當佐夫子助其不及若凌駕其夫干預外政便是牝雞司晨鳴鶚長舌也近見人家婦女或挾制丈夫不敬公姑妯娌不和凌虐婢妾雖女子性劣亦由男子有以養成之語云教婦初來教子嬰孩凡爲丈夫者當事事諭之以理不可溺於床策之愛縱使嬌妬尤不可輕信其言凡事令之專制至於女子之未嫁者在父母朝夕教誨切莫順其喜怒今日在家事父母卽異日事舅姑丈夫之法今日在家待兄弟姊妹卽異日待妯娌小姑之法少有過差便當委曲開導萬勿姑息久之慈和樂易德器成自然矣

惡報無錫李大娘平日暴戾無和豫之色又與其鄰有私夫丁乙竟被謀死遂改嫁鄰人數月有娠期至不產腹中滾痛自恨曰冤家何日舍我腹中忽語曰我丁乙也冤死我汝當還命先且苦汝子索飲食騰上下痛死復蘇其鄰人爲修齋禳之語曰冤對必報旣薦度我去我去卽產血崩而死

○崇德張氏家貧食麥婦以麥不可只且夕怨罵鄰嫗勸之曰或貧或富一隨其夫食取充腹何必怨爲婦不聽怨聲不絕一日取麥晨炊悉化蜂飛去婦卽犯心痛數日死

○自古來夏妹與商姐已周襄姐皆天所主以人國教七非謂女當

道之得而拘束者矣至於公卿士庶之家狠妒於絕祀而不樂賦小星者此皆不知柔順之義深可痛惜哉

不和其室

註室者指妻室而言夫妻和好家道未有不興隆者但齊家必先修身其身不正無論愚者悍者必致不和即賢者

能者亦終成間隔骨肉參商乖氣致異所必然矣

經引**易曰輿脫輻夫妻反目**

論禮曰夫婦有別苟夫婦而無禮則淫僻之罪多矣然禮豈有他哉和而有節而已

善報劉廷式登第所聘已雙瞽矣女家力辭劉曰失明於定婚之後義不可棄此女吾不娶將安歸焉爰擇吉成禮相敬如賓生二子皆進士此和氣所以致祥也後瞽妻死廷式哭甚哀今人嫌妻貌醜而不和者鑒之

○明陳邦佐以妻不協於母議出問唐一菴答曰大孝敬母亦和妻豈以一時偶失母心便成棄他日母追悔時汝尚得為孝乎只宜隨事訓誨纔是良策未幾婦姑相協邦佐早世家貧妻堅守其節勤謹持家織紵奉姑姑死盡哀盡禮後家道甚裕人皆以唐一菴一言之力也後一菴累世殷富且壽

○荆山士人張洪仁生平方正一妻五妾皆無怨言人問其故答曰但令新無間舊人心自安耳一門雍肅咸臻壽考

惡報裴章河東人父裴胄曾鎮荊門州州僧曇炤道行甚高能知休咎章幼時爲炤所重言其官位過於父弱冠父爲娶李氏女章從職太原棄妻於洛過門而不入別有所挈李氏自憾命薄褐衣鬚髻潔身修行蔬食讀佛書又十年胄移鎮太原曇炤隨之見章叙舊炤驚吁久之謂曰貧道五十年前曾言郎君必貴今削盡何也章以稍薄於妻告之炤曰尊夫人魂訴上帝以罪處君矣旬日後爲强寇以刀劃腹於浴堂五臟墮地而死因婦怨無終天亦爲之動怒然李氏尚在而裴章旣削壽祿又死非命報不啻數倍其值矣薄倖郎視此能不寒心

○洛城王八郎性克好毆妻昵一妓家貲蕩盡其妻旣迫饑寒毆之愈急妻不得已托親鄰處分八郎令妻異居自與妓同室無何身病產絕妓竟去乃復投妻妻避之八郎暴死妻亦卒親鄰爲置尸一處至夜忽聞闢罵聲啟戶視之二尸反背側臥因知處室家之問不得其道遇妬悍則任其凌駕值長舌則任其唆使及娶醇朴無能者則又不爲其夫所禮吁人於井臼之間使其有怨嘆之聲尚得稱爲丈夫哉

○黃允黜妻夏侯氏婦謂姑曰今當見棄方與黃氏長辭乞一會親

忠十五事遂越席登車朝廷聞之先以此坐廢

大抵王化首重閨門天子庶人皆然身不行道而又棄妻太上所謂無行於妻子者也既無行則不能刑於妻子此不和之由也凡有妻室者宜自慎焉

不敬其夫

註夫者婦之天終身之所依歸禮云夫婦相敬如賓其不敬者非由頑劣性成卽是淫蕩狠妒凡作女身多因風譴

若更侮夫寧不墜惡道乎

經引

孟子曰必敬必戒無違夫子

善報漢孝婦忘姓氏年十六而嫁未

幸有老母無兄弟子姪供養吾若不還肯爲吾養母乎婦曰諾夫果死婦養姑紡織以爲家業終無嫁意居夫喪三年父母哀其少而無子命彼嫁孝婦曰夫去時囑妾供養老母妾既許諾若不全何以立於世欲自殺父母懼聽其養姑二十八年姑八十餘乃終盡其所有以葬之終身守節奉祭祀淮陽太守以聞朝廷旌曰孝婦賜黃金二十斤

○唐房玄齡布衣時病且死謂妻盧氏曰吾病不起卿年少不可寡居善事後人盧泣入幃中剔一目以示信玄齡疾愈後歷至宰相○崇國鄭夫人歐陽修之母也崇公舉進士再任推官卒修甫四歲

家貧母自力衣食以供修學親授之書嘗大雪夜撥灰畫字以教居恒泣告修曰爾父廉而好施吾不及事舅姑然知汝父之能養也吾不能知汝之有成然知汝父之將有後也汝父居喪踰年吾方于歸每祭必涕泣或遇酒肉必涕泣以不及養爲恨始以爲新喪適然耳乃其後終身皆然以此知汝父之能養也汝父爲吏嘗夜視刑案屢嘆曰吾求其生而不得爲可哀耳回顧乳母抱汝立於旁指而言曰吾命宜早歿恐不及見兒之立也當以我語告之其教子弟率由是以是知汝父之將有後也於是修感泣勉學至舉進士貴顯節儉砥以忠直卒爲賢相母累封越國太夫人顏茂猷曰教子成名方是敬夫實際如歐母者真可母儀天下後世矣

○黃觀安慶人狀元及第官至學士及靖難兵至觀已死一妻二女俱被執有旨配象奴妻詭言有金若干寄城外至親家吾母子全往取則得不然必爲所匿象奴利其有與俱至城外妻云兩女當以衣裾相連結恐稠人中迷失奴許之女亦不解母意比至江邊則推二女俱溺死後以全節追封焉

惡報宋厲氏嫁曹生不睦離歸再適曹詠爲鄞州守元夜張燈州治曹携家來觀見厲氏服用精麗私謂母曰渠合在此居享富貴吾家能留乎莫息久之後詠曹貶卒二子不肖家貧不能給朝夕

厲氏無聊訪親舊過四明里見原夫家門庭整潔因自悔曰我當時能自安於此豈有今日因淚數行下

楊志堅嗜學而貧妻乃索書求去志堅以詩送之妻因持詣官求

信璽時元魯公為內史以其敗壞風俗夾杖二十任改嫁因憐志

堅清貧贈絹及布米署為軍官為續娶美好前婦亦不得善終焉

每好矜誇

註矜者自是也誇者自大也總是驕傲之意人之謙者福澤必深厚其器量大也人之盈者福澤必減少其器量淺

也况所謂矜誇者不過恃其富貴才能學問以富貴驕人固非美事以才能學問驕人為害亦不小矜誇之所以取禍者皆由一念驕心害之也易曰鬼神害盈而福謙人道惡盈而好謙謙尊而光然則人安可矜誇以干鬼神之怒而為人所惡乎

經引

易曰謙謙君子有終吉書曰汝惟不矜天下莫與爭能汝惟不伐

天下莫與爭功

善報晉唐彬與王濬伐吳先驅所至皆下度吳必降未到建業二百里彬詐疾不行已而先至者爭財後

至者爭功獨彬不與後王濬王渾忌功相爭反以得咎乃知彬之器量宏遠矣帝論功彬居第一爵當冠羣臣○宋曹武惠名彬克江南入閣門見帝止稱奉勅江南勾當公事回時人多其不伐爵

賞居人先焉。○文潞公至和中首議以英宗爲嗣及潞公輔立神宗問當日建議之人公但以韓琦對毫不及已上益重之

惡報石崇與王愷鬪富誇示奇麗愷作絲步帳四十里崇作錦步帳五十里其他珍異之物莫不爭勝晉武帝以外國所貢火浣布衣著幸石崇第崇聞故服常服而奴僕五十人皆衣火浣布迎帝後獲罪滅族

○金陵張允懷以畫梅遊蘇杭間好修飾雖行裝必器物皆具一夕汎江而下月明風清艤舟金山之麓出酒器獨酌醉吹洞簫自娛夜深爲盜所窺殺允懷於江盡取器皿去視之皆銅以泥金也此老與石崇皆矜誇報也夫蓄德深厚原非局量褊淺者所及崇允欺詐適以取禍蓋矜則妄妄則肆誇則誣誣則詐皆犯太上之訓指揮湯胤績有英才詩亦雄健有氣然性傲慢自好上人每言才兼文武可當一面人因以湯一面呼之後爲陝西叅將與賊交鋒一箭中喉而死人遂號曰湯一箭

箴顏茂猷曰伏羲萬世賴其文字神農萬世賴其醫藥堯舜萬世賴其文明禹萬世賴其平成稷萬世賴其稼穡契萬世賴其人教伊尹興商周公輔周孔子爲萬世師皆古大聖人曾矜誇乎等而下之歐陽永叔不誇文章司馬君實不誇政事

○謝良佐與伊川遊別一年忽得相見伊川曰利別一年做得甚工夫謝答曰只去得一箇矜字曰何故曰仔細箇點一生病痛盡在這裏能攝服此病方有進步伊川首肯

○人凡事不宜自滿足當有些不足却好纔足却有意外之虞○蓋世功勞當不得一箇矜字彌天罪網當不得一箇悔字

常懷妒忌

註妒忌上人自無而中人不免妒者陰頑如石不可化也忌者只知有己不容物也故見人富貴功名則妒見人榮

華功業則忌總是局量褊淺所使至於婦人其妒忌尤甚爭寵構怨往往禍家絕嗣陰鷲招罪不可勝言故曰女無美惡入宮見妒士無美惡入朝見嫉豈知男女心懷妒忌者皆墮三惡道地獄餓鬼畜生

引經詩曰螽斯羽詵詵兮宜爾子孫振振兮

善報蘇鮑妻女宗養姑甚謹蘇任衛三年娶妾妻姒

謂之曰昨聞汝夫再娶女宗曰婦人以專一為貞以善從為順豈以專夫之愛為善哉夫禮大夫三士二今吾夫士也有二不亦宜乎且婦有七出妒為首吾姒不教吾以居室之禮反欲使吾有見棄之行乎不聽事姑愈謹令尹宋公聞之表其廬曰女宗朱璣誌曰愚嘗論次女宗竊見古今以來賢婦孝婦節婦義婦智婦才婦

更僕而不能數也。則古文王后妃而外，不妒忌者，惟見一女宗焉。倘有心世道，廣採搜羅，再有所得，亟表彰之，幸甚。

○漢順帝梁貴人，嘗接旨臨幸，從容辭曰：陽以博施爲德，陰以不專爲義。願陛下思雲雨之均，俾小妾得免於罪。此豈惟不妒忌，且能逮下，洵可比德太姒矣。帝更加恩寵。

○歐陽公爲翰林時，常有空頭門狀數十紙隨身，或見賢士大夫稱道人物，必問所居，書填門狀，先往見之。果如所言，便爲延譽，未嘗以祿位驕人。不惟無妒心，且切於薦賢，休休之量，宜乎位高壽永。**惡報**歙縣林茂，無子，娶妾歲餘生子。茂口有子萬事足矣，名曰祖胤。乃外出行商，囑妻善視其子。妻口諾而心不然，令妾置兒地下，時擲飯一團教兒以口就食，更名狗兒。呼之輒應。妾或抱兒，妻怒甚，擲地。三歲猶扒沙地上。夫歸視子，妻頻感曰：家門不幸，生子類狗。茂怒，踢死。妾畏妻不敢言，痛心自縊。夫欲另娶，妻曰：君勿再娶，倘生子如前，柰何？夫曰：再如此，天也。未幾，妻忽瘋癲仆地，數日飲食亦如其子。茂泣曰：吾子如此，妻又如此，天之罰我何慘也。隣人爲言其故，妻氣遂絕。

○縉雲婦朱姓，悍妒，從嫁婢有姿色，恐夫寵之，每日箠楚百端。一日，縉雲上，有長車，朱怒，欲冀身無完膚，比死，斷屍置湖中。越歲，其婦孕。

在床病魔時見故婢以手刺其心痛如刀割呼號求救聲徹四鄰其魅去來無定婦之兄弟徧請師巫治之巫至則有大鳥數十奮爪搏風大號人咸震恐婦如糞廁已爲婢殮

○明正德中江陰尚書徐問無子夫人奇妒不容納妾公嘆曰使問有子爲乞丐人呼之曰此尚書徐問子吾死亦無憾上聞而憐之召問夫妻於便殿置酒一器上諭婦曰汝妒不容夫納妾生子能改卽止不能則飲此婦叩頭曰妾命如此不如無生一飲而盡上嘆曰誠無如何矣問遂絕嗣妒婦寧甘絕嗣亦其夫前生造業應犯此報凡人當晝勤三省功深行滿自能回天挽日不致無嗣安得逢此妒婦哉雖曰天平亦人事也以上種種諸案皆爲惡婦而懲凡爲女子在家時父母兄弟卽以爲婦之道教之切不可姑息長其惡性已嫁則夫當朝夕訓戒從中調停感化則妒忌之心自止切不可漁色宣淫致令河東獅吼則正身以齊家之道其責端在於已

○釋子僧明琛經典雖富每以妒忌爲心一日同伴三人止一林下琛曰今日內熱在此便解衣赤臥翻覆不定須臾足合變爲蛇尾乃曰我生平見人出我上便深妒之今業報至矣倏忽間身俱爲蛇惟頭未變俄作蟒頭長五丈舉首四視目如火光趨谷而去同

伴眼見斯報遍傳於人

無行於妻子

註君子必正心修身以齊其家無行於妻者或刻薄寡

恩或狎昵無度或縱妾凌妻及小人出妻之類無行於子者或姑息太過或督責太苛或廢嫡立庶或溺愛不均及表帥不端之類自己不正何以責備於妻子哉不知妻者我之敵體我一無行使之身處深閨欲去不能欲往不可抑鬱憤怨何以堪此至父之於子尤當教之以道古語孔子家兒不識罵曾子家兒不識鬪習慣成自然也又曰養子弟如養芝蘭既積學以培之又積善以潤之父子間不可溺愛小慈自少律以嚴繩以法則長無不肖之悔又曰人有數子飲食衣服之愛不可不均長幼尊卑之分不可不嚴賢否是非之迹不可不辨幼示以均則長無爭財之患幼責以嚴則長無悖慢之患幼教以分別則長無匪類之患由此觀之待妻宜敬而和待子宜嚴而正苟不以禮待妻則失倡隨之義不以道教子則傷天地之恩不義不慈總曰無行

經引

孟子曰身不行道不行於妻子詩曰刑于寡妻

善報張永錫微時依徐之美滕縣吉

老見其淳厚許妻以女而未聘也永錫少年登第京師權貴就永錫焉永錫皆謝絕歸娶吉氏于歸數年卒永錫漸顯吉氏次女雙

警永錫欲納婚吉氏辭甚力錫曰予微賤時荷公大德尚未圖報次女非吾誰肯顧者意極誠確吉氏難却從之錫敬待過前妻生二子警妻又歿吉有幼女視錫年遠吉意甚堅欲歸之以報德又生二子後四子皆貴此皆張公先能有行於妻乃和氣致祥而貴子聚於一門也

○鄭叔通定夏氏女爲婚後女病啞諸親皆勸通別娶通曰吾若不娶則此女遂無所歸且定婚於未啞之前棄啞於已婚之後豈理也哉遂娶之通入太學登進士啞女生一子亦登第顯宦

惡報涿州王瑤溺愛二子養成惡性後不能制告子不孝二子俱死於法後瑤死至次年二月十五夜城隍道士劉進聞喧鬧聲見王瑤執狀求清明祀城隍怒曰汝自無行有子不能教訓俱死非命誰供汝祀不准瑤大哭而去

○顏茂猷曰人生莫作婦人身百般喜樂由他人彼離親別愛生死隨人所主惟一夫耳饑不獨食寒不獨衣舍其身而身我舍其父母而父母我或遇遠旅之商游學之士孤房獨宿寒夜單衾豈易受哉我則薄倖委身外舍鍾情花柳戲弄如狂或一旦知遇姬侍盈庭罔念結髮恐懼與汝安樂棄子吁嗟何待人以不怨也長舌之婦恣意憑陵失行之女忘身撒潑則亦已矣若乃事舅姑睦妯

娼和姑姪以及前後嫡庶間人各有心衆皆爲政其憂煩展轉忍辱吞聲殆未可言而貧窮顛覆之家晨夜無炊針指自活亦不能殫述豈其望我終身而中道棄之則情理謂何哉此卷耳東征之詩柔順婉致摹寫逼真爲王化第一義而樂妻子宜室家順父母真吉祥樂事哉

○顏氏家訓曰愛子不均古今通弊不知賢可愛愚亦可憐有偏寵者雖欲以厚之實所以禍之其叔之死母實爲之趙任之戮父實爲之劉表之傾宗覆族袁紹之地裂兵亾可爲明鑒

○司馬溫公曰頃見大夫其先世亦國朝名臣家富而鄙斗粟尺帛必封鎖內府其鑰則晝夜佩於身夜置枕下病將絕子孫竊鑰取財復甦求鑰不得憤恨而卒子孫爭匿其財以致鬭訟雖處女亦蒙首執牒自許於公庭以爭嫁賞爲鄉黨笑夫財固人所不能無如太多亦爲累使子孫果賢豈粗糲不能自營若其不賢雖積金奚益且人當年老時所有家財應均分子孫及未嫁女之粧奩而嫁女之遺念逐一佈置庶免後日爭競不然亦可謂無行於子矣

失禮於舅姑

註舅姑俗呼公婆也婦事舅姑一如子事父母或少失禮卽爲不孝罪通於天必爲雷斧所殛蓋女子出嫁後

春秋第百不養父母而娶舅姑清明祭掃不赴父母之墓而赴舅

姑之墓先王制禮如此若曰婦人從夫以舅姑爲父母故律例忤逆公婆與忤逆父母同罪王法如此陰譴更嚴爲婦者宜冰兢也

引經禮記曰婦事舅姑如事父母每事必請命於姑

善報徽州李氏名善瑜適葉元贅子侍舅姑甚孝家貧自爲女工易食奉養舅姑日夜祈天願身代姑疾一日遇異人卜云姑當延壽一紀李氏二子俱一品官後果然○古孝子姜詩妻龐氏奉姑尤謹姑好飲江水龐出汲遇風還遲姑因渴怒甚詩遂責妻遣之龐氏不忍去寄居鄰孀晝夜紡績日市珍饈托鄰母以其意遺姑久之姑怪問母以實告姑感悟命還姑嗜魚鱸又不能獨食夫妻勤力供奉請鄰母同膳赤肩經詩里疾馳而過曰驚犯大孝必遭天譴吾輩何敢插箭爲護其家朝廷聞其孝拜詩爲郎中

○鄭義宗妻盧氏畧知書史事舅姑盡孝一夜有盜數十人持杖直入家人悉奔去惟姑在室盧冒白刃至姑側被賊捶擊幾斃賊去家人問何爲不逃盧曰人所異於禽獸者以有仁義也鄰里有急尚當赴救况於姑乎萬一姑受禍吾何敢獨生後生子皆貴盧氏受誥封焉人以爲遇患難能不失禮於姑之報云

○崇禎五年淮安山陽縣毛繼宗妻馬氏天性至孝姑年高病篤毛

又運糧赴京婦沐浴更衣夜深叩天代死取刀刺脇扯出肝尖兒忽呼恐驚姑醒遂以帕掩刀口入撫兒恐微肝不足以愈姑虔禱再剖時天尚未明星皆燦爛炤婦之身光如白晝復取肝一葉卽和羹進姑食之甘美問何物婦詭言鄰家饋鹿肝姑盡食之病愈時婦瘡口不痛但血跡難掩小姑驚傳姑知其救已一時士夫合奏上聞未果有徽州諸生江天乙註奇孝驚天集按天乙字文石卽同其師金聲號正希先生從容殉國難者文石祖母亦剖肝救姑與馮氏異時而同心皆受優獎焉

○集美曰忠孝本性生愚忠愚孝可動天地泣鬼神故婦人之於舅姑以人合者也子之於父母以天合者也未有子不孝而婦能孝公姑者故凡婦之失禮皆子有以致之而不早爲教訓之過也帝天降罰豈盡責之婦乎爲人子者切警之

改悔報鄭邑支祖宜妻喻氏姑黃氏老病失明性褊急喜潔難事喻少年勤儉恭順事姑無間夫因酒醉誤傷鄰人兩齒求免刑責盡以喻嫁貲償之喻無悔怒一夕夢神告曰汝前生爲牛客妻以久病淹滯姑日進食汝以口苦厭食反嫌其煩哭而罵之臨死呼天曰年七十者不死我方三十而死天乎胡不平汝家司命奏帝賜命焚女而氣已絕事未之行案牘仍在今當宿業決案汝應死

於雷斧之下以汝今生孝德故先期告汝喻驚寤中夜號泣明晨沐浴更衣自炷香立於屋南大樹之下仰天叩曰新婦之死宿業當爾但念夫貧姑老誰爲俱事一也父母自小教訓今被天譴爲父母戮二也身有孕旣七月矣萬一得男支氏有後三也乞少延三月分娩而死時遇梓潼帝君察知其情乃奏准取里中凶逆者代之富人張實妻馬氏淫悍背逆事姑無禮卽遣雷神焚之而喻氏獲免焉數月生子奕世富貴以斯知天鑒之難逃而悔心爲善者能轉禍爲福也但爲夫者皆宜將此數案勸諭其妻及衆婦女皆當爲善不可爲惡云

惡報大業中河南有婦養姑不孝姑兩目盲婦以丘蚓爲羹食之姑怪其味竊藏一片以示兒兒見號泣將繫婦送縣俄而雷霆大作忽失婦所在尋見自空中墮地衣服手足如常而頭變爲狗猶能言語自云不孝於姑爲天神所罰流徙州縣示警不孝之人數年乃死

○處州張媪子早亡媳錢氏饒奩粧錦衣美食不問姑饑寒且加罵詈鄰嫗邀媳往親處姑在家素敬僧道道人募齋接入與食令速去恐媳來知道者曰我不白食爾飯留小衣相酬錢氏歸覓飯姑低語齋一道者贈我一小衣錢奪去曰偏爾穿得我穿不得卽穿

於身俄而兩手着地口作牛叫張呼人共碎其衣牢若牛皮不可破遍身似牛惟頭未變後數日死

○順治庚子年常熟某婦甚妒悍慢其姑一日婦切菜指姑罵曰恨不得卽以此刀斷汝頭言訖卽有黑氣繞空大雨如注有神提逆婦髮擲跪庭中霹靂一聲其婦衣服身髮盡皆焚燒身不卽死後鄰佑請仙者叩以婦事神批云彼不孝於姑故得此報又問不死之故又批云彼夫好打鳥銃婦曾勸止之上帝以其一念好生倖免不死而懲戒之也

○婁道者漣水人出家文殊院多道行異跡不與人接有求見者輒謾罵中其隱過多慚去一民婦贊帛請見道厲聲曰若事姑有過見我何爲不希汝物也可抱着柱婦不敢違旣及柱卽旋柱疾走若有牽曳足不得停自晨達午不解衆鄰爲求免道者曰婦嘗令姑推磨故薄以示警今縱汝去當改過孝順後婦恐懼力改前非

輕慢先靈

註先靈謂亾過祖宗考妣輕慢謂祭祀有缺拜掃失時殯殮非禮居喪違制安葬不速之類而停棺不葬尤輕慢之

大者夫死者以土爲安世俗信地師言旣限年月日時又卜山向不利有貧欲葬更俟富貴及子孫益衰反不能葬者有互相推諉惑於房分之說久停不葬者更有葬後不腫墳前不躬祀事者均

謂之輕慢要之卜葬地無水蟻即可營穴古云穴在人心不在山福人居福地豈可爲子孫之故而久淹親柩致親不能安土誠罪之大者

引經禮記曰祭不欲疎疎則怠怠則忘

論夫人生世上必先種德澤積陰功行善不倦以基螽斯之慶

且欲得子孫以爲祭主必先安妥祖宗之靈於地下語云龍穴非遙只是財存方寸地牛眠在邇空勞踏破嶺頭雲兩語極當世人若不修德以致絕嗣此輕慢先靈罪之尤大者至於爲祖先卜宅兆乃孝子慈孫之心重親遺體使他日不爲城邑道路溝渠足矣有惑於風水之說貪求吉地至數年不葬親者有旣葬不吉一掘未已至遷數次者有因爭地致訟未入土而家已蕭條者有兄弟惑於各房風水之說至骨肉化爲仇敵者年復一年幾無安葬之望一遇水火又有焚溺之憂凡人兄弟房分必多若一房不利卽不肯葬噫爲父母者皆以子多爲幸今若此則是增一子反增一日之暴露尤不若少子者得早歸泉壤矣夫子孫各有福祿且各有行誼真中所以償之者毫厘不爽豈可挾私見致久暴其親况塋後砂水變遷陵谷易位造物於人豈可一端盡哉

善報何從義延安洛川人祖良祖母李氏偕亡從義廬墓旦夕哀

慕不脫經帶、不食濃味、惟啖蔬糲、事父母至孝、伯祖叔祖、伯祖母叔祖母、叔父叔母皆無子、比其亾也、從義咸爲治喪、塋築高墳、祭奠盡禮、後得大富、子孫稱旺族、

○甄恬字彥約、中山無極人也、父標之、州從事、恬少喪父、哀感如成人、家人矜其孤、以肉汁和飯飼之、恬不肯食、八歲問其母、憾生不識、父悲泣累日、忽若有見、言其形貌、母曰、是汝父也、時人以爲孝感、所至後官至安南行參軍、

○蕭鏗字宣儼、齊高帝十六子也、生三歲喪母、及有識、問母所在、左右云、早亾、便思慕、蔬食悲號、嘗祈請幽冥、求一夢見、至六歲遂夢見一女人、云是其母、鏗悲泣、向舊左右說其容貌衣服、皆如平生、聞者莫不欷歔、永明十二年爲南州刺史、都督二州軍事、皆思親誠敬、不犯輕慢之報也、禮記曰、齋三日、乃見其所以爲齋者、又曰、孝子將祭祀、必有齋莊之心、此甄蕭二公所以未識父母之面、尚能感而見之、而終日聚首者、生不敬而死卽忘焉、可謂人乎、

惡報羅輩、大觀間遊太學、有神祠甚靈、輩每以前程祈禱、夢神叱曰、子父母久不塋、已得罪幽冥、安問功名、輩曰、某尚有兄、何獨受罪、神曰、子爲儒者、明知理義、子兄碌碌不足責也、夢覺大恐、是年果死、比安塋、不速之報也、

○孔損丁母憂既葬歷官至秘書丞始歸焚黃其母忽現身責曰汝棄吾去盜發吾塚至折吾臂歲時祭享寄二女家爲子當如是耶陰司本欲罪汝以警世爲汝居官清廉方釋汝罪此後切須勤視墳塚春秋祭掃以寧山神亦安我也夫人子葬親後清明仲秋二祭外餘時俱置親荒圯爲孝子者思親之心既切則餘閒之日亦當詣親塚一瞻視之於親豈不加慰乎

○箴鄭漢奉曰此心開百代之祥穴在人心不在山金鎖玉鈎豈必問平陂於馬鬣牛眠龍角何嘗恃推步於雞丸故楊少師曾祖及祖惟救溺人劉珣之母罄奩飾代贖徒罪吳都憲父曲處代百姓完官糧皆得吉地下兆安葬如此方爲不輕慢先靈

○桂陽林氏舊族也無子繼葉氏子爲嗣一日祀先林偶有疾卧令嗣子主祭睡夢中見祠堂赴享者皆村鄙男子多赤膊持刀婦人衣服村俗其衣冠濟濟者咸立門外不進林大怪之後思葉之先世本屠戶今用葉氏子主祭乃葉先靈而林氏不至李燠曰人之有子猶樹之有根數千百年傳至於今一旦斬絕必自己心源處差錯祖宗造業之報以致有此世人多繼立人子思接續宗支由林氏祭祀觀之此點骨血畢竟假借不得以外姓繼子主祭亦輕慢先靈之大也

違逆上命

註胡嘉棟曰上命如君命臣父命子將帥命士卒官長命子民家長命僕役之類分宜遵守縱使命未當亦須委婉

如合道理安可違逆九幽經曰昔普掠獄中有諸罪驅上刀山中有一人踐鋒履刃了無所苦北帝異之天尊曰此人前生曾受九真妙戒救苦真符吾故以神力覆護一者敬讓孝養父母二者克勤忠於君上三者不殺慈救衆生四者不淫正身處物五者不盜推義損己六者不嗔克怒凌人七者不詐賊良害善八者不驕傲忽至真九者不二奉戒專一此道家之說也地獄經曰地獄諸受罪人銜悲白佛言作何善行得離斯苦佛言當謹孝養供養父母敬事師長歸奉三寶勤行佈施持戒忍辱精進禪定智慧慈悲喜捨待人平等無有二相不欺孤老不輕下賤護人如已不起惡念如是修行卽爲已報佛恩永離三途無復衆苦此釋氏之說也然則上命可違逆乎

經引

孟子曰父召無諾君命召不俟駕書曰方命圯族

論林沆奉上旨必設香案焚香

拜讀始行有不可行者必從容請對務得遵旨而後已

○郭子儀再造唐室功名甚盛上每奪其兵柄一旦有事輒命爲將

子義那下收免用令即日就道色無人顏或收引純皆所不計可

謂純臣不違君命矣

善報魏顥父武子有寵妾武子疾曰嫁之疾甚曰殉及卒顥嫁之曰吾從治命不從亂命及與秦戰敗秦師於輔氏獲杜回顥見一老人結草以絆杜回馬仆故被獲夜焚老人曰蒙君嫁吾女從先人治命是以報

○陶安字主敬當途人少敏悟有大志博涉經史太祖命安知黃州諭曰善撫黎民安欽上命至則寬賦稅省繁役勤課士減刑罰民皆悅服復召爲學士遷江西行省參政知事無不盡心竭力以副上命及卒上親撰文致祭贈謚子孫俱登甲第位至卿相今之爲民上者能承君之命而撫字黔黎方爲純臣若不體君上愛民之心而方命虐民太上之譴殛不森嚴其可畏乎

惡報林幾字景度爲給事時蜀郡荒旱朝廷命發米十萬賑濟景度以米太多蜀道難行封還成命以半赴賑是夜夢朱衣人持天符至曰上帝有敕謂汝逆旨害民命下減汝子孫驚悸醒後以病免官行至福州卒二子繼歿竟絕嗣違逆不一此則事之大者○明嘉靖時寶坻民楊咸好惡其兄成甚富將死出千金泣告曰兒幼不能掌付弟生息俟兒長可給其半咸違兄命一毛不拔成妻控邑尹張公不能決適獲羣盜見咸曰此人素貧今富皆同吾劫

資也。咸爭曰：吾乃亡兄所寄，豈盜耶？張公笑曰：天遣此盜為汝兄作証耶？盡斷還兄子。

作為無益

（註）人生在世，無論賢愚，無不日用其耳目心思，用之於為善，則朝夕勤勉，猶恐其不足，用之於無益，則喪身敗家，皆

基於此矣。何謂有益世間萬事轉頭，即空，惟積德行善，興利除害，為國為民，勤耕讀商賈等事，生生世世，隨身受用，無有窮已。如有才學，闡修忠孝經史，助輯方書內典，有貲財修井築堤，葺造橋亭道路，置立義倉義館義塚，施粥施棺，施賑饑貧，立育嬰會，惜字會，戒殺放生會，事難盡述，皆是有益之事，有益於人，即能有益於己。他如第宅臺池及詩文書畫珍寶玩器羅籠鳥雀鬪雞走狗等，皆能喪志累身，何益之有。

引經

書曰：不作無益，害有益，功乃成。

（論）呂蒙正為相，有士藏古鑑，能照二百里，欲求售，公曰：吾面只飯碗

大，雖照二百里亦奚益哉？王旦居家，有貨玉帶者，弟謂甚佳，公命繫之曰：還見佳否？弟曰：安得自見？公曰：身負極重，而使他人稱好，無乃自累乎？何益之有？命速還之。

（惡報）晉石崇與羊琇、王愷奢侈，而崇為最。車馬服用，僭比王侯。庖善公將水陸，餼妾百餘，皆曳純綉，珥金翠，絲竹琴棋，書畫，選勝一

時竟以懷寶取禍及見收謂曰若輩利吾財耳收者曰知財爲禍何不早散之崇無以對竟斬於市

郭從義鎮河陽于洛中造一大第千餘間文梓爲櫟花石鋪地穿池鑿山亭臺樓閣約費數萬金次年被召還都暮抵其第秉燭周覽尚未及徧復命期促不容久駐飯罷少憩侵星而出明朝復歸至東都遂卒不復再至家人不能居獻之於王乃作皇陵遂閉館

○西吳董尚書份勤於交接凡衣冠過客無不延禮厚贈孫禮部嗣成工詩字多以手書扇軸及詩詞贈人祖聞之曰以我家勢雖日以金幣爲懽猶恐未塞人望奈何效清客行事耶且縉紳家自有局面凡行一事要有利於人有裨於己豈僅以詩字供人玩賞耶將來破吾家者此子也後民變事起嗣成願自處分愚民一集千人遂至破產人咸服尚書公有先見云閱此方知吾人修業以有益於身心者爲貴詩字雖高不過使人褒稱而已究無補行義

李公麟字伯時元祐進士工於詩畫時雲房禪師讓之曰公爲士大夫以詩畫供人喜悅已屬可耻且畫馬精神心志皆注於馬思爲神駿一日眼光落地必墮馬胎公大驚避席而請曰當以何者浣此過師曰當畫大士像自是摹大士像妙絕天下

○黃魯直好作艷詞或謂之曰公文詞之富甘墮落於此乎公曰空

謔何妨人曰李伯時注念神駿自墮止於一身今公艷詞蕩天下心使少年無識輩信爲實事則踰理越法無不至矣曾直踈踏謹謝改過

○張纘緒戒人作淫詞云言今世之禍百怪俱興往往倡淫穢小說以爲風流佳話使觀者搖魂奪魄毀性蕩心其意售之坊刻網取蠅頭微利在識者固知爲寓言幻景粧假非真其如特達者少隨俗者多彼見文人才士筆之於書則閨中奇緣未嘗不爲文人才士所許平日天良一線前此尚有顧忌自後則心雄胆潑矣由此捐軀捨命滅身亡家嗚呼誰實使之然耶况吾輩旣已身列士林爲士女興禮義維廉耻何忍驅癡民盡入於禽獸禍天下而害人心莫此爲甚倘謂四壁相如不妨長門賣賦則何不取古來忠孝節義之事編爲裨官野史何苦必欲爲此矢口卽是邪淫絕不新奇而綺語爲殃虛言兆罪不特陷人亦自陷矣慎之

○元順帝多材藝自造龍舟五彩裝金船行則首尾鱗爪俱動又自製宮漏高七尺爲木櫃藏諸壺運水上下櫃上設西方三聖殿櫃腰設玉女捧時刻籌時至則玉女捧籌浮水而上左右列金甲神左鍾右鈺夜則神人按更自擊併無差錯明太祖觀其制嘆曰使用此心以治天下何至於此命率之

懷挾外心

註如臣有外心欺君子有外心欺親妻有外心背夫兄弟

謀卽謂之外也故經曰使心用心反累已身蓋始因一念之差遂至終身之敗是以君子修身先貴乎謹獨而無自欺卽上天垂戒亦先嚴乎操心也

經引詩曰上帝臨汝無貳爾心

善報明許達字汝登同始人正德三年進士初尹樂陵縣寇猖獗他縣或守或

和公獨募死士持挺擊賊敗初陞僉事政績著聞旋任江西副使適值宸濠反知公才欲聘之公大罵曰逆賊我許達豈事君而懷二心者有死而已寧從汝耶賊怒殺之嘉靖改元贈禮部尚書謚忠節立祠官其子場錦衣揮使

吳中有一鬼善能淫人婦女又能致金帛首飾與婦家崑山民有二女將被汙女曰涇西某氏女容貌甚美何不往彼鬼云彼女心正吾不敢近女怒曰我心獨不正耶誓死無二必不從汝鬼遂去不敢復至此所謂天地有正氣而邪不勝正也彼挾二心者已爲邪所中矣凡列同人可不預爲戒乎

惡報漢丁公爲項羽將逐漢王於彭城兵將及漢王急顧丁公曰兩賢豈相厄哉丁公引兵還及項氏滅來謁意必見酌前德也帝

令狗於軍中曰丁公不忠使項王失天下後世爲人臣者無效丁公懷二心也遂殺之

○林松溪與張大交情莫逆張疾危臨終請林至床前出妾拜之曰此婦我所鍾愛自誓守節君念交情恤之林曰决不負心張喜曰吾目瞋矣及張死林與妾姦通謀娶之曰此張遺命也一日妾對鏡見前夫數其罪隨扼其喉七竅流血死半月後林對鏡見張與妾同來曰吾告汝於閻王同去對理林撲鏡於地述其事於家亦七竅流血死心不可負如此

○常熟直塘有錢外郎富而險里中婦趙重陽色美錢慕之以夫貧可餌代販布商於臨清錢與婦通一日其夫出門行至木梳橋潮落不能去復歸到家錢方擁趙暢飲夫慚且怒旋回舟中錢與趙計夜遣人陰爲盜殺之族人鳴於縣尹楊子器訊鞠不承自是數月亢旱通判桑民懌謂尹曰君知所以不雨之故乎趙重陽獄未決耳尹遂嚴刑訊服卽大雨如注縣已決案錢又揮金越訴移獄於府復買無賴聞於朝下南京法司錢通要津內援與趙皆幸免方出部門少憩忽疾雷一聲兩皆震死

自咒咒他

註篇中言咒有四各有不同干求不遂便生咒恨咒罵他人也河風焉雨焉神解正無知而怨尤鬼神也咒詛求直

忿怒而洗白自己也。至自咒咒他，是怒不欲生，自甘死亡，兼願人之死亡也。所謂愛欲其生，惡欲其死，皆惑之至，昧於理也。且咒詛一事，所以皆屬不可者，謂人貴乎生，死貴乎度。今處生而咒詛，未免速歸於死，即死有執對，則必禁錮滯留，無由出脫，往往有不待死，立如所咒，即報應不爽者，豈可妄出咒詛哉？

〔經引〕

詩曰：侯詛侯咒，靡屈靡究。

〔善報〕蘇州尤宏遠娶鄰人莊氏女為妾，妻妒悍，日為咒詛，欲其速死，無何妾果

卒。數月妻病夜見一女至，乃其妾也，罵曰：「我命未合死，因汝咒詛令我夭歿，今控獄司追汝抵命。」妻以告遠，次晚果死。遠念妾冤必為已累，乃齋潔日持誦玉皇經，又建水陸道場，數晝夜欲謝前過。後遠得病勾至獄府，冥王叱問：「爾妻訴爾同咒詛，致妾非命，爾知罪乎？」遠叩謝不知。王呼押宏遠妻妾來証，對辨良久，妻辭屈妾亦言罪不在夫。王者叱其妻曰：「汝為人正室，既生如虐，強瀆鬼神，死復誣誑，妄干官府，爾罪難逭，便令押送酆都，妾判受生，王呼遠曰：『爾雖不知情，然此婦咒詛文案甚多，如何破除？』遠未及答，忽一判官白王曰：『高真處有文書來，准遠折過矣。』俄有二神以足蹴遠背曰：『去遂得出，復行冥晦中，入一司，六僧坐問遠因，俱言高真赦罪之故。』僧曰：『然汝知奉道矣，尚未知皈佛。』今既得生，宜急延年，高有

德僧六員誦法華經六部可卽消滅風愆也命去遂甦卽請有德行僧年皆六七十者誦經如數訖後每月朔持經誦懺雖極冗不廢後遠復娶妻生三子俱富壽八十八無疾善終○宏遠無罪故誦經可以折過倘若同妻咒詛帝天亦不曲庇矣後人當知自反不可謂作惡而誦經卽可消弭罪案也

惡報郭引鳳被拘入冥見一婦人鬼卒以鉄丸如蒸餅大塞其口又以煉銅汁張口灌之引鳳曰此犯何罪鬼曰生前好行咒罵死後卽受此罪

○堰典妻常與人私又竊鄰家手巾鄰家詆罵典咒曰我妻果與人私及盜汝手中當爲雷擊否則汝亦如之是夕二人斃於雷斧典脇下批曰癡人護妻妻背上批曰行姦爲盜

○宋欽宗北狩和議成顯仁皇后將還帝挽泣曰吾南歸得爲太乙宮足矣他無望於九哥也后誓曰吾先歸而不迎汝者誓吾目比至南見高宗殊無迎復意未幾后失明命醫不効有道人入宮金針一撥左目復明后曰吾目得師復明煩再明其右道士曰存一目償誓可也

偏憎偏愛註人可憎者亦有好處偏憎者併其好處盡廢也可愛者亦有惡處偏愛者併其惡處盡掩矣愛憎一偏是非倒置

在一家則一家之禍釁無窮在天下則天下之喪亂立至至於後妻繼母尤甚彼見愛者揚揚得意見憎者兀兀難堪積久愈成仇恨一發遂不可支是父母之偏愛非真愛也乃所以害之也為父母者均其所愛兄弟自相和睦豈不兩全閔母以蘆絮示薄許氏以鉄杼表酷歷歷可鑒為夫者耽少艾惑巧言鍾愛狂情牢不可破妻譖日行夫綱日削而子愈危

〔經引〕

大學曰之其所親愛而辟焉之其所賤惡而辟焉

〔善報魏慈母者孟陽之女芒茆

後妻也生三子前妻有子五人皆不愛母而母遇之甚厚自菲薄其三子飲食衣服不得與五子齊而五子猶不愛母未幾前妻中子犯魏王令罪當死慈母憂戚悲痛朝夕勤苦以救之或曰子不愛母至甚也何為勤勞憂懼如此母曰妾之親子雖不愛妾妾必救其禍而除其罪今於前子則不然何以異於無母哉若父為其孤也使妾為其繼母既為其母而不愛其子可謂慈乎親吾子而疎前子可謂義乎不慈不義何以立於世彼雖不愛妾妾可忘義乎遂聞於魏王王高其義乃赦而復其家自此五子親附慈母雍雍若一母因以禮義訓八子咸為魏王卿士云

○秦母柴氏秦潤夫繼室也生子與前妻子俱幼閨夫死以前妻子

囑之柴氏鞠育無異心辛勤紡績二子就學至正中有惡少殺張福家屬福訴於官連柴氏長子法當誅柴氏引次子詣官泣訴曰殺人者妾次子非長子也次子曰我之罪可加於兄乎鞠之至死不易辭官反疑次子非柴所出訊之他囚得其情官憐氏之子母嘆曰妻割愛以從夫言子趣死以成母志此天理人情之至併二子俱釋之有司上其事旌表以復其家冒起宗曰此二母者不惟前子視猶子而且過其子不惟不加以怒而且曲行其慈真女中丈夫哉末俗酷虐遺孤甚至亡人之家視此當何如

惡報東海徐甲前妻許氏生一子名鉄曰許亡而娶陳氏凶妒欲殺前子陳生一男祝曰汝不殺鉄曰非吾子也因名鉄杼欲以搗臼備諸苦楚竟被創死時年十六亡後旬餘鬼復還家登陳氏床曰我鉄曰也無罪被害我母訴天今來攝杼不見形只聞其聲恒在屋梁上住陳謝設奠鬼云餓令死豈一餐能酬今斷汝屋梁聞鋸聲颯颯有聲炳燭照之併無形跡又罵當燒汝屋即見火燃俄自滅時杼六歲體痛腹大鬼屢打之月餘死陳氏亦亡

○張開妻孔氏生五子孔卒再娶李氏虐待五子五子哭於孔氏塚孔氏自塚出哭撫其子取子衣襟題詩遺張曰不忿成故人涕泣滿盈巾司食今已歸對面永無因盒裏殘粧粉留將與後人黃泉

無用處浪作塚中塵有意憐兒女無情亦任君欲知腸斷處明月照孤墳五子得詩呈於父父以訴連帥連帥奏於朝李氏發配嶺南未幾暴死

○夫前人在冥冥之中以子為命每見酷虐前子者已子無不受報則當與人方便而自已方便可知矣然亦不徒為禽犢之愛也教之親正人行正事不可過於姑息務恤其飢寒察其疾苦使其兄弟自相敬愛則和氣致祥家道自亨未有前子破家敗行而已子能晏然者也當實心愛之自無他虞矣

越井

註越跨越也昔黃帝時始穿井淮南子曰伯益鑿井而龍登玄雲神棲崑崙故釋名云井清象泉之清潔也又曰井通也人所

通用也又曰井法也節也禮記曰井門戶竈中霤為五祀昔漢天師成道教人造橋鑿井立功濟眾大抵井之為利廣博有神主之名曰觀狀如美女又井鬼名瓊酉陽雜俎曰臨井勿窺語曰古井不唾唾與窺且不可況越乎

經引

易經曰改邑不改井禮記曰夏之月其祀井

論譬喻經曰昔有母子三人恒作三事一

事造船置於河中濟渡百姓二於都市造立好井以養萬民三於四門各作園廁給人便利修是功德命終之時即托生人間富貴

壽延所生之處不墮三途設此微功尚獲大報况濟無量乎

○夫惠及百姓而不費者井也則人當自愛護尊敬勿使觸穢故華嚴經云或作河池井泉水又曰復有無量主水神

善報吳湛爲縣吏所居臨荆溪有泉極清衆胥賴之湛爲鑿籬遮護不令穢入忽泉側得一白螺置甕中每外歸厨中飯食已辦心大異之一日潛窺乃一女子自螺出爲作飲食湛急趨不容歸殼女子告曰吾乃泉神上帝以君敬護泉源知君鰥居命吾來爲君操饌君當得道矣言訖不見

○房豹爲安樂太府郡治涉海水味多鹹命鑿一井得甘泉民頌德白居易爲杭州刺史復浚李泌六井至今民賴其利

惡報宋計吏止於傳舍秣馬將就道以馬食殘莖瀉於井中謂不復過此未幾復到飲水遂爲殘莖刺喉死此汚井之報也人於日間若多用水減福折算慎之

越竈

註張玉成曰竈神名隗姓張又名卓字子郭司一家良賤之命

專察善惡長短預知吉凶禍福敬之猶有歉豈可跨越乎又按祭法王爲羣姓立七祀竈居羣祀之中月令四時共有十一祀竈居夏之三祀焉太上曰世間惟太乙火神簡察世人善惡長短不知而觸犯者衆玄元道君曰奉吾道者黜祭家竈及祀先之外不

得淫祀他鬼黃帝曰凡求男女生產平安婚姻和合壽命延長學業聰明仕宦遷進人皆愛敬貴人歡喜宅不虛耗家得平安舟車無虞田蚕稱意市易和合訟訴得直盜賊不侵口舌永息疾病安痊伏連斷絕咒誓解散瘟疫永除乃至穰厭破射驅逐虎狼皆當祭祀竈神庸可越乎

經引禮經曰王為群姓立七祀曰司命曰中霤曰國門曰國行曰泰厲

曰戶曰竈庶人立一祀或立戶或立竈

善惡陰子方至孝祀竈甚虔臘日晨炊見竈神子方聳敬

以黃羊祀之從此大富孫熾生女為后熾封侯後子孫祀竈不替惡報宦婢瓊英性貪婪每遇燕客盃盤狼籍恣行竊攘一日英方產子值主誕辰賀者盈門婢從奔走甚眾英乘冗雜忙便於偷盜棄兒入廚強與服勞身穢觸犯竈神比歸寢所薰被燃及牀策幼兒灰燼衣被俱焚速報如此

跳食

註食為民之天若跳越之是褻天也故凡遇粒食皆當珍愛敬拾之安可跳越乎

經引孟子曰蹴爾而與之乞人不屑也禮曰食居人之左羹居人之右

論齊大饑黔敖爲食於路以待餓者有餓者蒙袂輯屨貿貿然來黔敖左手奉食右手執飲曰嗟來食餓者揚其目而視之曰予惟不食嗟來之食以至於斯也黔敖從而謝之終不食夫嗟來之食猶不可況跳而過乎

善報陳僖敏公鑑父孟玉爲人愿慤鄉稱善士嘗如廁見糞旁有鍋底飯一塊拾就水滌淨食之夜夢文昌帝君告曰翁好善真篤岳將降生爾家以大爾門未幾生僖敏公官至太子太保贈翁官如之王命岳曰跳食者食在器中偶籍諸地忽誤越之尙干天怒况有意作踐乎孟玉滌穢而實諸腹可謂能敬天者也獲福宜矣惡報唐有一官素輕飲食後入山遊玩至孤絕處忽見一酒店買而飲之一婦人先收錢入內良久方持酒出其色如血甘羹欲再飲婦人泣告曰妾非陽人也因在生時侈用無度殘羹剩飯踐踏作踐復與人食罰來賣酒皆妾身上血供人官大驚而回行至數步轉望並無店舍夫高山安得有酒店陰司特化此以警之耳箴附鄭澣儉素自居尹河南日有從昆弟之孫來謁將去召甥與孫食飲有蒸餅其孫去皮食之澣曰皮與中初無甚異僕嘗病俗驕侈思反淳朴今見子力田敝衣必能知稼穡艱難奈何囂浮甚於五侯公子綺紈乳臭兒耶因引手請所棄者其孫錯愕失次托

器奉之，澣盡食焉，遂揖歸蒸餅皮，尚不可棄。況跳越乎？

跳人

註：人爲萬物之靈，能參贊天地，化育羣生，雖富貴貧賤有不同。至於賦秉知能，五官百骸，則皆一也。若跳越，是褻天也。况象人而用，孔子惡之，輒可跳乎？尤當爲小子戒之。

經引

禮記曰：入國不馳，入里必式。詩曰：天生蒸民，有物有則。

善報：程夫子伊川西遷，宿僧寺坐處，偶背聖像。夫子曰：轉椅不可背。翟林問曰：何故？曰：凡具人形，皆不可慢。况聖像乎？龜山聞而喜曰：旨哉！其語後爲理學配享子孫世襲。

惡報：韓信居淮里中，少年侮之曰：爾雖壯大，劍不離身，實怯耳。能刺我死，不能出我跨下。信爲熟視，俛出跨下。一市皆笑。以信爲怯。後拜將，召辱已少年，以爲中尉。少年至府，參謁叩頭請死。信和顏慰宥之。未幾，少年自斃。王命岳曰：跳人者，人偶卧地籍而越之，此誤也。淮陰少年事雖不恭，而近於謔，等閒跳人者，罪宜加焉。

損子墮胎

註：物命至微，尚當體天地好生之心，而放生戒殺。况子女乎？大凡人死，大善直陞天堂，大惡直入地獄。半善半惡，未

有去處，不免又受中有。既受中有，又須陰司注擬，有可去處，然後得生。及生時，九天司馬在庭，九天稱慶。太乙執符，帝君品命，主祿

勒籍司命定算五帝監生聖母衛房天神地祇三界備守經所謂得還人道擢形太陽驚天駭地貴不可言於爾何負乃敢殺之或以家業貧乏厭薄其多或野合淫奔急欲滅口或醉後恣行淫慾或怒時拳打脚踢或婦人自不謹慎負重衝撞數月墮傷必得殺生之報然則子胎安可損墮乎但胎中遭損墮者亦必有因其人前生功業應受今生但善惡算除照其善之分量或壽期頗或享稀耆或週甲子或四五十年而逝又照其惡之大小或二三十歲而亡或三六九歲而亡或一週滿月而亡或胎中數月而亡冥王考較衡量紀載因人自作自受分毫不爽所以人於生時當時時存心念念積德功完行滿自然註福註祿功名富貴壽臻遐齡必不遭此墮損之厄言念及此人安可爲惡而不爲善乎戒之哉宜慎母爲惡入損子墮胎之中幸甚

引經

禮記毋殺孩蟲胎天

仲春之月養幼少存諸孤

先雷三日奮

本鐸以令兆民雷將奮發聲有不戒其容止者生子不備

論父殺胎子人倫之變聖人所不忍言夫孩蟲不殺况子乎諸孤

論字見己子乎生子不備况備而殺之乎

善報張與拜武威太守其俗凡二月五月生子及與父母同月生者悉殺之與示以義方嚴加賞罰風俗遂易民爲立祠官至九卿京口錢邦偉爲貴溪令其俗多不舉女錢公嚴著爲令殺女者五家連坐所活無算俗爲大變後爲汀州太守壽考令終子孫科第凡爲官長者能刻意禁民損墜定然功多而冥報崇矣

○東漢賈彪舉孝廉爲新息令民因貧困多不養子彪立法與殺人同罪城南有盜劫掠人者北有婦人殺子者彪出按法掾吏引車南行彪怒曰賊寇害人此亦常事母子相殘逆天違道驅車北行按驗其罪城南賊聞之亦面縛自首數年間養子數千生男名曰賈男生女名曰賈女後官侍郎累世榮顯

○虞允文知太平州舊制民舉子必納添丁錢歲額百萬貧不能納者生子皆溺死允文令將蘆荻稅以補添丁錢後百姓生子者皆不至溺允文官至尙書子孫皆貴

○元趙仁素敬玄帝患疾危醫云必得紫河車乃愈仁曰我見人服此藥無一善終且人兒女出此胞衣者多不育我不忍使人兒女夭殤也卒不用是夕夢玄帝告曰汝命當絕緣不用胞胎療病上帝赦汝延壽二紀年九十一歲

〔惡報〕梓潼帝君救劫章云元秀家財四十萬有子四人其餘諸妾

所生併瘞之一日夢中見十數人來追殺秀驚愕兩手兩足已爲牛蹄展轉牀蓆大叫三日頭斷而死陰司申奏天曹帝大怒曰性根不壞方得人身既已成人妄加殺溺揆以正條倍於故殺勅下陰府將元秀永囚地獄在生四子注刑名籍四十萬家財沒官外特遣飛天神王巡行天下有殺溺兒女者卽許便宜行事以殺人償命之罪擬之然則損子與墮胎乃天地神明所共殛者世人未鑒帝勅之言致陷溺兒女者後其戒諸

○蘇東坡與朱鄂州書云鄂野小民例養二男一女多則殺之以故少女民多鰥夫有鄉民石揆者連殺兩子今夏一產四子備極苦楚母子俱斃彰報如此顯著也

○郭印女引鳳被二鬼攝入冥府大書地獄有一王者坐殿上下列數百婦人各有小兒抱足號叫索命有私胎數月而毒下者有因生男女過多而溺死者有因妒妾生子而打墮者有因家貧而男女下舉者有因爭鬪而觸損者有因兵賊潛匿林中怕兒女啼哭而閉殺者有因女人負重自墮落者有因視兒不謹死非命者有因缺乳不多方餵養而致死者冥王一一詰問莫不極枯在身枯潛可憫引鳳魁俱白父因大書天寧寺歷陳冥中惡報以警世是

○舒州王堯臣室女患鬼胎二年不下設醮懇禱家祀真武頗虔是

夕神附人言曰此女前生爲藥婆貨賣毒藥爲人打胎內有貴命亦被枉殺上帝震怒罰報今生腹中蛇像已具生卽化蛇

婦楊阿承自幼貧病臨終自語曰我前生爲醫人有一婦自稱病蠱不能辨其有孕以芫花酒下之母與子俱斃是一藥連殺二命也受罪滿足降生爲女罰吾三世皆貧困苦飢渴多病少安世之醫者須詳審用藥當以我爲鑑言訖死

○巴東赫連傑妻慘刻凡僕婦有孕必墮之旣生令溺之蓋惡懷抱之勞而妨工作之務也一日見小兒多人或形骸俱備或肢體未全或血團一塊淋漓血漬者爭噬其膚喊叫數日死

東一清妻三舉女胎三斃之萬曆甲午復產女置溺器緊閉啟視化一紅蛇躍出纏其左脚昂首咬其腹遂斃

○箴李廣曰男女居室禮也有男女然後有夫婦而父子昆弟以次而起如心厭女溺之則是人道滅絕且生我之母亦從女而來配我之妻亦因女而得胡爲女自我生復自我溺况乎男若不肖未必有濟女若興旺亦甚得力如古淳于之女願沒爲婢代父贖刑鄭神佐女遠歷邊陲歸親骸骨木蘭秦女代父從征女豈無功於人哉吾願世之爲父母者作平等觀可也

○附何龍圖作歌云虎狼雖至毒猶知有父子人爲萬物靈奈何不

如彼生男與生女、胞胎一而已、生男既收養、生女胡不舉、我聞殺女時、其苦狀難比、胞血尙淋漓、有口不能語、伊嚶盆水中、良久乃得死、吁嗟父母心、殘忍一至此、我勸吾子民、母爲殺其女、荆釵與裙布、未必遂貧汝、隨分而嫁娶、男女俱得所、女性最柔和、愛親甚於子、男子多違拗、女恒順父母、男子多遠遊、女恒守父母、男子少悲哀、女恒哭父母、女有孝順心、每每救父母、女有好夫子、每每顯父母、不觀提縈女、免父刑肉苦、不觀唐香女、救父而拒虎、覃女年十八、能令父喪舉、曹娥年十四、沉江覓父屍、叔先痛父溺、抱父浮於水、袁女母癰癰、火來不能救、甘與母焚死、宋女號陳三、父母貧如洗、採麥供膳粥、孝子誰能比、親死不肯嫁、廬墓沒其齒、唐女卞和子、父兄皆戰死、和女甫十七、跛跣走邊鄙、乞丐扶骨歸、營塋憑續縷、剪髮毀面貌、然後廬墓所、大節達宸衷、旌賜表其閭、孝哉蕭氏姬、父母沒異土、姬方十六齡、扶櫬還鄉里、舟子欺其孤、中途委柩去、音捧 葬土堆成墳、姬獨與一婢、毀貌日夕哀、結廬在水濱、求婚不肯配、願嫁還棺者、楊氏一老尉、還視身事之、東滄屠氏女、父瞽目、目鼻 孿、家無隔宿糧、親隣皆相棄、女乃移二親、遠處於紆舍、守墳終不嫁、只爲無兄弟、古女賢孝儔、甚多難筆紀、有司或贈金、朝廷或次賜、也有爲祀墳、也有夫人額、若能字也命、報施應不替

行多隱僻

註隱者不光明之謂僻者不正大之謂事亦多端所包者廣但太上言損子墮胎而繼以行多隱僻者大抵必屬淫

穢之事也或尼姑或寡婦及無行子女以淫穢成胎恐致敗壞彰露遂陰行損墮之法誰知陰律姦人妻者絕嗣姦人室女者子孫為娼仍送入火焰地獄以報慾火之罪今人恬不知悟損行瀆倫亂宗敗俗故不憚反覆以陰律為世告之使人知自謹也

經引

中庸索隱行怪後世有述焉吾弗為之矣又曰庸德之行

惡報浮梁張明三隨父宦瓊崖宅鄰李指揮二女皆美張通焉及歸潛攜舟中李追急亟推二女於水後張病迎孫醫療治稍愈是夕孫夢至水邊二女裸體執孫衣曰妾瓊人也來治張病汝因奪我功也因曳孫入水中孫驚悟語張曰業報至矣不可治也果逾月死李嬭曰李氏室女也張三不信因果忍與之私失矣復挈之逃更失矣事急擠之於水抑又失矣索死何辭一時失足千古遺恨此隱僻之行宜於幾先慎之也

○嚴武少時于京城私一軍丁女以逃軍以狀聞有詔遣制使追捕武懼醉女以酒中夜解弓絃縊之沉於河後為劍南節度使病見一女子披髮頸上有絃白武曰公太忍某從公是失行於公無所

負公若懼罪置吾於他所亦可何忍見殺某已訴於帝求取汝明日武暴卒

晦臘歌舞

註晦者一月之起月大三十月小廿九乃竈君上奏功過之期臘者一歲之終卽除夕之夜也又有五臘正月初一

日名天臘五月初五日名地臘七月初七日名道德臘十月初一日名民歲臘十二月初八日名侯王臘凡遇此日本五岳星君攢會生人善惡其日天君朝會玄都統御人間地府五岳三萬六千陰陽之神校定生人善惡罪福榮祿壽算吉凶生死等事一一等於籙中善降祥惡降殃有過悉書黑簿一入黑簿罪難贖矣故人行事以及起心動念須要謹慎隄防兢兢業業勉行善事出此入彼誠可畏哉况酆都北帝太陰天君亦於此五臘日放出幽都鬼魂久遠祖宗父母眷屬取問陰司年代遠近及問積罪結釁端由墳墓見在何處子孫名姓何人既得子孫兄弟姻親九族名姓攢集校定以爲生人罪狀如積劫未有追贖卽延累生人且逢臘日凡先靈眷屬鬼魂皆得釋放各歸本家受領祭祀爲子孫者自當憑伏道法或誠心祭奠若肆意歌舞是得罪天地祖宗矣于王陛曰晦臘日及五臘日人當勵志進修於此日較量功德猛省無常戰兢惕勵放下萬緣一心念佛歌舞之事豈可有哉

引經

書曰敢有恒舞於宮酣歌於室時謂巫風

論梨園子弟以歌舞爲業者無論矣此外上自

王公下及庶人皆當於晦臘五臘日潔淨香燈誠心祈禱事事修省以迓天庥毋縱歌舞以取罪戾若能自新又新必可證道果矣善報王長文爲江源令收得盜馬及發塚賊長文引前慰諭時遇晦臘皆遣歸家獄中先有繫囚亦遣之謂曰教化不厚使汝等如此長文之過也蜡節慶祚歸就汝家善相懽樂過節當來羣吏惶恐爭請不可至節後果各來就獄尋有赦令無不感恩衆誓不爲惡曰不敢負王君也後文官至九卿

○

淮陰強富持身謹慎接物謙和每至朔望臘辰誦經拜佛始終不輟時值元旦天臘之辰有一小人逞酒辱罵富閉門不理家人及鄰佐皆難忍富曰當此佳節誰不飲酒醉後發狂人之恒情若與之較何無量也是夕夢一金冠紫袍人謂曰汝能於天臘之辰忍人所不能忍上帝嘉賜汝福壽子孫世世衣冠後享壽八十餘二子一孫俱明經夫古之君子孫時懷親閔罪恤凶所以能祈天錫命若於是日狂縱歌舞既犯天真必減福祿折除壽算人其慎之

朔旦號怒

註朔者每月初一日也旦者每日之早晨是也朔爲一月之首旦爲一日之首一月之所爲基於朔一日之所爲

基於旦號者啼號怒者嗔怒此時正當存心和樂上合道真苟一號怒則濁氣隨肝而升真氣隨聲而散所謂嗔爲劫功德賊最能消人善根則神昏氣濁而善念不生矣詩曰一切諸煩惱皆從不忍生臨機如對鏡妙處在光明佛語求無諍儒書貴不爭好條快活路世上少人行佛經曰嗔墮諸惡道之因緣劫諸善心之大賊纔起嗔怒當急解散毋令增長平時亦當謹慎况朔旦可號怒乎

引經

論語必朝服而朝

論昔賢詩云纔觸生嗔怒無明障未通誰添心上焰應作耳邊風長短時時有炎涼處處同是

非無實相悟却總成空

惡報冒起宗曰太倉有強生者父死往龍虎山求張真人薦拔適江西一人亦求薦父各出銀幣啟醮七晝夜真人伏壇起曰穿紫者得度穿褐者發蛆重部矣蓋江西人父殮時衣紫而強父則褐也強泣拜曰吾父何至此真人曰姑置他罪只如每歲臘月二十五日啖狗而正月元日不點燈亦應得此夫正月元日乃天臘日正天君朝會立都諸神校定生人善惡貴賤貧富祿壽吉凶生死等事須當齋戒潔淨香燈供祀天神地祇及諸神聖家先祖考英靈喜且不可而况怒乎若號怒遂犯陰陽之忌遭譴不小當戒之歲唐若山篤尚正直性無忿恚遂能親遇太上華嚴首座行業最

高但以臨終一怒遂變為蟒

對北涕唾及溺

註北方乃北斗星君北極為天之樞謂帝車運於中

化為眾星之主不可觸犯若以長星經言之北斗者又不止正北
北斗之柄四時運行春東夏南秋西冬北斗柄所在皆不可犯切
知避忌昔漢明帝遊終南山忽見雲霞布彩瑞氣騰空有北斗大
聖位居其中二星官在後元君曰吾非一聖乃七星也二星官是
斗中註人間善惡死生號左輔右弼之星若人誠心拜斗皈依敬
禮可延生保命度厄消災冒起宗曰為人子與婦不可穢噓唾啖
於父母舅姑之側以不敬也况對北方而可涕唾及溺乎

經引

論語譬如北辰居其所而眾星共之

孔子作孝經告成於北斗

論管寧字幼安自言一身無過所有過者惟在三晨晏起梳頭向
北耳夫梳頭向北尚且不可况唾溺乎

善報宋王梅溪先生十朋原名一朋樂清人生平洩溺必於屋下
不敢當空對三光一日行山中溺急無措忽見一小屋趨簷下溺
訖進屋中見老嫗績緝案上有卷朋問何書答曰歷科狀元錄開
看有王十朋姓名綉俱黑線獨十字一直用紅絲行數步小屋忽

不見心甚異之紹興中一朋廷對狀元及第高宗親策曰一人那得爲朋用御硃筆添一直豎爲十字果如所見生子二人聞詩知光州聞禮知常州

崑山魏清伯弘治己未病瘍醫人誤針其足脛久不能行夜夢白髯老人告曰子病若此何不誦北斗經覺而異之適有道士問病以此問之道士曰虔誦北斗經却病延年清乃持誦日必三遍其病遂瘳後至百歲齒髮如少年猶誦經不輟

梓州倪勤守涪州涪上有倉名興教勤嘗主之素奉北斗虔誦其經有廳一座坐江涯甚險峻勤設北斗像於其上誦經敬謹其年夏水泛漲勢若滔天勤在廳誦經毫不驚慌及水退四面八方屋宇盡被衝決惟此廳與倉獨存一方感化俱奉北斗

常熟縣錢氏大族也王德丙寅皆被火三日方燼中有小樓三楹獨存此乃小四房姑媳皆寡居素持誦斗經及火焰熾時二婦無措止叩頭虔誦斗母經須臾見朱衣者七人立簷下舉袖麾之火光卽散七人忽不見姑婦拜起則鄰家灰燼矣此謂奉北斗水火不能傷之報也合而觀之崇敬者神明之祐如此則觸穢者必遭天條之罰可知矣蓋涕唾及溺未必有心總是一念之不敬所以改神變責凡人居動靜行止須要敬謹存心避忌毋得恣意

於細微私聚之際尤當留心焉

對竈吟咏及哭

註吟咏即歌唱也黃帝竈經曰竈門不得歌咏哭泣

犯者必減祿壽母以此為細事而可忽也慎之引經詳竈神篇

歲弘治四年向寶卿李貞伯居長安街夜半命二婢入厨烹水婢

始謔笑致詬詈復哭泣忽見二青衣女執戈喝云汝敢觸犯竈神

將撻之竈後有一主母着貴嬪服飾徐往中堂就坐二婢下跪貴

人曰吾乃竈母娘娘汝二人無禮觸犯吾神本該重處念汝愚癡

姑赦汝罪以後切不可歌泣吾前二婢叩頭謝過奔上樓昏仆地

半晌方甦告主翁遍傳其事近竈者鑒此須當慎之

又以竈火燒香

註香必潔淨倘竈或有穢柴以之燒香不敬甚矣按

典內香火避忌不止此事如油漬紙不可造錢紙供養真武諸

神夏不用李子冬不用石榴月季謂不時花金桐謂鬼花皆避忌

引經論語鑽燧改火

箴宋周開山誦華嚴經甚敬之僧誦金剛經二人

誦金剛經心甚不敬誦完于云二僧以誦經功德俱延算二紀請

華嚴經者益當敬重他日不來我處矣其時誦金剛僧心大慚僧

問開山住處願往拜訪二人同甦此僧直至潞州訪開山問之答曰每日誦經必潔淨衣服以香水洒掃靜室然後取石中火或鑽木中火燒香肅心啟口儼如對佛若無淨火決不敢輕用他火燃香誦金剛僧謝曰吾有罪矣吾每用竈火燒香卽此不敬多矣或竈有穢柴以之燒香則敬心反變爲褻心矣故太上書此以戒

穢柴作食

註柴雖下爨氣實上蒸不聞勞薪煉炭之事乎昔荀勗曾在帝座適膳夫進食勗曰此必勞薪所爨帝不信立召膳夫問之果以一故車脚供爨嗚呼水欲新而金欲潔火惡陳而薪惡勞誠慎其用也道經云一切世人不得以桃枝作柴燒炊有犯竈神所當禁忌蓋穢柴作食一則臭觸竈神一則烟氣上透虛空爲神見怒故也

引經詩曰其香始升上帝居歆

善報宋政和中李八犯大瘰癧百方不効初李未病時誦大悲觀音經滿三藏

一日忽有僧與藥一丸李漫留之未肯輕服後病甚夢與藥僧曰我觀世音也汝平日以穢柴作食爲供觸犯神明得此苦報因誦經三藏賜汝救苦丹一丸何不食旣寤食之七日遍身皮脫鬚眉再生病愈然則穢柴豈可作食乎惡報淳熙初饒州民許家修水陸供老僕於夜半聞二人言許家

齋供諸神不受問何故曰不合燒穢柴老僕白其主訓之乃庖者以薪濕取舊厠屋椽乾木起火也許供罷後得奇禍

夜起裸露

註裸露赤體也晝屬陽夜屬陰夜即百靈交會晝夜巡行檢察善惡或裸露觸犯即無可解救且君子無所不敬豈

可以幽暗之中不見鬼神而裸露以犯之乎

經引

論語必有寢衣周銘曰火滅修容

論夫正人君子明則畏人幽則畏神故雖暗室中儼若明神對

越况黑夜正鬼神出沒之時若裸體內有屋漏神外有護宅神上有虛空神萬一觸犯必取凶咎欽哉

改悔報姑蘇郭鎧素狠傲不信鬼神於七月中浴罷裸體抱琵琶行吟舉首見雲際現真武形披髮折膝足躡蛇龜左右二神人執旗捧劔鎧急索衣冠拜禱悔過遷善久之乃隱自是遍示人間不可裸露闔門皈敬真武後家富子孫繁衍

惡報彭城有宦家女嫁未一月無故譫妄裸形狂走了不知羞醫禱無效適張真人還京主人懇告真人作法召將現形云玄帝即到女始改容着衣為帝言曰蠢爾民婦夜中裸露犯我天神宜就顯戮乃煩上真已赦之矣言訖仆地甦起病痊

八節行刑

註八節者立春春分立夏夏至立秋秋分立冬冬至又三元日正月十五七月十五十月十五合五臘日亦為八節

此二八節日乃元始天尊分遣天君天帝神仙兵馬無鞅象數北斗南辰四司玉帝降臨人間開度羣蒙考校善惡定註罪福一切世人每於晝夜二六時中皆當敬謹謀諸善事盡心檢點罪過一念與人方便不可因循懈怠不可恚怒忿爭不可貪財利已不可僥心害人倘有過惡俱於此日行查載入黑籍永難脫離所謂纖善必錄微過必察舉止動靜昭昭不爽彼行刑者何無顧忌妄乃爾耶傷天地之和損身家之福莫此為甚不可不戒凡居官者於八節日皆不可行刑

引經

禮記仲秋乃命有司申嚴百刑斬殺必當

論上清真人曰八節之日當謀諸善事生歡喜

心不可恚怒忿爭夫恚怒尚不可况行刑乎

善報宋何比干字少卿汝陰人經明行修且通法律為汝陰獄吏每至八節日百端懇惻哀求邑宰從重減輕從輕減免所活數百人後為丹陽縣獄無冤囚至於八節之辰設法矜恤有罪之人人皆稱曰何父政和問一日大雨比於是日夢貴客滿門車馬簇擁覺語妻未畢門外有老嫗至來避雨而衣履不濕比干異之廷坐

雨止。姬辭出，謂比干曰：「君家世有陰德，君又治獄平恕，今天賜策，廣君子孫，因出懷中策，凡九百餘葉，授之曰：『子孫佩印綬者，當如此數。』」姬忽不見。比干時年五十六，有六男矣。又生三子，名壽、蜀、郡，守名學。吉州牧名孝，位大司馬，壽生顯，位至相。顯生鄢，位至卿。累世榮盛，悉如姬言。此皆八節日免刑之報也。由此觀之，比干不過一吏耳，能行仁恕，遂得厚報，則爲帝王卿相，及授一官一職者，能行仁恕，其受報又當何如哉？尙其勉旃。

惡報：唐竇軌，大穆皇后從兄，爲洛州都督，剛嚴嗜殺，多刑士民。遇有按決，卽掩骼埋胔之月，省園去梏之時，都不停省。初害尙書韋雲，起于貞觀二年，病甚，忽有二人來餉瓜，左右報無有。軌曰：「一盤好瓜，何謂無耶？」旣而驚視曰：「非瓜，乃人頭。」從我索命者，又曰：「快扶我起，見韋尙書言訖而死。」

唾流星

註：流星，卽過天星。飛動者，楞嚴經曰：「或見二日，或見兩月，乃至暈適珮玦，彗孛流星，飛負耳虹霓，皆爲惡相。」爾雅曰：「奔星爲約。」約，卽流星也。又曰：「絕迹而去曰飛。」光迹相連曰流。世俗愚人妄指爲妖，往往以唾爲解，不知流星非妖，妖實自召，推當內省自修，自然逢凶化吉，其可唾乎？

論：伏羲以流星入口而生，張道陵感神降自斗而生，真武以虛危

分秀而生子路感參星流下而生蕭何昴星東方朔歲星李白長庚星劉文成北斗第六星此流星之為祥也流星落五丈原而孔明死中台星折而張華亡流星入甕馮氏挹而吞之生桓玄篡殺滅家此流星之為殃也○附北齊後主隆化元年法師曇遷精研華嚴十地維摩楞伽等經之旨嘗講維論遂感心熱病忽於夜間流星飛入胸中乃張口吞之脆如冰片既食所苦頓除以食星成德遂名星德禪師星能福人亦能禍人豈可唾乎

指虹霓

註說文曰雄曰虹雌曰霓又曰赤白色為虹青白色為霓禮記曰虹者天地訢潰之氣也傳演孔圖曰霓者斗之亂精斗

失度則虹霓應河圖稽曜曰樞星散而為虹霓昔孔子修春秋製孝經既成齋戒向北斗自陳著書之意忽有赤虹自天而下化為黃玉刻文孔子跪而受之當知虹霓者信為斗星之餘氣著於形色者也敬之尚不遑其可指乎

引詩曰蝮螭在東莫之敢指

善報章臯鎮蜀與賓客宴於西亭忽暴風雨頃刻而霽有虹霓自空而下直至

庭中垂首於筵吸其酒含五色似霞四顧左右之而方去公懼罷宴客曰虹霓天使也天將降祥敢以祥賀未幾詔拜臯中書晉陵薛願義熙初有虹飲其金口酒翁吸有聲願使香成改其

命注酒於釜隨投隨涸頂吐金滿釜嗣後家門迪吉千祥駢臻其里屢兆豐年然則虹之至止為禎祥之兆也

明太祖見虹製詩曰誰把青紅線兩條和雲和雨繫天腰遂少下韻命文臣續之時有明經某續云玉皇昨夜鸞輿出萬里長空駕玉橋太祖嘆賞大悅命吏部選銓時有山東布政司缺御筆親除授之此因虹而得美爵者可不敬乎

輒指三光

註日月星為三光日為太陽之精星月稟其光辰宿宣其氣生靈仰其炤恩及萬物月者太陰之精以之配日以明

照夜近日則光歛當日則蝕盈極而缺示其不可久盈也故曰日以陽德月以陰靈三光著明萬物咸貞若輒指褻慢宜恒警戒

經引

太上曰若見日曜月曜北斗南斗則鄭重敬禮祈求護祐赦宥過

愆不可輕慢以招殃累

善報孫瑾父喪哀毀嚴冬跣足而步停柩未葬衣不解帶載柩度江天昏地黑瑾虔禱三

光風波止息日為之見事繼母唐氏尤孝嘗犯癰瑾為吮之又喪目瑾禱於三光舐之復明唐氏卒十日將葬時春苦雨瑾夜哭天遂霽雲開日朗至壙暮夜無光瑾復哀號星光燦爛月不當明忽明如晝此感格三光之報也以此觀之三光在上不但有照臨之

恩且隨所禱應矣安可輒生玩忽乎

久視日月

註日月者天之眼目無所不照總司萬彙人間之善惡罪福祿壽死生無不由之若久視則怠慢不敬矣豈不獲罪

乎記曰子事父臣事君無敢仰視况日月為陰陽之精代天司照其位尤尊何可久視此上三者皆太上教人趨吉避凶之事所以道藏中教人祭祀日月每二月初一日祭日八月十五日祀月當具香供拜禱以報其恩令人增福延壽首卷惡星災之與又有三台北斗篇言之甚詳

經引

禮記王宮祭日也夜明祭月也幽宗祭星也

論古者天子之祭如此今世俗止祀月

春月燎獵

註燎獵者焚林而獵也太上獨言春月者蓋古秋冬狩獵象天地肅殺之心也春為萬物發生之候縱火焚獵則草木百虫損傷殆盡是天方生之而我輒殘之罪斯大矣

經引

禮記曰國君春田不圍澤又曰草木零落然後入山林

論夫一切眾生皆有佛性豈可輕加殺害况春月燎獵所傷孕字寔多復暴以火則萬物焦枯百蟄煨燼其害有不忍言者禮記月令其禁甚詳太上屢以為戒三令五申而數見於篇也

惡報唐汾州獵戶劉摩兒一日與男師保同暴死有仰隴威病卒次日復甦因言至冥司見摩兒父子在湯鑊中皮肉俱盡唯見白骨良久復還本形隴問其故對曰爲專好火獵故受此報

許憲爲餘杭令其子獵於仇王廟側忽有三白麋從屋後出男引弓而射忽失所在復以火圍之風吹火反燒其面而死憲官繼罷

對北惡罵

註北者至尊有北辰焉北斗九星二見七隱第一星即天星拱之爲造化之樞機作人神之主宰宣威三界統御萬靈判人間之善惡司陰府之是非五行共稟七政同科有迴死注生之功有消災度厄之力上至帝王下及庶人皆當頂禮恭敬本生經曰

若有信心男女一心齋戒肅爾神明設九光醮迎諸九光聖母并七元君虔恭奉獻縱有十惡重罪冤家苦報如旭日輪照於冰山應時消息福壽增延無量天真俱來擁衛現世完滿子孫增榮所有福德如彼甘泉隨汲隨發受用無盡命終之後超生太梵真天上言涕唾是無心之過此言惡罵是有心之過惡罵者是惡罵他人凡有屈不得伸有冤不得白則向北罵之以泄其忿恨寔有犯至尊而天譴即至矣經云世人口業有四而惡罵爲最經云凡夫毒熾恚火常燃觸境生嗔逢緣起障所以發言一怒衝口燒心多

有中傷苦惱無量假令衆生雖已無過而不慎口業亦墮惡道况對北而可犯帝天乎

經引論語註北辰極天之樞也

善報昔劉俊以本命向北醮祭而蒙宥罪便默對北爲父祈壽而獲延年

李筌以奉北斗而生子靖爲唐功臣武侯有女虔事北斗而成仙上昇此皆載之教典顯有可稽者

誠求報管輅出遊見一年少問其姓名答曰趙顏年十九矣輅曰

汝眉間有死氣三日內必死顏以告父父追管輅懇救之輅見父

子情切乃曰汝可脩酒一樽鹿脯一塊來日往南山中大樹下奕

棋南向者穿白北向者穿紅汝可將酒脯勸之食畢哭懇必添壽

矣切毋言我名次日依言至山中見二人於大樹下奕棋顏跪進

酒脯二人不覺飲盡顏哭拜求壽二人大驚穿紅者曰此必管子

言之也我二人已受其情須憐之穿白者取籍視之曰汝今年十

九吾於上漆一九字汝可活九十九漆訖二人化作白鶴冲天而

去顏回見管輅輅曰穿紅南斗也註生穿白北斗也註死今已漆

矣子何憂但終身不可漏泄若泄必有大罪然則對北可惡罵乎

無故殺龜打蛇

註一切翻飛蠢動物命皆不可殺若龜稟真水之無上界箕尾之精所化以多靈性蛇稟真火之無其象

見諸河漢且能變化其靈者陰精定能殺人有識者恒切救護焉

引禮記曰四靈以爲畜鳳凰麒麟皆在郊極龜龍在宮沼

善報晉毛寶年十二行江口見漁父釣一白龜買放之江後一十年寶守邾城與石虎戰敗披甲投江脚如踐石漸浮至岸既登熟視之乃向所放白龜也臨去屢屢回顧有不忍別意

○孔愈字敬康會稽人初辟中宗參軍討華軼有功封餘不亭侯少時嘗過此亭見人提龜買放於江龜至中流左顧者三及封此亭侯鑄印龜紐左顧三鑄如初愈始悟放龜之報敬受而佩焉後愈年九十五終墓旁古木數株堅如金石故老咸云愈莖後龜啣木植於此至今號龜啣樹有橋名龜橋

○劉彥回父爲湖州刺史有人自銀坑來以大龜獻曰得此龜者壽千歲回父卽送坑所放之後彥回爲房州司士忽山水暴至平地數尺一家危迫俄有大龜引路皆得淺處遂脫水厄是夕夢一神人曰昔在銀坑蒙先君救脫特來相報

○孫真人在世時山行見人繫一青蛇公救脫去後再過其地遙見一年少引公同行至一王居有一絳服者出謝曰昨小兒遇害幸先生救之故遣長兒相迎致謝延入內宮有一妃引一青衣小兒

拜謝再三、欸留三宿、珍饈美飴、綬綃珠玉、無不盡獻、皆却不受、惟領上帝所頒龍宮三十仙方以歸、今千金方乃其所傳、

惡報明方孝儒先生未生時、父將營墓、其祖已擇日矣、夜夢朱衣人請曰、君欲作尊翁之藏、吾族居此地數百年矣、望展期三日、吾當族行辭去、明日徑開藏穴、濶六尺餘、中有赤蛇千條、卽夢中朱衣也、翁素不信鬼神、竟積薪焚之、有烟直縈繞其家、夜復夢曰、爾以孝而滅我家、我以忠而覆爾族、後數月、先生生焉、形偉異、舌能長出、透入鼻孔、穎悟高才、官至學士、盡忠於建文帝、誅十族、王命岳曰、哀哉方先生、盡君臣之倫、而四倫俱滅、果報之說、幾不誣矣、昔有一富翁、屋旁有枯木、將伐之、夜夢一老人率衆乞寬期、侯遷畢任伐、富翁因知樹中有物、命人視之、見樹穴中、異蛇無數、卽命僕縱火焚之、臭聞里外、老者鼓掌稱快、未幾其家夜半、輒見飛火入室、起救寂然、如是者再、不以爲怪、一夕有婢燎薪烘火、遂火燃家人以爲故事、睡皆不起、閉門一家皆焚、

○五代龍山數軍人修築茶園、見一白蛇、大如拱、將擊、內余姓者勸阻之、衆不聽、竟殺之、次旦見一女子、攜一籃下嶺、衆奪其籃中貯香蕈甚美、女大呼曰、清平時有盜、垂泣而去、衆烹蕈將食、余忽頭痛不可忍、睡夢前女子云、君意相救、殊懷感激、蕈有毒、勿食、驚寤

衆食已畢皆嘔血死。唐時長沙吳某征蠻卒也得一白龜烹而食之遂遍身發瘡痛不可忍鬚眉脫落而死。

○江西都蛟黃敏墮馬左股折以石碎生龜塗之月餘愈而龜頭活出皮外敏惡之將割去肉痛難忍而止龜目所視如同已目遂死。岳州民涸池取魚得龜甚多剝其肉載龜版至江陵售之獲大利歸忽遍身患瘡痛不可忍瘡皆如龜形逾年肉腐而死。

○海寧民王屠與子出行遇漁父持大龜買之將爲羹有江西商人見之請以千錢贖且曰此九尾神龜也放之大有功德驗之果九尾屠不聽竟烹之父子共啖是夕大水自海中來牀榻皆浮父子漂流死。

箴朱璣贊云龜預四靈蛇先百蟄苟遇識者宜拯其急蓮池大師放生文隋侯濟蛇於齊楚珠報千金。

如是等罪司命隨其輕重奪其紀算盡則死死有餘責乃殃及子

孫註如是等罪總結上文之詞自非義而動以至殺龜打蛇皆是輕重二字有一篇總較之輕重有逐句細分之輕重如暗侮君親與

抵觸父兄較則暗侮輕抵觸重也就暗侮一句較則暗侮自分輕重也世人造罪實難瞞自家司命竈君司命亦不敢分毫獲短照

其罪之重者奪紀輕者奪算苟罪犯極重奪之盡時便當身死若死猶不足償尚有餘罪則遺殃及子孫此通三世而論也大抵上帝好生卽草木禽魚尚不忍其息滅何況人爲萬物靈乃忍殃其子孫乎然欲懲惡以勸善不得不然此皆爲下根人現身設法也梓潼帝君詩曰妙藥難醫冤債病橫財不富命窮人虧心折盡平生福行短天教一世貧生事事生君莫怨害人人害汝休嗔從來天地無差報不在身今在子孫此卽殃及子孫之謂也

經引

易曰積善之家必有余慶積不善之家必有余殃

善報楊素勸立煬帝以亡隋室

素子玄感爲煬帝族誅李勣勸立武后致革唐祚勣孫敬業爲武后所夷今人近據日前見某行善受禍遂曰天道無知見某爲惡得福遂曰報應顛倒不知爲惡得福必其祖父行善故報之以此完善一案然後報惡爲善得福必其先人作惡故報之以此完善一案然後報善善惡之報豈朝發夕償之謂哉吾願世人鑒此切母爲惡以延餘殃當孽孽爲善以流餘慶也

箴附按佛經因果受生之說一曰天道二曰仙道三曰阿修羅道

四曰人道五曰畜生道六曰餓鬼道七曰地獄道夫天仙修羅固屬積感衆因人畜四道尤其是業緣定報故當就此而細考之其曰

人道者人者忍也。違順情境悉能安忍。由昔在因之時。心心欣樂。修習五常五戒。行中品十善。感此道身。經曰。爲人豪貴。或爲國王。或爲長者。從禮事三寶中來。爲人端正。顏色潔白。姿容第一。從忍辱中來。爲人精進。無有懈怠。樂爲福田。從精進中來。爲人安詳。言行審諦。從禪定中來。爲人才明了。達深法。講說妙義。開悟愚蒙。聞其言者。信爲珍寶。從智慧中來。音聲清徹。從歌詠三寶中來。爲人潔淨。無有疾病。從慈心中來。爲人多怖。聲音嘶破。從地獄中來。爲人暗鈍。懈怠多食。語不明了。又復怯弱。樂友癡人。偏喜黑暗。從畜生中來。爲人不及。從猪中來。爲人凶惡。從蛇虺中來。無度幾心。從狗中來。狼戾自用。從羊中來。好美飲食。恣殺物命。無有慈心。從豺狼狸鷹中來。不能安詳。及不忍事。從獼猴中來。又云。爲人修長恭敬。人故。爲人短小。輕慢人故。爲人醜陋。好嗔恚故。生無所知。不學問故。爲人顛愚。不教人故。短命多病。好殺生故。無有資生。恒苦貧困。好偷盜故。無有子息。亂人妻故。子女淫亂。亂人室女故。鰥寡孤獨。虐待子女故。爲人醜惡。遮佛燈故。生爲牛犢。爲官酷虐。刻剝小民故。生爲獐鹿。驚怖人故。生諸龍中。好調戲故。身生惡瘡。療治不效。鞭撻人故。人見歡喜。對人喜悅故。人見不喜。對人惱怒故。官司囚繫。桎械在身。籠閉衆生故。爲人吻缺。好釣魚故。生裸形國。露體。

唐突佛精舍故生馬蹄國草屨踐佛地故生穿胸國不佈施作福
不生悔心故如是等皆以宿債畢酌復形人道蓋無始來業擊顛
倒相生相殺不遇如來不聞正法於塵勞中貶爾輪轉此輩名爲
可憐憫者其曰畜生道者稟性愚癡不能自立爲人畜養故名畜
生由昔在因之時遇逃貪慾作下品五逆十惡感此道身經曰鬼
業旣盡方生世間與原負人財物怨對相值身爲畜生酌其宿債
此等皆自虛妄業之所招引若悟菩提則此妄緣本無所有其曰
餓鬼道者謂此鬼類羸瘦醜惡時博一飽恒受鞭撻填河塞海受
苦無量由昔在因之時慳貪爲性詐誑爲心作中品五逆十惡者
感此道身經曰是諸衆生皆以純情墜落業火燒乾上出爲鬼此
等皆自妄想業之所招引若悟菩提則妙証圓明本無所有其曰
地獄道者謂在地之下也然此地獄其量大小不同其壽延促各
異其中受苦者隨其作業各有輕重劫數不同其最重者一日之
中萬死萬生輕劫無量由昔在因之時其心念念貪嗔癡造極惡
業作上品五逆十惡者感此道生經云此等衆生自業所感造十
習因受六交報驅入無間地獄是名地獄十因六果皆是衆生迷
妄所造種種因果多端今但節取其切於三世報應者以明輕重
減奪之理庶幾鑒戒明而自知驚悟焉

又諸橫取人財者乃計其妻子家口以當之漸至死喪若不死喪則有水火盜賊遺亡器物疾病口舌諸事以當妄取之直

〔註〕上文既明隨事受報而此節又特取有勢力而貪財者言之財非應有以威力迫取曰橫直謂原數所直乃恰合原取之數也夫橫取人財者多為妻子家口計不知汝家司命正計汝之妻子家口漸至死喪以報其貪也則始欲利之適所以害之也佛說人家產業嘗為五家所共五家一曰國王官長二曰水火三曰盜賊四曰刀兵五曰不肖子孫凡人辛苦作家自謂可以長守不知不覺暗中為此五家負之而去故曰共也今太上所舉耗端又多此遺亡疾病口舌二種則其所折算而譴責者其途不亦廣乎

〔經引〕大學曰貨悖而入者亦悖而出又曰不仁者以身發財

〔論〕妄取人財隨事有報以當其直蓋世有不明之事天無不報之條人能巧於機謀天自詳於報應所得之財業已化為烏有橫取之罪仍舊居於莫贖思及此橫取之人不惟寒心亦當灰心矣○人有錢癖者只為子孫計久遠不知多少癡豪滅門清白發跡矧

福祿有數，多得不義之財，留冤債與子孫償，非福也。至於濟貧乏，立廟祀，贍宗族，救窮親，育嬰孩，置義館，義塚，修橋造路，施棺槨，施粥施藥，贖物命，放生，若已力所及，則爲種種極美功德，亦難盡述。當勉力爲之。若已力所不能及，一有欲速盡美之心，其爲悖入，必甚，則造罪已多，亦安能從井救人乎？

善報 金昱二世患癩，醫藥不效，問何奎。有道術，往問之。奎曰：汝家必有他人功德在家作耗。昱歸問母，母曰：佛前紗窗，乃圍城時所得，急撤起，醮祭遣之，後病遂愈。

惡報 孫奮爲扶風，卽掾，苛取民財，遂致巨富。大將軍聞其富，索白珠十斛，紫金三千兩，不與，坐以叛逆，抄沒貲產，併逮家口，相繼死。韋公幹知瓊州，瓊多烏文，陸陀皆奇木也。韋驅匠沿海採伐，鞭撻橫施，及滿任，具二大舟，盡載奇木，雜以金銀，浮海而歸。行未百里，二舟俱沒。○呂師造知池州，剽竊公帑，侵漁百姓，厚載而歸。舟泊竹葦，忽見一物躍入舟中，火卽隨發，貨物俱燼，惟舟與人幸無傷。丁謂貶朱崖，至龍門南，彭婆店遇巨盜，盡失所有。所珍玉枕俱被劫去。○劉治奉命點盤蜀宮，恣意掠取，一時謗議騰沸。及解職，乃自請押柵，希圖塞謗。至新都，爲羅令璠脅取而去，終歸烏有。○馬襄爲蜀漕司，劉肝之亂，親持大銀五十錠沉井中，亂定反無有。

又枉殺人者是易刀兵而相殺也

註按此節又由明殺人之報枉殺之事皆由上文取財而起其事不

一如上所言忍作殘害陰賊善良虐下取功刑及無辜誅降戮服入輕爲重縱暴殺傷埋蟲厭人等事皆是又如將不約束用兵枉殺官不慎刑冤獄枉殺醫不審病用藥枉殺惡多男女墮胎枉殺焚劫擄掠盜賊枉殺悞人終身害人子弟庸師枉殺甚至一時之怒一言之讒皆爲枉殺一返一報冤對分明雖曰殺人實以自殺故曰易刀兵而相殺也

經引

孟子曰殺人之父人亦殺其父殺人之兄人亦殺其兄然則非自

殺之也一聞耳

善報明徐公達與張士誠戰皂林獲衆六萬不戮一人悉歸京師下姑蘇與常遇春約中分撫定徐左常

右秋毫無犯居民安堵封魏國公卒贈中山王後封兩公

○

惡報董卓弄兵挾主嗜利無厭每借捕盜爲名分遣將卒四出搜

掠子女玉帛所向皆空慘殺猶難悉數未幾爲呂布所誅暴屍燃

臍雷震棺開終不能葬此擄掠枉殺之報也

○

歐希範因元吳聚衆稱亂楊畋討之不克乃命杜杞伐之杞入境

卽爲招降與之通好希範猖獗久亦幸苟免遂偕酋領數十來降

武應篇注釋大全

卷之三

又枉殺人至殺也

三

杞爲大宴勸醉乃執之座上翌日盡磔於市且使皆剖腹剗其肺腸召画人繪其五臟圖遂遷待制帥慶州未幾若有所睹朝夕登園忽仆於園中家人急扶出之口鼻皆血自言歐希範以拳擊我後三日死此誘降枉殺之報也夫希範起盜賊殺人多矣死固其宜然誘降而殺之出於狙詐于理大謬况復殘忍而重苦之乎喜功名圖權術如杞所爲豈一死而遂已乎

○許某於順治四年從大兵入粵遂授一令是時聲教初訖新附之民在城中者皆遵制削髮而山村鄉民多不剃頭兵快擒至長髮百姓十四名非盜也許某以盜申帥府當午時帥府令押出盡殺之許家眷來署離縣治百餘里被劫盜擄男婦十四口悉被殺恰於此日午時此枉殺之報也王命岳曰使許令遲回片刻留此十四人之命則一家十四口保全至署豈顧問哉故曰殺機起於此禍害應於彼理固然也

取非義之財者譬如漏脯救饑鳩酒止渴非不暫飽死亦及之

註財非已有以計奪之以術誑之皆爲非義較上文橫取者少異律以廉正總屬貪狡未有不致禍者也世人利令智昏始既不顧是非繼且不顧利害往往以身殉利自取速死非好死也譬如漏

脯鳩酒食之必死方其嗜之明知死亡亦不顧也可嘆哉

○劉夢震曰屋漏水滴脯上久則脯敗爛名爲漏脯有毒能殺人鳩

酒是鳩鳥羽浸酒飲之則死以此鳥食蛇有毒也

○羅耿辰曰禮記內則云馬黑脊而般臂漏陳浩白曰般臂馬前脰毛班色也周禮漏讀爲螻謂其肉如螻蛄臭也漏脯以病馬肉作脯食之能殺人鳩毒鳥也廣志云鳩大如鵝紫綠色長七八寸食蛇螻雄名運日雖名陰諧以其毛瀝飲食能殺人

引論語曰見得思義論胡嘉棟曰非義之財有似是而非者今世縉紳以請托爲媒利之階且曰脫人刑獄受金何

傷成人功名取利非枉不知刑賞國之大法我以片語尺牘顛倒是非使有罪者倖免則無辜者含冤無學者倖進則有才者被枉抑人情好惡之公奪天道禍福之柄真衣冠之大盜名教之罪人也以此取利而謂可以遺子孫長久之計又何異認漏脯鳩酒爲長生之藥也哉大抵人生衣祿有定然能積德則命由我造可以轉禍爲福卽一人之身前註不足修善則後有餘若前註有餘不修善則後又不足此乘除之道然也乃世人不安分無片善寸德自有生來已載困苦藉中乃妄想非義之財蹈白刃而不顧悲哉惡報明正德九年王氏子爲邑庠生母死乘凶納婦約以七完成

婚生宿柩旁婦內寢夜扣門婢告婦以郎至卽放入登榻同寢五鼓遁去曰恐外人知罪我不孝也數夜乃問嫁貲婦曰簪珥半斤准衣銀捌拾兩俱在小箱內五鼓遂攜箱去不復來矣迨七完生置酒與婦成禮問嫁貲婦述前事生皆言不知婦方知被騙頓足哭泣卽歸告父母曰吾身爲賊破夫縱不言何以自容不如死父母泣慰不聽是夕縊死生來引棺塋掩土雷電奔馳攝一人跪棺前則生之堂兄也手捧金珥及銀跪而死屍隨裂碎騙色取財報建昌府熊氏寡子羅德貧難娶熊嫁江潮得銀爲德娶章氏德不與同寢章問故德言母失得妻何顏相對章卽脫簪珥衣服令德取母德喜奔告母氏天晚留宿不意潮前子江實匿床後聽之是夜到德家扣門入內云事已說妥約明早去交財物遂就寢求雲雨章從之睡至五鼓後起身檢取諸物攜去至天明德回方知被騙章頓足泣曰財物事小奈失身何遂縊死德殯殮塋墓廊外雷電交作見江實震死棺前背書奸賊江實棺裂碎提起章氏立墓旁問德曰我何以至此德語其事扶歸江潮亦感泣攜熊氏與德同居德仍與章氏合婚

○萬歷初袁履善爲武康令有耕者悞發一古塚盜珍珠寶玩甚多遂不已乃羣剖其棺有美女坐棺中年十六七貌如生而眉目閉

女乃言曰吾梁時沈約女陰修十年不久翀舉汝第取吾寶物毋傷吾膚衆以爲怪鋤其頭出血而死女乃托夢於袁因擒諸盜置之重辟無一得逸者蓋沈文之靈也

○順治四年進士盧綰任江南督糧道參政有屬邑解到餉銀二百四十餘兩付該管吏張瑞昌暫收貯隨奉遣往郡越三日歸啟橐視之已無有矣問守宅人或謂啟戶入者張僕吳勤獨卧戶側者曹僕陳美也捕訊究之拷掠備至不得情張吏訴於城隍又訴於南庄五仙五仙附牘突入盧署卽出少頃同房吏曹璘正冠忽作五仙語曰喚張瑞昌來昌至仙曰爾失銀乃曹璘僕陸賢盜去璘實不知賢於初十日丑時盜去將銀百兩置大門靠橈璘父出賢倉忙逃走時有菜郎吳茂歇京戶外窺見拾去窮人福薄財至家毋暴卒幼孩痘殤吳茂病死其五十兩一封家人竊去分散又九十兩現藏牀底可令曹璘押陸賢歸速取之言畢曹睡少頃復大呼曰吾乃本縣城隍也爲昨事往拜南庄道經此喚曹璘來說一明白這銀是陸賢盜去然吳勤陳美却是一段因果前三世陸賢是毛家子環陳美乃廝役也毛家置銀十一兩在棹上陳美盜去害了環打死陳因孽重一世變猪二世變狗此時家主命吳勤將大棍扑之滾水泡之所以有此一椿極刑孽報張瑞昌前世借陸

賢銀一百二十兩、今失銀一百五十兩、多三十兩、俱令昌賠補、若再追陸賢、則冤冤相報、無已時矣、今尙存銀九十兩、陸賢藏牀下、上蓋以瓦、昨晚使女取炭、又去三兩、止存八十七兩、可歸速取之、遲則又散矣、幽冥報應、分毫不爽、如此、陸賢竊銀、不會受用一毫、此乃朝廷錢糧、非張瑞昌私財、若陸賢不竊、則公案註定、瑞昌該還陸賢銀一百二十兩、可見世上錢財、不可苟取、又有孫吏因喪子、求神問因果、尙可得子否、神告云、死的不是爾子、乃是僧人轉劫、前生爾爲娼妓、勾引此僧、姦宿、耗其資財、故有此報、神將手自指心窩云、要求兒、不難、只這點不壞、自不絕嗣、言畢而去、曹甦醒次日歸、從牀下瓦內、果得銀二封、攜見盧老爺、令張瑞昌補完、遂銷前事、○以上四案、是非義之大者、故詳言其報、至於財物、一絲一粟、一草一木、一針一線、非我分所當得者、皆屬非義、尤當時時省察、慎毋曰、小而無報、卽取之亦不妨也、義利之介、間不容髮、冥冥書記、絲毫不爽、慎之慎之、

夫心起於善、善雖未爲、而吉神已隨之、或心起於惡、惡雖未爲、而凶

神已隨之、

註此又申明善惡之幾、是就人所易忽之處、使人知所謹也、凡人善則得福、惡則得禍、皆於其已行者而言、至於心

力萌動遂爲鬼神之所隨發隨至更無一毫等待如此則操守不可不慎謹獨不可不嚴也中誠經曰心口意語鬼聞人聲者卽隨之之義也邵康節先生曰人之善惡形於言發於聲人得而知之萌於心動於意鬼神得而知之是以君子於起念之際常切檢點檢點既純斯有善而無惡矣中誠經曰夫人修持善惡自起於心心爲五臟之首萬惡之根善惡攸分感應如響故人平日行善猶未足片時行惡便有餘可不慎乎佛經曰三界無別法惟是一心心能作佛心能作衆生心能作天堂心能作地獄心起者一念之萌也一念雖微感動天地關通鬼神人能起一善心只此一念是破地獄之靈符斬羣邪之慧劍渡苦海之慈航照黑暗之明燈若起一惡心則三途現前沉淪不息故吉神凶神隨念隨至其機之速如此憨山大師示人修行之法云念從起處須看破事未至時莫妄生若能於惡念起時一刀斬絕則業根當下消除妄念何處安着超凡入聖機在此矣昔趙康靖常置瓶豆於案間每一念起隨善惡以豆別之善則投白豆於瓶惡則投黑豆初黑豆甚多旣而漸少久而善惡二念俱忘瓶豆置而不用此正心誠意法也

引經
中庸故君子必慎其獨也易曰幾者動之微吉凶之先見者也

感應篇註解大全 卷之三

夫心起於善至隨之

三

論宋廖德朱元晦夫子高弟也少時曾夢一神題其謁刺云宜義郎後登第果受是職因思前夢恐官止此遂不欲行元晦諭之曰人與物不同器如筆止能爲筆不能爲硯劍止能爲劍不能爲琴故其成毀久速有一定不易之數唯人則不然虛靈知覺萬理兼脩有朝爲跼而暮爲舜者有惡人而齋戒沐浴可祀上帝者故吉凶禍福隨之而變難以一定言也今汝赴官唯是起心之處動念之時先充廣德性力行善事前夢不足爲芥帶德明頓釋所疑因行赴職後果官至侍郎此言立心爲善可回前定之數也然則人於一念之善一語之微遂能易賤爲貴轉禍爲福其速如此

善報江陰縣南門軍張旺素無行嘗夜盜城西田父菜被執濡其首溺中恨刺骨一夕圈火往焚其屋道經官溝有画師吳碧山未寢聞步履聲窺見旺有惡鬼數十從行頃見旺回有青衣童子前導至旦叩旺旺曰我本欲燬其室忽念冤冤相報無已時遂止不意有鬼隨行如此猛然回頭棄俗出家竟得道果

杭州酒家以燒鷺賈利門有懸鷺毒蛇入腹旋繞一行道者心計曰是必毒死客也爰買此鷺埋于地而得金焉酒家與地主爭之地主以其地所產之金酒家以爲買鷺得金也全訴於巴巡道道訊得情嘆曰一念之善天報響應汝二人違天貪財各杖三十

金歸埋鷺者

兩報紹興府郭承恩新除温州參軍將之任親詣天寧寺佛前立
願云絮家九口赴任温州一願合家不食牛二願掌權聽政與人
方便恤孤撫貧濟急養老考滿還鄉誓刊施般若經永遠佈施後
考滿與同僚法元珍共買舟還參軍居前艙法居後艙行至紹興
界風浪大作見海中奇怪鬼神將船鏹截兩段前艙順風直送到
岸後艙法司人口盡沒蓋因法司苛取民財行私受賂故兆此報
起心報龔仲和與李長衡友善衡過仲和宿其家衡已就寢仲和
步月中庭頃之衡覺呼仲和曰適得一夢與子同坐忽黃冠道人數
輩擁入怒毆汝吾力解去已而復來吾復勸息和驚嘆曰異哉適
欲就睡見月色可人徐步思此庭狹小庭後乃黃冠開地意欲備
價與求方得寬展不意纔一起念遂入子夢若行則禍害立至矣

其有曾行惡事後自改悔諸惡莫作眾善奉行久久必獲吉慶所謂

轉禍爲福也

註此因上文示人以禍福之幾而導人以遷善改過之

門也然改過先要知過此誠意先由於致知之學也人
若知過而怙終不悛因循墮落是不知轉禍爲福之道矣夫善惡
初分一念之起固有報應而改悔自我猶可轉移吉凶禍福雖有

定數然數定者天命也感應者天心也天心既格則天命自隨之而轉矣久久者行之久而又久也言必功深候到不可驟希也夫一日回頭皆可獲福則改悔一途豈非至便之法門乎太上更恐人誤認放下屠刀立地成佛二語妄想以一杯水救車薪火故又戒曰諸惡莫作衆善奉行諸惡莫作望其刮磨盡淨也衆善奉行欲其積累成功行之永久方得贖前愆禍去而福來也今之愚懵自知作惡招罪請仗僧道禮經拜懺以圖釋罪者豈不謬哉

經引

孟子曰雖有惡人齋戒沐浴則可以祀上帝易曰震無咎者存乎

悔

論篇中改悔二字改者改過吾儒存心養性有改過之方悔者懺

悔佛祖明心見性有懺悔之法大抵改悔之門最上者治心當下清淨動念即覺覺之即無苟未能然須明理以遣之又未能須隨事以禁之自當念念提醒時時洗滌奉行太上改悔之戒行持儒釋懺之方矣

善報楊仲和爲許州推官天聖中命鞠蔡州獄枉斷死刑心中亦疑懼後爲揭奏將受重刑仲和悔過立棄官誓行百善贖罪每遇鰥寡孤獨死喪疾急僧道貧困無不周恤數年家產蕩盡子傭工給養朝夕敬祀玄天上帝帝憐其勇於改過化爲道人授以十二

真君靈籤傳之學道繼乃東嶽修錄補爲麻溪注祿主簿朝廷追封悟本真人

改悔報崇德姜應兆爲人謹厚滴酒不嘗設教從之者衆偶出途中遇里父醉姜扶之覺袖有金便生貪疑欺其昏竊之里父醒不疑姜有門徒憑几臥夢神人曰王師虧行竊金上帝以其素謹不忍驟殛姑示薄罰次日姜忽思酒由是日坐醉鄉生徒俱散至半年所竊金悉還酒債一日復入酒肆有四女奔姜姜忽自思向因一念之差顛倒至此豈容再誤遂堅拒之夜夢神曰吾四姐妹酒孽也因汝竊金故來耗汝汝能悔過帝命吾還矣及旦對天焚香改過行善厭酒如初生徒復聚家漸富饒壽考終

○嘉靖末衡州林通判署府事府有五顯神祠林移置他所未幾怪作刀火夜飛林惧甚請武當山道田光宗禳之田曰試觀其狀乃靜坐堂中竟夜明日語林曰此事繇公夫人受賂六百元中有冤死者神挾之爲禍耳乃令夫人囚服出所得金伏地請罪道士先責林棄法受賂盡散金濟貧又責神不宜與鬼魅作孽宜速自更遂移神故處妖患頓息

○阿那律原係劫盜夜至佛寺見佛燈欲滅拔箭挑之燈忽大明那律悚然卽時改惡從善遂證道果朱純亦一大盜事敗入終南山

日夜懺悔，馮真人見彼誠心向善，授以道要，修之不忘，竟得道，改悔之功，豈不大哉？

歲未璣曰：改過之法，惟在自已檢點。卽今生富貴充足，當常作落窳想，況乎貧寒困苦哉？故必動心忍性，遠思揚祖之德，近思弭已之愆，上思報國之恩，下思造家之福，外思濟人之急，內思閑已之邪，念念如此，事事如此，自然善量充滿，福集而禍轉矣。袁了凡立命改過諸篇，當參看。

故吉人語善視善行善一日有三善三年天必降之福凶人語惡視

惡行惡一日有三惡三年天必降之禍

註此節承上文而復言感應

去惡也。蓋善降福惡降禍而必以三年者功過完滿之期也。言人卽善人凶人卽惡人不言善惡言吉凶以其爲善卽福爲惡卽禍也。語善如非禮之言不言樂道人之善開發人以善心是也。視善如非禮不視樂見賢人樂觀善書是也。行善如非禮勿動周旋中禮善與人同是也。反是則惡矣。三年千日也。三年不改變則終身可知。善又如篇首所言是道則進非道則退至與人不追悔是也。惡卽非義而動至無故殺傷打蛇是也。天必降福卽人皆敬之至

神仙可與是也。天必降禍。即司命隨其輕重。奪其紀算。至殃及子孫是也。故曰。陽憲速而可逃。陰憲遲而不漏。今人偶行一善。便欲獲報。稍不如意。則曰。天道無知。暫時爲惡。心懷不安。久不見譴。則曰。幽冥可欺。故相期以三年。非刻尅期也。乃遠其期也。至若二年而善不蒙福者。必善果未完成。三年而惡不蒙禍者。必惡積未貫盈也。若善果熟。而惡積已滿。則禍福之降必矣。玩二必字。有斷乎不爽意。老子曰。九層之臺。始於累土。千里之行。始於足下。欲爲善去惡者。請從今日始。而日新又新。勿令間斷。則日積月累。自功多而報崇矣。

引經

易曰。善不積不足以成名。惡不積不足以滅身。小人以小善爲無

益而弗爲也。以小惡爲無傷而弗去也。故惡積而不可掩。罪大而不

可解。

補註篇中三善三惡。皆以語爲第一。可見人生造業。口過居多。即誑諸無識。謗諸同學。攻訐宗親。訕謗聖賢。形人之醜。許人之

私。便生咒恨。便說他過。見他體相不具而笑之。呵風罵雨。口是心非。造作惡語。讒毀平人。毀人稱直。罵神稱正。指天地以證鄙懷。引神明而鑑穢事。咒詛求直。每好矜誇。自咒咒他。晦臘歌舞。朔旦號

怒對鼃吟咏及哭對北惡罵等罪皆口過也然口最能兆過口亦甚爲有功誠能轉一機鋒語善而不語惡語常而不語怪苦口勸人爲忠爲孝爲聖爲賢則語之爲功豈不大哉昔嚴君平委曲論人以善立證仙階葛孝先與人好說善言而聞道度世爲善之功亦何嘗無藉於語言人人當自珍重每於啟口之際切勿邪言妄語好爲譁談使人傾聽且及閨中穢語眩人心目自爲得意恬無媿悔不知人間私語天聞若雷縱不能以語言作福豈甘以語言造孽哉戒之戒之宜學語善漸積日久自無語惡之病矣一卷天地有司過之神句安禪師見二僧相與語言公案併功過格勸化篇宋登祝期生黃山谷諸篇可參看

善惡楊起元曰休寧儒士程學聖師事洪甲立心正直中年後學聖神遊冥府職掌雷部判官每言真事不爽洪師有友潘靈公祝石林昔積學不第洪問學聖對曰潘公中在癸未榜祝尙早癸未潘果中洪又令爲祝查之聖曰天榜未定至戊子十月又囑之聖曰祝已丑有名然尙有那移揭曉乃定蓋冥中論人善惡不止月旦評平生爲善忽起一惡念不待其事之行神卽惡其穢而禍之平生爲不善忽起一念悔過不待其事之行神卽鑒其馨而福之科第專屬文昌不獨本身行事卽祖父三代善惡皆比較去取故

知視公有分而不知後來作爲何如故未知定奪也。祝至己丑果中此積善之報也。

箴附棲雲真人王志盤山語錄曰或問如何出得罪福因果師曰罪福因果屬陰陽殼爾若出得陰陽殼則無罪福因果也。如何是陰陽殼大凡心上有一毫私欲自利之念則屬陰殼有一毫行善爲人之念便屬陽殼在陰則有惡報在陽則有善報若能練德心體虛空無善無惡無纖毫掛碍自作得主則禍福着他不得因果纏他不得便是個出陰陽殼的真人也此超因超果之功也乃知無上菩提至真妙道只在人之一念精進耳有志之士可不免修淨業以基福慧哉大抵志大道者發願之始卽務自度度人要左福慧雙修修慧必於見性明宗修福必於五倫百行二者相協上帝必以天丹待之諸佛定以淨土攝之不徒超昇上界實且頓證無生不生不滅然後可以入世出世度世了此大事因緣若區區冀長生修性命所謂不修三昧報盡還來卽昇極無色界壽至萬億歲究竟散入諸趣不能出世而此諸趣皆因不了妙明真心積妄發生妄有三界中間妄隨七趣沉溺蓋妄業招引各從其類但微悟菩提則此妄緣本無所有其普門行力又足以持之故能了大事因緣者必歸諸兩足尊也此語善視善又重在行善矣信乎

自度度人以幾福慧人人所當知人人所當行者故下文又以勉行一語足之此太上望人人爲善之苦心也凡我同人可不勉哉

胡不勉而行之

註此一句總結全篇見篇中千言萬語到底無有別意只是要人行善也胡不二字承上文降福降禍之言而來若云人縱不願行善獨不願作福乎深訝之也勉字有警

人力行之意蓋自然而然而然此生知安行之聖世間能有幾人哉唯是勉強力行庶幾有得書曰非知之艱行之惟艱華嚴經曰如人愛美饌自餓而不食於法不力行多聞亦如是元始天尊曰我今說經止救末劫若能遵行此道雖疑貳訕謗猶信也若不遵行此道則雖齋戒敬誦猶不信也可謂深切著明矣行之所以必勉也

經引

中庸曰或安而行之或勉而行之及其成功一也

論虛皇天尊謂妙行真人曰子登寶山周行左右萬寶縱橫無不可愛當下山際能勿持子真人曰人不持此以歸是謂自棄天尊曰善哉人生於世猶在寶山種種善緣皆至寶也子不極力行善當來離世是猶登寶山空手而歸不持一物能無悔乎金剛經曰如是百千萬億劫以身佈施中庸曰庸德之行又曰行之弗篤弗措也噫三教聖人皆言行之宜勉如一轍也學爲聖人者可不留

○藏宋范儼仁和人壯年舉進士高第歷郡縣以至卿佐服官二十餘載公每日必思所以忠君庇民之道視聽言動毫不敢苟雖在闔室屋漏之中恒有戰兢惕厲景象及子成立公便棄官歸隱布衣蔬食不涉世緣清心入道每日受持華嚴法華金剛諸經暇則禪定觀想一切世諦分毫不有即道德性命亦歸自然至大觀中年九十餘忽然了悟囑侍者曰人生世上猶如一場戲劇鑼鼓響時生旦丑淨合逞其技及至燭燼燈殘成何意興即如我來世間九十年如幻如化如露如電幸而悟得這個這個無邊畔亦無方圓大小亦無赤白青黃亦無長短上下無嗔無喜無是無非無善無惡所謂一物不有而萬象悉包者也此是最真最上無往無來的妙諦只在人志誠精進心心相續念念不斷耳三世諸佛能從這裏出現所謂真語也實語也如語也非誑語也非異語也汝輩各宜勉行勿令無常來到手忙脚亂噬臍莫及也語畢默坐合掌而化異香滿室祥雲遍空種種光明照耀世界數日如是萬目仰止此自下學訓行人德之始以至於盡性至命之極者也

○張拱宸曰一切作爲莫不始乎小而至於大故凡有血氣者皆可直証無上菩提然此無上菩提只在謹幾慎獨擴而充之而已豈

可甘自暴棄而以一切禍福委之天命因循耽擱空過此一生也哉行之之功所以爲大也

○周穀城曰讀感應篇須知六除五發之說一除自恃念凡人塵習紛擾自謂寡過不知尋常舉動少一檢點罪戾叢集豈可自恃終日乾乾自改其惡此除之之法也二除畏避念畏避思退暴棄孰甚焉勿憚檢察爲煩勿視約束爲苦力行既久自樂此不倦矣三除因循念語云勸人須下無情口學者除舊自新亦須下無情手如理亂絲則鋼刀立斷何煩猶豫乎四除好名念爲善得名者增一名卽損一善俗稱善曰陰德言不使人知也豈可飾節昭昭墮行冥冥乎五除邀福念學入道原當修身俟命分心求效善力便減若有所求而爲之將無所求而不爲乎故知因善求福善福皆虛六除間斷念善念不純與無善等古云至人爲善惟日不足斷未有中道而自畫者六念旣除五心斯發除自恃念則發謙心除畏避念則發信心除因循念則發勇心除好名邀福念則發誠心除間斷念則發不已心如此必致眷於太上矣勉行者最諸

○王耻古老先生跋序曰讀感應篇編終抑何反覆丁寧詳切而懇摯也夫大忠大孝與大不忠大不孝皆世所希有其平平無異者多矣自王公至於士庶其積習舊德累罪一日之間或有數事由

少而多由微而著積之不已至於罪大惡極而不可解者豈非財之爲累哉故感應之編其於貨財之條言之加詳曰殺人取財曰棄法受賂曰滅人自益曰乘威迫脇曰破人之家取其財寶曰負他貨財願他身死曰強取強求好侵好奪曰擄掠致富曰貪冒於財曰假借不還曰採取姦利曰寶焚無厭其間尙有凌孤寡混曲直倒輕重擊飛走離骨肉侵所愛妄干求肆恐嚇合爭訟營分外好誇施短尺度小秤升雜真僞驀愚人生咒詛起忿爭一一皆財之爲祟也故於其篇終也於財之爲禍又三致意焉旣曰橫取人財乃計其妻子家口以當之又曰取非義之財如漏脯救饑鴆酒止渴非不暫飽死亦及之嗟嗟誠哉斯言乎夫人之黷貨者爲妻子也以及貨而不能有其妻子何爲貴貨矣剖腹藏珠言愚人黷貨殃及其身也及身酷矣又迫其妻子不亦甚乎是亦不可以已乎且夫古之賢人言財之爲害者非一而足未有如漏脯救饑鴆酒止渴之刺中其情也饑渴未必能死人也以救饑止渴者死人將爲饑渴乎將爲死人乎抑饑渴未必終於饑渴也漏脯不食遲之又久未必無饑渴之充於腹鴆酒不飲未必無烈泉之至於口在能忍須臾與不能忍之間耳且饑渴之後亦有飫膏粱之時烈泉之餘亦有啜醴醪之候何者有七尺之身則天地之樂利皆有受

享之一日也、以終身之樂利、易一刻之醉飽、豈不哀哉、然而貪夫敗類、身亡家滅、轉相隨續、後人哀前人、後人復哀後人、而猶有爲之者、誠起於一念之差、行之數年、漸見豐盈、而謂一刻醉飽之說謬矣、夫三年五年、至於十年、誠一刻也、今有十年富貴、一朝破亡、回憶十年、豈非一刻之浮榮哉、夫亦愈知悟矣、至於天地好生、古聖垂訓、故於枉殺之條、復申重言之、尚書首虞典、惟曰好生之德、洽於民心、易首乾元、惟曰君子體仁、足以長人、而匹夫謀利、或至殺人、大人乘權、動多斬刈、所以市多償命之刑、朝有滅門之家、貴爲天子、而子孫屠戮之慘、有甚於平民者、何可勝道、是以君子外潔其身、內養其仁、緝熙無斁、雖與天地合德、可也、太上之編、旣以二者反覆叮嚀、慮人之畏難、而非進也、故廸之以起心、要使進、聖通神、動念卽是則欲、仁仁至、豈得憚煩、又慮人之安於前惡、而棄之也、故廸之以悔過、雖至於沉淪滄海、猶艤舟以待、則檣杌窮奇、皆當回首、又慮人之狃於易而進銳、退速、或忘其多愆、挾其小善、以責報於天也、故密之以一日之程、課之以三年之期、俾日久而功深、功深而心純、至終之以勉行、可知千言萬語、皆爲愚柔勸駕、若夫睿哲因心、動與天謀、禍福不期、天壽不貳、此聖人之極、則太上所深敬、而不以責之、凡人者也、

集美子跋序 曰誦感應篇貴遵行其事世人惟諷其文心竊自
慰曰吾志誠誦感應篇矣究竟不知所以誦也若真能誦斯篇者
於雞鳴平旦之時閉戶索居之際以及行止坐卧甚至造次顛沛
皆當熟思審處不敢放逸又於身所日行之事心所萌動之時有
與此篇合者與此篇違者有能行者有不能行者有時勢所阻真
不能行者而此欲行之之心必諄諄懇懇不可怠廢乃所謂不誦
之誦也是真能誦感應篇者然天下中才以下之人居多或不信
天地神明之可畏太上乃爲之明指曰天地有司過之神又有二
台北斗神君三尸神竈神言人罪過奪其紀算至篇終又示人以
語善視善行善三善三惡稽其數降祥降殃定其期則人之動靜
語默俱當凜對越之誠思爲善以去惡以至於無惡而皆善勿謂
小善不必爲也勿謂小惡庸何傷也總之太上一篇一言可以蔽
之去惡曰諸惡莫作爲善曰衆善奉行自是道則進至當立一千
三百善是教人爲善之方爲善者必依此不依此則非善矣自非
義而動至死亦及之是教人去惡之方去惡者勿犯此若犯此卽
爲惡矣乃復以一言結之曰胡不勉而行之總要人心慕身行行
善者自得福行惡者必得禍昭然可鑒也然則爲惡之人卽無可
救藥乎太上又有言曰其有曾行惡事後自改悔卽可轉禍爲福

也其勢甚速其機甚神人雖不急於勉力爲善獨不急於避禍以就福乎既急於避禍以就福安得不急勉力以爲善哉欲真心爲善者當實行斯篇毋徒諷誦爲功也然欲行斯篇者又當行功過格以爲入德之基故將功過格彙梓而編於後以爲證道者入德之門謹跋

感應篇詩跋



理徑深深着力尋 還須步顧影和衾 枉勞儘日頻張口
空博瞞天錯用心 叫徹砥身無玷玉 喚回透體煉精金
救時陰德如鳴耳 儲相真堪入作霖

按是篇人性本善無心暗合者多習俗易迷以身實踐者少茲刻專務躬行不僅口誦漫附俚語聊同誓願

太上感應篇註解大全終

人部

纂刊功過格

附

靈聖真君偈傳功過格頌曰不出門救萬命

教成子孫積德虫蟻隨在扶持頌謂不出門救萬命

不費財行萬功

孝友方便立地可做忍辱存心功德無量是謂不費財行萬功

不假法度萬人

興發善念喜行

善事挑剔善書贊揚善人是謂不假法度萬人

忠君格

忠君功格

○一日間事君自王公至宰輔及庶職各因其位各盡其職有忠當竭力報效者毋自欺隱微一事十功大事準量定功

○職居當要坐朝論道處心積慮陳善閉邪格君非心引君行仁溥利萬姓爲千功致君聽從見諸仁政利益天下後世爲無量功

力過格

忠君功

○爲國薦賢隨才器使舉用得人利益天下後世爲無量功

○屏邪去惡疏逐大奸使永錮不復用爲千功

○大計賢否黜陟不受賂賄勢要請託因其才能而用舍之一人爲百功

○戰陣攻取克敵開城預先嚴禁屠戮及投降者不許妄殺一人爲無量功○不殺降卒一人爲百功

○遵王制不犯科例一事一功

○不凌辱下僚一事一功○待僚友屬官每存忠恕一事一功

忠君過格

○一居官身近朝廷職居樞要自欺隱微不盡忠竭力有負厥職一事百過大事再準

爲輔弼不能處心積慮陳善閉邪格君非心引君行仁發君善心爲

無量過

○不能爲國薦賢退不肖舉措失人普害天下後世爲無量過

○見賢不舉反擠之爲自過見惡不去反助之爲百過

○大奸人不能驅逐一人曰過

○隱人善一事一過○揚人惡一事一過有言職及爲民除害者非過

○賢否黜陟受賂請託任意游移多致不公降一人爲五十過黜一人爲百過

○凌辱下僚及不寬恕同僚屬官一事十過

○居上官輕壞卑職前程一人爲百過壞其身家爲五百過

臨蒞有司功

○審編里役差徭均平使閭閻受福利及子孫爲千功

○清覈地畝錢糧井井有條使吏胥弓手不得欺隱包侵爲千功

○爲地方興利除害悉中繁窾利及當時惠貽後世一事千功萬功者
○斷歐人命或故或誤爲首爲從細細分別親檢定罪不致游移出入
一人爲百功

○懲治訟師飛誣棍惡扛証不得刁唆搆釁全人身家一人爲五十功
○能摘發勢豪蠹棍置之於法不使播惡騙詐愚民一事爲五十功
○能化誨頑民息訟及聽訟能伸冤理枉一事百功大辜再準

○責人明告其罪刑人明當其辜受之使知愧服而懲改一事十功
○凡詞訟迅速審理原被一到卽審勿致牽纏聽候多費一件五功

○耐煩詳閱卷案使兩造各盡其詞從中折斷毋錯一事十功

○詞狀少准內有牽連婦人幼子非關緊要卽與抹去各爲十功

○有力稍有力無力照理折斷從中定奪不以鈎金諛上官贖緩奏考

成一事二功

○審錄大案詳加細勘有真見的實翻改前案免冤大辟一人爲百功
○免一流戍爲四十功徒二十功

○五不打 病不打 人已打不打 老不打 幼不打 衣食不足
不打一人爲一功

○三莫輕打 生員莫輕打 上司差莫輕打 婦人莫輕打一人爲
一功

○五勿就打 人忿勿就打 人醉莫就打 人跑來喘息未定勿就
打 人急難勿就打 人隨行遠路勿就打一人一功

○五且緩打 我怒且緩打 我病且緩打 我見不真且緩打 我
醉且緩打 我處分不得且緩打一事一功

○三莫又打 已稟莫又打 已夾莫又打 要枷莫又打一事一功
三憐不打 盛暑嚴寒憐不打 佳時令節憐不打 人方傷心憐

不打一人一功

○應打不打 尊長該打爲與卑幼訟不打 百姓該打爲與衙門人

訟不打 工役舖戶該打爲修衙舍及買辦私物不打一事一功

○當打而禁打 禁用毛板重打 禁佐貳非刑打 禁阜隸作弊或

打腿灣或一塊打 右腿有棒瘡從左腿打一人一功

人言刑官無後誠能守此

入誠與夫前後條目留心力行其後必昌

○不時密訪獄官吏卒牢頭不許凌虐弔拷囚犯俾火坑化作清涼世界一日一功

○重犯無家屬者照例申請囚米一人一功無例自爲設處一人十功

○凡訟小事審明卽放毋混禁一人爲五功

○無力人犯當時釋放納贖徒犯卽准照保嚴禁佐貳不得擅監倉獄無淹禁一名各爲五功

○聽審不徇囑托一事十功極大事百功

○揆情察理不偏護原告不喜奉承迎合之言一事五功

○不愠越訴秉公理斷一事五功

○一時偶錯枉斷後卽悔悟虛心改過不吝不拘一事五功

○凡據理直斷本犯或到別衙門轉審得勝頓翻前案一事五功

○供招出入自爲檢點勿假手內幕及外招房吏胥上下相蒙作弊一

事十功

○開渠築堤能興水利功被當時恩及後世爲千功

○荒年四門設廠煮粥本地饑民來食者一人一功外方饑民來食者

一人二功

○上發賑濟分文不侵使饑民沾實惠一人一月爲五功若上無給發

自捐資勸富室樂助多方設法賑一人一月爲十功

○親講鄉約勸懲有方能使改惡從善一人爲十功

○考校公明不抑滯寒士一人爲十功

○開報生員優劣虛公採訪的實使士無枉濫能使風俗還醇爲百功

○凡事惜福節用愛人無可斂里戶無濫取舖行一事十功

○遇民間時氣瘟疫瘡痢盛行卽開局醫療捐俸併募助多方設處治愈一人十功垂死而得生者一人爲百功

○出示嚴禁勸諭勿溺兒女救一命爲百功

○凡遇祭祀能預齋戒祭時盡其誠敬一祀爲五功

○道途寺觀有棺槨及枯骨暴露者出示令居民或住持來報捐資着地方安埋各爲五十功

○闡明正教維持正法使聖賢遺旨燦然復明於世爲無量功

臨蒞有司過格

○催徵無法吏胥欺隱保歇包侵不能清楚混行鎖練敲打愈迫愈逼以致逃亡死散爲千過

○編審丁米出入乘除任意高下受賂增減一縣受害貽累子孫千過丈量田地朦混游移公正弓算受賂不公永遠貽累千過

○拏獲強盜不卽審定不能設法巧訊致衙官捕役拷打混供貽害良民冤斃囹圄而真盜免脫一人百過

○鬪毆人命或故或誤爲首爲從不能細訊分別親檢定罪致出入游移拖累多人一事百過

○不能禁止勢宦土豪奸蠹神棍以致播惡殃民一事三十過

○訟師飛誣棍惡扛証刁唆構釁聽信左右簧口指使敗人身家一人五十過一事十過

○不能化誨頑民健訟株累及聽訟不能伸冤理枉一事十過大事百

過

○責人刑人不明告其罪明當其辜致改過無由一人一過

○詞訟不卽迅審致人犯已到久候多費廢時失業一事三過

○凡閱卷案草率因循兩造察核未真折斷混淆一事三過大事再準

○詞狀濫收內牽婦人幼子非關要緊不卽與抹去各二過

○有力稍有力無力不照理斷多擬贖鍰以媚上司一事二過

○大案不能細察只依樣葫蘆致冤陷大辟流戍無由伸雪一人百過

○不能救一死刑百過 不能免八十過 不能減四十過

○不能救流軍罪一人四十過 不能免二十過 不能減二十過

救是上司擬刑不當我爲委曲申雪謂之病免減是已擬刑不能仔細覆案卽爲改輕之謂則已得而操之也

○不能免永戍一人爲五十過 ○不能免滿徒二十過

○不能免三年徒一人爲十五過 ○不能免二年徒十過

○不能免一年徒五過○不能免滿杖一人三過

○不能免九十以下杖二過

○官吏故入人死罪明知冤枉而怕畏權勢依舊案不與人作便伸雪者大事百過小事十過無心錯斷者減半

○居官受賂出人罪百錢一過 入人罪壞人官百錢五過

○無故輕壞舉官微程一人百過

○三莫輕打而輕打五勿就打而就打五且緩打而卽打三莫又打而又打三憐不打而亦打應打不打而徑打俱一人一過

○不恤民隱牢廛時起不吩咐司獄官提牢吏禁子掃除積穢不多燃蒼术多貯凉水等不給草薦姜湯一日三過

○倉監不覺察不密訪提牢官吏禁卒以致凌虐弔拷囚犯受苦一日一過

○重犯無家屬者不爲照例申請囚米一人十過

○無例不自爲設處以致囚餓難堪一人一日爲三過

○無力人犯不卽釋放納贖徒犯不准招保且左右衙官得擅監禁一人一日各五過

○凡小事已審明不卽發放仍前混禁一人一日五過

○偏護原告不照理審斷歡喜奉承小心迎合之言一人一事各一過
忿嗔越訴不依理斷一事一過

○審事或有錯枉不生悔悟改過堅執偏拗一事一過

○事已直斷結案本犯到別衙門轉辯得勝或致上司批駁而畏懼自改讞語翻案一事五過

○供招出入不爲檢點致吏胥上下相蒙一事一過

○保甲不自清查多委佐貳民擾而盜不弭邪教奸宄不息一次百過

○身先教化不勤讀約悉爲虛文勸懲無方無由改惡從善百過

○考校不公寒微擯抑一人爲十過

○開報生員優劣採訪不實多致枉濫無以示勸懲士風日頹百過

○凡事不節儉不知惜福不行愛恤民力濫取里民鋪戶一事一過

○時氣瘟疫癘痢不能多方設處開局醫療致傷多命百過

○凡遇祭祀不齋戒誠敬心多怠慢一祀一過

○不能闡明正教維持正道使風俗頹敗百過

○不能興利除害反創新法爲害當時流禍後世爲無量過

○以平民作俘虜首級獻功一人百過

○風土異宜習俗異尚時勢各殊強不知爲知偏見固執使下情弗伸

上澤弗逮百過

○地畝錢糧擅自加徵小民永累萬過

○問罪成招尚有生路不與開一線只求上司不駁一事二十過

○上司拏人明知其枉不敢力爲辯雪依命奉行一事十過

○自少門面自占便宜不顧他人職掌後人難繼一事五十過

○遇知己不與相證爲善一人一過

○闡明正學篤意行善者疏而遠之謗毀阻人好修詐僞粉飾無一善狀者反親而近之一事一日各一過

○不禁賭博酗酒鬪毆一日一事一過

○不禁服毒圖賴致人輕生家屬藉命搬搶者爲五十過

○不禁屠宰耕牛傷一牛命爲十過

公門箴論

公門一篇實錄中有善信妙人能以此意化尊同齊功德尤爲無量

陳鏞述紀

○古云公門之內好修行何也夫公門常常比較時時刑罰其間貧而負累冤而獲罪愚而被欺弱而受制呼天撞地無可告訴惟公門人

下接民隱上通官情難苦憂危時扶持一分勝他人方便十分寬假
一次勝他人方便十次若能釋貧解冤教愚扶弱母乘危索騙母因
賄酷打母知情故枉母舞文亂法則一日間可行十數善事積之二
年有數萬善事人當困厄誰不知感神明三尺寧無保佑自然吉祥
日至子孫昌盛如或不然怨毒之財得亦非福又有窮人無財可騙
從而酷刑徒損陰騭積怨何爲無論古昔卽今豪傑之士潛身衙門
亦時賑孤修齋墓埋髑髏亦有親老家貧才淺贖盡是好心好人
誰非孝子慈父但恐視財太重臨財苟得過于需索致陰譴匪輕何
如酌財可否存心方便得人喜錢勿受怨錢稍貶虎威勿肆狼毒命
裡有時終須有喜福後來必長久戒之慎之至禱至囑

孝親格

以化親于道爲第一
非生母能孝功尤倍

功格

始以致親喜悅終以體親愛敬見爲子
者時時念念皆當以父母之心爲心也

功過格

公門箴

○一日閒事父母公姑致敬盡養服勞承歡得親喜悅一日一功

○贊成親善勸親成德行仁解怒舒憂一事十功

○親倫理有虧委曲歡諫得其和悅改過遷善一事百功

○守義方之訓處變不違一事一功

○親愛亦愛親敬亦敬一事一功

○事祖父母繼母庶母能如是照上倍功

○親輪供養兄弟貧乏自任代養心生勸喜一日一功

○親歿守苦哀慕盡敬七內不犯妻妾五功

○親歿衣衾棺槨不吝錢財盡情盡禮母貽後悔各十功

○親歿兄弟貧乏自任營葬一無推委不致淹暴親柩百功

○置立祭田俾子孫輪管三十功外以所立百錢爲一功

過格

○一日間事父母公姑失敬失養不能承歡致親怨怒一事十過

○阻親善逢親惡一事一過

○親或有過失不能幾諫勸化使陷不義一事五十過

○不能守義方之訓一事一過

○親所愛敬者故薄之慢之一事一過

○有善事不勸親行一事一過○定省有缺一過

○親輪供養兄弟貧乏不肯代供致親饑餓一食百過

○親有呼喚答應遲慢待親怒色努目厲聲各百過

○與親爭辨順妻子廢孝弟一事十過

○被親怒責輒生怨嗔者一過○忤逆抵觸者百過

○與父母較曲直是妻子非父母一事五十過

○刻薄不敬異父母庶母一事十過

○爲利欺親一事十過○事祖父母繼父母如是倍過

○非應繼而拜他人爲父母五十過

○祀先失祭祭失其時各一過

病及不得已事免若因遊樂失時加倍

○守苦七內犯妻妾五十過○喪次飲酒一次一過

○殯殮葬祭推兄弟其均財物致久淹親柩百過不勤擇地淹親柩百過

○親歿吝財菲薄衣衾棺槨百過

○盜葬人山親柩被掘搆訟不休百過

○謀人墳穴我富彼貧令人遷墓賣我百過

友恭格

以化婦女友愛行善爲第一婦女能自和好功尤倍

功格

○一日間兄弟夫妻妯娌姑嫂和睦愛敬任勞推逸一功

○愛敬異母庶母兄弟姊妹姑嫂妯娌一日爲二功

- 愛敬諸從兄弟妯娌姑嫂一日一功○贊成善事一人一功
- 勸兄弟叔姪等改過遷善一人一事一功大事再準
- 兄弟等倫理有虧勸化至和順行仁成德一事百功
- 兄弟分財相讓不爭推多取少一事百功
- 兄弟中有貧乏能相周全使得安樂一人爲百功
- 兄弟叔姪能和睦堅忍合食不致分離百功
- 撫養族中鰥寡孤獨使其得所一人百功
- 作養培植宗族俊髦學業一人百功

過格

- 一日間兄弟叔伯嬸姆姑嫂夫妻不相和悅刻薄推勞好逸各一過
- 不愛敬異母庶母兄弟姊妹姑嫂妯娌一日二過
- 不愛敬諸從兄弟叔姪不教子孫等改過遷善一人一事一過

○兄弟子姪等倫理有虧不能勸化和順仁讓一事十過

○分財不讓多占便宜百錢一過

○族中有貧乏不能周濟求借鄙吝稱貸無門一人爲二十過

○殷富不恤族中鰥寡孤獨使其失所一人爲二十過

○族中俊秀子弟不加培植助其親師處友成就其學業一人三十過

尊敬格

念祖修德爲第一
尊師重道功尤倍

功格

○一日間尊奉祖先遇祭時盡誠備物致其孝思一祀一功

○待諸外戚尊長盡禮尊敬一事一功

○贊成尊長善事一事一功

○族中尊長貧乏危急者救濟安全一事一功一人五十功

○鄉黨鄰里尊長謙讓愛敬一事一功

○軒冕貴人道德長者加其敬畏儀型取法一事一功

○遇不成人多方體恤憐憫周濟一人二功

○夫妻相敬如賓相規以善毋相狎褻勿因口角反目鬪狠一日一功

過格

○一日間尊奉先祖祭祀時不發孝思不盡誠敬不能隨分備物一祀一過

○怠慢業師不遵教訓一事一過

○尊長有過愆視不能諫止一事十過逢迎其惡爲二十過

○族中尊長貧乏危急不能相周一事一過

○鄉黨鄰里尊長有失尊敬一事一過

○軒冕貴人有道長者不加尊敬法式一事一過

○遇不成人不加體恤反戲侮肆虐一事二過

○夫妻不知敬謹或口角相傷輒生鬭毆且多狎褻一事一過

慈教格

自幼教訓交友善人爲第一婦人能教子與非所生者功尤倍

功格

○一日間訓子孫弟姪仁慈一體或從師學業或市廛營生感化以善行禁止其奸貪不怒不縱一事一功教道見從一人爲五十功

○知有好事卽教弟姪子孫等行一事一功

○慈愛非已生一人五十功

○求得賢師友陶化以善一事一功自教以善一事十功

○子孫弟姪等宗支攸續嚴謹教訓毋陷非僻使小子有造相率漸至成德一人百功

過格

○一日間子孫弟姪等不謹教訓縱其爲惡一事一過不受職業任其

驕惰一人十過○知有好事不教之行一事五過

○阻其爲善助其爲惡一事五十過

○偏愛已子酷虐非已生者一事五十過

○自不勤教誨又不爲求賢師友陶化以善一事五過

○子孫弟姪等教訓不施不能成德漸入非僻一人百過

○畏後妻致前妻子失所一子百過

○爲妬婦所致不敢納妾卽納妾不取相近以致絕嗣爲無量過

○寵妾欺妻十五過妻妾凌制丈夫俱百過

寬下格

正身以教爲第一婦人能容妾婢及愛護妾所生子女功尤倍

功格

功
○一日間和妻妾寬婢僕體恤艱難疾苦可怒不怒而善教之一事一

○嚴禁婢僕不許橫行肆惡爲非一事一功

○勿輕撻僕婢侍妾一日一功導以善事見從一事十功

○同室僕婢一體訓誨見從改惡行善一人五十功

○不淫婢女使不失身得以及時遣嫁一人爲百功

○誤買良家子女爲僕婢知而送還不取前價計百錢一功或收養爲子女與配婚備粧奩嫁之各爲百功外以所費百錢爲一功

○他人僕婢受虐受苦出財贖還其父母一人百功外費百錢爲一功

○主貧爲僕婢者盡心事主公忠始終不二一事五功

○主有勢力不使不乘勢騙害人一事五功

○同爲僕婢有背主者委曲勸化見從忠事其主一人爲五十功

過格

○一日間妻妾不和僕婢病苦饑寒不恤冤打咒罵一事五過

○不行嚴禁縱僕婢爲惡一事一過

○姦淫奴婢百過

○無罪常輕鞭撻僕婢侍妾一日一過

○同室僕婢不能一體教訓一人爲五過

○謀人妻女一人爲百過未成者減半

○縱僕婢不禮于尊長一事五過○溺愛僕婢怨恨尊長一事十過

○僕婢有過不行責懲教訓容其惡慣小事一過大事再準

○縱容門客悍惡奴婢不卽迸去一人爲五十過

○爲人奴婢不一心事主欺肆犯上一日一過

○爲主出入錢穀瞞昧侵騙每尅百錢爲一過

○主有過失不善勸諫外揚主惡一事一過

○主貧各懷二心不盡力效忠且肆欺凌侮慢一事一過

○恃主位高金多嘗凌制貧民剋剝佃戶一事一過大事再準

○同爲僕婢背主者不爲勸化一人爲三十過反懲思之爲五十過

救濟格

以救未然及仁術巧濟爲第一存心廣濟無爲而爲功尤倍

功格

善醫善治富商遠遊隨時隨心隨力唐常人貧人婦人皆可以行持勿令錯過見義當爲而愛物亦附焉

○一日間汲汲救濟求借不吝遇物輒救施賑困厄扶危濟急一事爲

一功

○救饑死溺死縊死服毒死全活一人俱百功

○濟人錢米隨力隨與心生歡喜一人一功富人能厚施則以百錢準一功

○濟饑人一食渴人一飲寒凍人煖室絮被一宵各爲一功

○遇事相托儘力相助與之週全一事一功大事再準

○遇行次有物能蹙人足爲除去之一事一功

○興一事利及一人爲一功利及千萬人爲千萬功利天下後世爲無量功

○無歸窮人收留養贍一日一功

○賑濟鰥寡孤獨癰腫瞽啞殘疾等百錢爲一功周給族黨親戚等同

論

○救已死病一命百功救危病五十功重病十功輕病五功

○施藥一服一功醫藥急赴不論財物醫人一次一功

○傳人經驗藥方一方爲十功

○傳人保養身命事一事一功○傳人保養身命書一卷五功

○遇事輒與人方便一事一功大事再準

○暑天布施茶水冬天布施姜湯百錢一功

○濟人衣被等物百錢一功

○勸人收養棄孩一孩百功○勸募信善設立育嬰堂并自己出錢僱人撫養長大一人爲二百功

○施人棺木一棺十功外以所出百錢爲一功

○暗路施燈一月一功○淋雨施具一人一功

○施地與人埋葬一人爲五十功

受謝者非功

○葬一無主骸骨百功

○除一民害百功大事再準多功

○救免一流離五十功

○延續一人嗣百功

○作功果普度幽魂以費百錢爲一功

○米貴時平價出糶以所減百錢爲一功

○一遇災荒捐資賑濟費百錢一功

過格

○能濟貧不濟一過

○有求求救不救一過

○遇死喪不恤見遺骸不掩各一過

○擠窮獨無告拒人乞假各一過

○損壞道路義井涼亭橋梁渡船等二十過

○疑病妄施藥及假藥騙人各二十過

○荒年積米不發坐索高價致一人流離俱五十過

○破人婚姻絕一人嗣離人妻女致一人死拋棄一人骸溺殺一子女俱百過

工
進
才

三
五

讀感應篇法

太上感應篇在道藏中不知幾何年。宋理宗賜禁錢百萬命工刊梓。又御書諸惡莫作。衆善奉行二語冠諸篇首。而後此書大顯於世。當時名臣賢士皆極尊奉此書。李昌齡爲之作傳。鄭清之爲之作贊。真德秀爲之作序。讀感應篇當知前賢表章之意。止是教人爲善。若云誦誦祈福便非本旨。故他刻多載誦持善果。茲併不載。人都謂此篇出自道藏。遂疑其與儒教相背。此總是未曾通讀儒書人。通讀儒書則知此篇議論何嘗不合。易曰積善之家必有餘慶。積不善之家必有餘殃。積之云者見得善惡不止一事。餘之云者見得果報不止一途。易傳隱括言之。此則條晰言之。又書經所載作善降之百祥。作不善降之百殃。亦是何說。詩咏上帝鑒觀禮載人事得失。春秋事見於前。報書於後。精信感應之說便知六經

所載都是一理。故錄引經以爲証。

○明世宗序感應篇有云。善者聞之益勸。不俟爵賞之加。惡者觀之自危。踰於刑罰之及。可見此篇不但扶翼聖經。亦且補助王化。蓋世道不古。人心僥瀆。禮教刑罰。都不濟事。惟感應二字。可以動其爲善去惡之心。人卽不畏王法。未有不畏鬼神者。王法可以勢力機巧而脫。鬼神不以富貴幽隱而遺也。

○感應篇所載善惡纖悉畢舉。卽唾咳歌哭皆謂有關天鑒。初讀此等語。未嘗不疑爲渺茫恍惚。不可究詰。不知慎小謹微之道。固聖賢所貴也。書曰。細行不矜。大德之累。易曰。小人以小善爲無益而不爲也。以小惡爲無傷而不去也。致惡積而不可掩。罪大而不可解。一部禮記。於人一舉一動。皆有軌度。古人教人慎小謹微。多是如此。

○太倉王志堅云。感應篇凡數十百言。一篇之中。淺深精粗。先後互見。卽如一戒殺也。曰昆蟲草木。猶不可傷。綦細矣。曰非禮烹宰。則不禁食肉也。曰無故剪裁。則不禁衣帛也。又曰春月燎獵。曰無故殺龜打蛇。似乎益爲之寬。其途者蓋一爲學道之人言。一爲流俗之人言也。學道之士。得其說而精求之。可以超凡入聖。而流俗造業之人。亦可以去其太甚。不至漫無隄防。一部感應篇。皆須如此看。去便不覺其重複。

○不讀感應篇。宜有兩種人。一是章句儒人。一是豁達禪人。然真西山理學名儒也。而特重是篇。爲之序。李卓吾精信竺氏之說。亦作讀感應篇引。可見感應篇。無人不當讀也。

或曰。上士修德。善惡俱蠲。何假激勸於禍福之說。曰。此自是中心安仁。天下第一流人。太上本願。天下盡是上智。併此篇可以無設。

然世間畢竟中下人多。有所利而爲善。有所畏而不爲惡。此常情也。聖人作易。只要人趨吉避凶。何嘗不是此意。

○先儒嘗說上智人。不妨行下學事。感應篇固是怵惕下根。亦未嘗不是接引上根。上根之人。不務實修。專講虛無。是篇尤爲對症之藥。河南胡嘉棟曰。默有所緣。其機莫測。冥有所宰。其數莫逃。數與緣合。爲一定之天。數隨緣變。爲不定之天。實則無不定也。而人或見爲不定也。讀感應篇當思此旨。

○文昌化書有云。欲回劫運。先正人心。六祖云。一切福田。不離方寸。感應篇所列善惡。雖是大半從事跡上說來。然返而求之。一一皆起於心。心也者。感之主。而應之機也。讀感應篇。當思此旨。

易曰。咸。感也。是篇之以感應名也。易道也。然感之字。從咸從心。去其心爲咸。無心之感。其感至矣。朱天麟辛未進士太倉州人曰。有心爲感。感

不靈有心期應應不至讀感應篇當思此旨

○讀感應篇先發信心京口劉夢震曰一念信種一念善根念念信種念念善根若使疑信相參便是讀如未讀

○讀感應篇次勤修爲昔楊旬

唐夔州推司

奉太上感應篇常行十種利

益一收街市遺棄嬰孩倩人看養俟年十五願識認者還歸父母團圓二每冬十一月初三日爲始收六十以上十五以下乞丐貧人入本家養濟院每日給米一升錢十五文至來年十一月初三日已滿一年令其自便求趨三普施應驗膏藥湯藥四施棺木濟無力津送之家五女使長太不計身錢量給衣資聽其適配六專一戒殺遇有飛走及水族蝦螺等物買贖放生七遇荒年貴糴賤糴賑濟貧民八寺觀損壞者修之或橋梁道路溝渠不通者悉爲治焉九有遠鄉士夫客旅流落者斟酌其程以助裹糧而全還鄉

十在官辨明冤枉。每推已及人。扶弱抑強。今人終日誦持感應篇。未曾行得一事。便是與不讀者無異。然此十事。皆得志於時者。乃能行之。至於一介之士。自給不逮。曷能及此。然其間事有可圖。力之能及。則隨緣行之。若力不能及。不能行者。亦當行之。以心慇懃。懃懃滿腔。皆濟人利物心腸。無一毫慳吝鄙吝之意。一心爲善。感應卽此而在矣。豈可以力不可爲。將施濟一切事業。遂以爲無關於我。而置之度外哉。讀感應篇者。又不可不知也。

○讀感應篇。務期堅永。勿因無効而悔。勿致日久而怠。劉夢震曰。小善報近。大善報遠。報近者福小。報遠者福大。此宜聽之自然。不得妄生揣度也。

○行感應篇。不必拘科儀禮拜。徒誦其文而已。至於行止坐卧。私居獨處。時時刻刻。心中默念。存想意義。字字反入身來。有無是事。漸

漸寡去日日如此年年如此自然動念是善觸處是善矣語云背誦經勝於看本誦經人只徒口誦而行違何益也。

○感應篇須是無地不可讀昔武林錢養廉按初參蓮池大師師以

感應篇授之曰此吾儒安身立命之學也公自此矢心奉行公車宦轍亦必與俱寸步不離風波盜賊中輒著靈異在在勤謹不怠如此。

○感應篇要使無人不得讀太微僊君功過格云以善傳一人者當十善傳十人者當百善傳大豪傑大貴人者當千善廣佈無疆重刊不朽者萬萬善從前印施此篇者往往多獲奇報崇禎甲戌進士顏茂猷曰一句贊揚便是一句護持善根一念打動便是一念消弭罪業真格言也。

○此感應篇刊刻最多然詮說太汎往往覽不終卷故茲編以切實

爲貴然必須全備乃佳搏採搜羅開人蒙塞啓人心胸看到至處惟恐其言之輒盡也安有妄生厭斁乎。

○讀感應篇是知之入門工夫習功過格是行之入門工夫諸集只單刻感應篇功過格另刻使篤學銳志者雖切證向而不知行持有欲從末由之嘆善心有因而終止者茲集將功過格附成一書以爲指南庶可爲行持者一補助云爾。

○蓮池大師勸人行持功過格云凡人安置此格於榻前每嚮晦入息書其一日功過積日而月積月而年或以功准過或以過准功多寡相較自知罪福不必問乎休咎至哉斯言讀感應篇兼行此法其庶幾乎。

太上感應篇維持世教扶正人心與六經並垂又前人相傳章分節解句釋字疏其修吉悖凶之理如月之映川如鼓之應枹如影之隨身絲毫不爽而其引証精確箋註詳明者無過於此深而言之旁通於詩書語孟淺而言之徵驗於閭里鄉曲高下可以共論雅俗可以咸遵人能一言一動常存可對天地可質

神明之思庶無負乎修身立命之學矣
敬刊是書以公海內未敢復留姓氏誠
恐藉以博名聲邀福祉殊非 太上感
應之說但願讀是本者各身體而力行
之則勸善懲惡可觸目警心以爲書紳
之法云爾

昔乾隆五年六月薰沐敬題

